

清稗類鈔

第一冊

時令  
地理

氣候  
名勝

商務印書館發行

9  
3  
存乙

# 清稗類鈔序

有清紀元。逮於遜政。順康光宣。曆垂三百。其政俗之嬗變。朝野之得失。雖鐘籛既移。簡冊猶秘。今已無諱。可得言焉。夫有清之崛起於遼左也。值明之衰。既入中原。初政頗修。惟以部落之民。肆爲雄猜。外侈中怯。故用兵無已時。海內無寧宇。雍乾時號稱極盛。而衰弱之機。實基於此。蓋文字之獄。有以摧抑材智之士。川楚之亂。有以耗竭府庫之藏。咸同構兵。不絕如縷。外禍乘之。根本遂撥。此其興亡之大略也。殷鑒不遠。豈可忽哉。然其典章制度。始能知明之所以亡。而祛其弊。提倡學術。禮用儒賢。故政雖專制。而宦寺女謁之禍。中葉以前。未之有聞。於是一國之風尚。習爲儒緩。士夫之尊慕名義。代不乏人。馴至今日。雖有以術柔民之感痛。而吾人此二百八十餘年之遭際。繫諸歷史。不可忘也。則今日舉其往聞。窮嬗變之由。析得失之故。置鑑樹表。未可後時。然官書不足徵信。私書或誤傳聞。卽如錢衍石氏之碑傳集。李次青氏之先正事略。李黼堂氏之耆獻類徵。其所甄錄。大都傳誌之文。塗飾讚諛。孰爲糾正。是以近人論建州沿革。不

能求諸國中。而輒有資於域外之書也。徐君仲可明習國聞。乃發故書短記。理而董之。輯爲清稗類鈔。凡三百萬餘言。分別部居。爲類九十有二。事以類分。類以年次。爲力勤矣。夫春秋張三世之義。曰所見。曰所聞。曰所傳聞。君爲此書。無媿斯指。吾知欲周知有清一代之掌故者。當必加以諷籀。目爲鴻寶。昔朱竹垞氏亟稱沈景倩野獲編。謂其事有左證。論無偏黨。明代野史。蔑有過之。此則君輯著之本懷。吾敢揭櫟以爲告於當世者也。

中華民國六年六月紹興諸宗元貞壯撰

# 清稗類鈔序

稗史紀錄瑣細之事者也。漢書注如淳曰。王者欲知閭巷風俗。故立稗官。使稱說之。因謂其所記載者曰稗史。清順康間。金沙潘長吉有宋稗類鈔之輯。蓋參仿宋劉義慶世說新語。明何良俊語林而作。足以補正史。資談助。不佞讀而善之。因思有清入主中原。亦越二百六十有八載矣。朝野佚聞。更僕難數。嘗於披閱書報之暇。從賢豪長者游。習聞掌故。益以友好錄畧之稿。偶一瀏覽。時或與書報相合。過而存之。亦衛正叔之遺意也。正叔名湜。宋人。嘗集禮記諸家傳注爲書。曰集說。其言有曰。他人作書。惟恐不出諸己。某作書。惟恐不出諸人。且以當世名碩之好稗官家言也。欲就而與之商榷。輒筆之於冊。以備遺忘。積久盈篋。乃參仿宋稗類鈔之例。輯爲是編。而名之曰清稗類鈔。雖皆掇拾以成。而剪裁鏘鑄。要亦具有微指。典制名物。亦略有考證。其中事以類分。類以年次。則以便臨文參考。摺摭徵引之用也。惟載筆之難。學者所歎。明胡應麟記誦淹博。所著少室山房筆叢。尙不免時有牴牾。陳堦著日涉編。按日紀故事。間以古詩繫



於下。六月二十三日下有宋張耒夜泊林里港詩云。淅淅曉風起。孤舟愁思生。蓬窗一瑩過。葦岸數蛩鳴。老大畏爲客。風波難計程。家人夜深語。應念客猶征。而七月二十三日下亦載之。清紀文達之博洽。並世無兩。而灤陽續錄所載介野園宗伯之詩。爲鸚鵡新班宴仰園摧頽老鶴也。乘軒龍津橋上黃金榜。四見門生作狀元。四句實爲金吏部尙書張大節作。第有五字不同。殆誤收金人詩爲近人耳。孫星衍考訂金石之詳贍。爲世所稱。而寰宇訪碑錄校釋碑文。重至一再。旣列之於唐。又列之於宋。甚或新拓本年。月旣泐而舊拓本尙存。旣據舊拓本按年月以編入。又據新拓本以附之於無年月類。凡若此者。賢哲不免。每一念及。滋益兢兢。雖嘗就正於當世名碩。且有勤敏好學之吳縣湯頤瑣寶榮丹徒懷獻侯桂琛龍南徐伯英時閩侯林漚生震嘉興高晴川紫霞蕭山姚赭生宗舜諸君子。匡我不逮。爲之檢校數過。然猶未敢自信也。博雅君子。其亦有以教之乎。

中華民國五年十二月杭縣徐珂仲可述於上海寓廬之天蘇閣

# 凡例

一紀載之事。以有清一代順治至宣統爲斷。間有上溯天命天聰崇德者。而又述及隆裕后之崩。則以其有率宣統帝遜位之讓德也。

一本書九十二類。凡一萬三千五百餘條。四千餘頁。綜計之。約三百萬餘言。

一本書標舉二字爲類。曰時令。曰氣候。曰地理。城寨道路橋梁皆附焉曰名勝。曰宮苑。曰

第宅。曰園林。曰祠廟。附陵墓曰帝德。曰恩遇。曰巡幸。曰宮闈。曰朝貢。曰外藩。曰

闈寺。曰外交。曰禮制。曰度支。曰屯漕。曰教育。曰考試。曰兵刑。曰戰事。曰武略。

曰獄訟。曰吏治。曰爵秩。曰幕僚。曰薦舉。曰知遇。曰隱逸。曰諫諍。曰箴規。曰讖

諷。曰詼諧。曰種族。曰宗教。曰婚姻。曰門閥。曰姓名。附字號曰稱謂。曰風俗。曰方

言。曰農商。曰工藝。曰孝友。曰忠盡。曰敬信。曰義俠。曰技勇。曰正直。曰貞烈。曰

謙謹。曰廉儉。曰狷介。曰豪侈。曰才辯。曰明智。曰雅量。曰異稟。曰容止。曰情感。

曰疾病。曰喪祭。曰師友。曰會黨。曰著述。曰性理。曰經術。曰文學。曰藝術。曰鑒

賞。曰方伎。曰迷信。曰方外。曰賭博。曰音樂。曰戲劇。曰優伶。曰娼妓。曰胥役。曰

奴婢。曰盜賊。曰棍騙。曰乞丐。曰動物。曰植物。曰鑛物。曰物品。曰舟車。曰服飾。曰飲食。

一本書事以類分。類以年次。如一人身歷數朝而其事有散見各類者如生於康熙卒於乾隆是也餘可類推然總類之

中。又有可分數類者。例如謙謹一類。析而爲二。則先謙後謹。而以謙謹皆備者列於謙之前。藝術一類。析而爲四。則一書二畫三醫四奕。而以書畫皆備者列於書之前。且各以年代次之。他類有相同者。悉視此。若性質相近之各條。或亦有時連類而及。以博其趣。

一本書資料。以平時隨筆自行札記之事。分隸各類。或從家藏秘笈。搜采而得。故與近今流傳之本。微有不同。而說部報章。亦在參考之列。惟以凡所援引。秦半貫串而成。未能悉記來歷。故間有仍其口脛者。如本朝國朝國初王師大兵等字是也。

一說部報章之所載。亦有輾轉稗販而得者。其中事實。或且傳聞異辭。如於朝野見重之人而述其一二遺行。社會不齒之人而紀其一二嘉言。今所以兼

搜並採者。實有春秋責備賢者及勸善懲惡之意。寓於其中。非僅以廣異聞已也。

一本書之分類。雖亦力求精確。然頗有一條兼涉數事。一事可隸數類者。亦惟從其較重者入之。而亦或彼此互見。於篇幅較長之條。牽連及之。

一凡所紀載。固不敢以考證精詳自詡。要以具有本末者爲多。

一姓名字號。固亦務求畫一。而以其爲世所習知。因而錯綜互見者。亦有之。

一我國歷代紀年皆用干支。因附清代歷朝干支年號表。以便檢查。若於徵引之原文。則仍其舊。

# 清稗類鈔總目

時令類  
氣候類  
地理類  
名勝類  
宮苑類  
第宅類  
園林類  
祠廟類  
帝德類  
恩遇類  
巡幸類  
宮闈類  
朝貢類  
外藩類

闍寺類  
外交類

禮制類

度支類

屯漕類

教育類

考試類

兵刑類

戰事類

武略類

獄訟類

吏治類

爵秩類

幕僚類

薦舉類

知遇類

隱逸類

諫諍類

箴規類

譏諷類

談諧類

種族類

宗教類

婚姻類

門閥類

姓名類

稱謂類

風俗類

方言類

農商類

工藝類

孝友類

清稗類鈔

總目

商務印書館印行



忠盡類 敬信類 義俠類 技勇類 正直類 貞烈類 謙謹類 廉儉類 狷介類 豪侈類 才辯類 明智類 雅量類 異稟類 容止類 情感類

疾病類 喪祭類 師友類 會黨類 著述類 性理類 經術類 文學類 藝術類 鑒賞類 方伎類 迷信類 方外類 賭博類 音樂類 戲劇類

優伶類 娼妓類 胥役類 奴婢類 盜賊類 棍騙類 乞丐類 動物類 植物類 礦物類 物品類 舟車類 服飾類 飲食類

附錄

清代歷朝干支年號表

# 清稗類鈔

## 時令類目錄

太宗用大統法以推時憲

世祖頒新法時憲書

世祖聖祖命以西法推時憲

聖祖授時廢西洋新法

聖祖授時改回回法

聖祖仍用西法以推時

聖祖以康熙永年表授時

聖祖御定七政四餘萬年書以授時

高宗御定萬年書以授時

進曆頒曆

御用時憲書

卑州不奉正朔

春分秋分之祭

宮中五祀

每月薦新

頁

善月惡月

京師逛廟日期

滿洲歲時紀略

西藏歲時紀略

宮禁之歲暮新年

歲暮新春之打莽式

孝欽后宮中之歲暮新年

除夕元旦之風景

黃陂之歲暮新年

宮廷新年玩具

立春日打春

立春日之春色

庚子西安行宮之立春

元旦立春

元旦上元曲宴宗室

祭堂子

辛丑西安行宮之元旦

都人之元旦

九 九

一一

一一

一六

一七

一七

一一

一一

一一

一一

一一

一一

一一

一一

一一

一一

一一

青海蒙番之元旦

三〇 浴佛節之緣豆

三六

正月初二祭財神

三〇 端午龍舟

三七

正月初五爲破五

三〇 孝欽后宮中之端午

三七

正月之順星散燈花

三〇 京師端午

三八

上元驚蟄

三一 五月二十三日分龍兵

三八

上元調將

三一 展端陽

三八

上元放和合

三一 七月喇嘛放頭會

三九

上元延臣宴

三二 七月初三日祓齋

三九

康熙兩上元盛典

三二 宮廷七夕

三九

孝欽后上元撒金屑

三三 廣州七夕

四〇

辛丑西安行宮之上元

三三 陳煒卿七夕詩

四〇

正月開印

三四 中秋泥塑兔神

四〇

正月送子

三四 中秋後迷童子

四〇

二月朔之太陽糕

三四 八月二十六日爲宮中節日

四一

二月二日龍抬頭

三五 京師九月九

四一

孝欽后宮中之花朝

三五 展重陽

四一

吳興尙黃明

三六 十月朔

四二

禪房送春

三六 大內之十一月十二月年事

四二

十一月月當頭

冬至郊天

冬至胙肉納於懷

冬至慶賀

九九銷寒

十二月封印

十二月打窳

祀窳唱訪賢曲

庚子西安行宮之除夕

四三

四三

四三

四三

四四

四四

四四

四五

四五

# 清稗類鈔

杭縣 徐珂 仲可

## 時令類

### 太宗用大統法以推時憲

崇德丁丑十月朔。太宗以漢文曆書頒行滿洲蒙古。初用大統法也。大統法創於明卽元之授時本。西域扎瑪里鼎所撰而郭守敬等參改者也。

### 世祖頒新法時憲書

順治甲申七月。禮部言欽天監改用新法。推註已成。請易名頒行。睿親王曰。宜名時憲。藉昭朝廷憲天乂民至意。湯若望言。敬授民時。全以節氣交宮與太陽出入晝夜時刻爲重。若節氣之時日不真。則太陽出入晝夜刻分俱謬矣。大統回回舊法所用節氣。專泥一方。且北直之節氣。春分秋分。前後俱差一二日。况諸方乎。新法之推太陽出入地平環也。則有此晝而彼夜。此入而彼出之理。舊法以一處而概諸方。故日月多應食而不食。當食而失推。五星當疾而反遲。應



伏而反見。差訛難以枚舉。今以臣局新法所有諸方節氣及太陽出入晝夜時刻。俱照道里遠近推算。請刊列時憲書。從之。至是告成。頒行。

世祖聖祖命以西法推時憲

推步之術。遞改遞密。世祖定鼎燕京。考驗西法最善。卽用以推時憲。順治甲申十月朔。頒乙酉時憲書。用西洋新法。以太宗天聰二年戊辰天正冬至爲法元。定周天三百六十度。度法六十分。每日九十六刻。

康熙初。習大統回法者咸舐排之。聖祖博訪廷臣。屢命會同測驗。惟西法所推。一一符合。於是交相讓能焉。自御纂數理諸書。折衷指歸。闡晰奧窔。而渾圓橢圓之旨。歲里差之說。旣不悖於古。而有驗於今。西法之善彌顯。其日躔月離。恆星經緯諸表。俱以實測爲憑。隨時修改。故占候無違。而協紀授時。益用精密。

聖祖授時廢西洋新法

康熙乙巳三月。徽州府新安衛官生楊光先進摘謬論選擇議各一篇。言湯若

望新法十謬及選擇不用正五行之誤。下議政王大臣等集議。將湯若望及所屬各員。罷黜治罪。於是廢西洋新法。用大統舊法。

### 聖祖授時改回回法

康熙戊申八月。聖祖以舊法不密。用回回法。時欽天監監副吳明烜疏言。現用舊法。不無差謬。與五官正戈繼文等所進書暨回回科七政書三本。互有不同。宜令四科詳加校正。以求至精。下禮部議。尋議五官正戈繼文等推算七政金水二星差誤。監副吳明烜之七政書。與天象相近。理應頒行。主簿陳聿新推算己酉年時憲。已頒各省。止於本年暫用。其七政經緯躔度。月五星凌犯等書。及日月交食。自康熙庚戌以後。俱交吳明烜推算。從之。

### 聖祖仍用西法以推時

康熙己酉三月。復用西洋新法。先是。戊申十一月。命大臣傳集西洋人與監官質辯。至午門。測驗正午日景。西洋人南懷仁言。監副吳明烜所造康熙己酉七政時憲。閏十二月。應是康熙庚戌正月。又有一年兩春分兩秋分之誤。命大學

士圖海李蔚等赴觀象臺測驗。己酉正月丁酉。是日立春。南懷仁預推午正太陽。依象限儀。在地平上三十三度四十二分。依紀限儀。離天頂正南五十六度十八分。依黃道經緯儀。在黃道線正中。在冬至後四十五度零六分。在春分前四十四度五十四分。依赤道經緯儀。在冬至後四十七度三十四分。在春分前四十二度二十六分。在赤道南十六度二十一分。依天體儀。於立春度分所立直表。則表對太陽而全無影。依地平儀。所立八尺有五寸表。則太陽之影。長一丈三尺七寸四分五釐。於是六儀並測。一一符合。圖海等言測驗。南懷仁所指皆然。吳明烜所指不實。應將康熙庚戌時憲。交南懷仁推算。得旨。前時議政王大臣。以楊光先何處爲是。議行。湯若望何處爲非。議廢。及今日議復之故。向馬祐楊光先吳明烜問明再議。尋議傳問監正馬祐等所指。皆合天象。每日百刻。雖前代行之已久。但南懷仁推算九十六刻之法。既合。應將九十六刻推行。又南懷仁言羅喉計都月孛星。係推算所用。其紫炁星無象。不關推算。應自康熙庚戌始。將紫炁星不入七政書。至候氣係古法。現今推算。亦無用處。俱應停止。

從之。三月。南懷仁言雨水爲正月中氣。吳明烜於康熙己酉十二月置閏。是月二十九日值雨水。卽爲康熙庚戌之正月置閏。當在庚戌二月。從之。

### 聖祖以康熙永年表授時

康熙戊午八月。預推七政交食表告成。掌欽天監事南懷仁接推湯若望所推法。爲書三十二卷。名曰康熙永年表。

### 聖祖御定七政四餘萬年書以授時

康熙戊戌四月。御定七政四餘萬年書告成。始順治甲申至康熙辛丑。按排列節氣日時日月五星交宮入宿度分。自後準式續增。

### 高宗御定萬年書以授時

乾隆辛酉十二月。御定萬年書告成。始天命九年下元甲子。按年排列節氣時刻。冠以前代三元甲子編年。自黃帝上元甲子始。

### 進曆頒曆

欽天監歲有定期。進呈次年曆樣。十一月初一日頒曆於百官。其進呈御用者。

有上位曆。七政曆。月令曆。又上吉日十二紙。每月粘一紙於宮門。御賜諸王有中曆。各布政司。則皆禮部所頒。欽天監印造曆。遍及民間。無欽天監印者。為偽造。律處斬。

御用時憲書

御用時憲書寫本。名曰上書。首頁節氣。次頁年神方位。三頁六十花甲子。四頁六合。末二頁紀年。與頒行本同。每日於五行下注明陰陽。於除危後添注寶義。專制伐五字。蓋五行生尅之謂也。上生下為寶。如甲午木生火。下生上為義。如辛丑土生金。上下同宮為專。如戊戌同屬土。上尅下為制。如庚寅金尅木。下尅上為伐。如壬辰土尅水之類。其義不過陰陽剛柔之理耳。於用事宜忌無關。每日但注吉神。不注惡煞。每日宜忌及款式。俱與頒行本不同。因列其式於左。

上弦 某時 某刻

角

吉神  
歲德月德母倉天德  
月恩四相時易兵吉

宜祭祀祈福求嗣上冊進表章頒詔覃恩肆赦  
施恩封拜詔命公卿招賢舉正直施恩惠恤

生氣不將續世明堂  
益後青龍天赦三合  
兵福要安五合官日

孤寡布政事行惠愛雪冤枉緩刑獄慶賜賞  
賀宴會入舉行幸遣使上官赴任臨政親民



|          |   |   |
|----------|---|---|
| 某某日甲子水陽開 | 玉宇吉期兵寶守日<br>天巫福德六儀金堂<br>金匱天恩誠德合月德合                            | 結婚姻納采問名嫁娶搬移解除沐浴裁製<br>營建宮室繕城郭興造動土豎柱上梁開市                            |
| 義        | 相日三合天醫天馬<br>寶光臨日敬安普護<br>五富大喜時德駟馬<br>天后時陽福生聖心<br>陰神司命候<br>東風解凍 | 納財立券交易修置產室開渠穿井安確磴<br>栽種牧養納畜整容剃頭整手足甲求醫療<br>病帶舍宇平治道塗行幸進人口經絡捕捉<br>針刺 |

書高一尺二寸。寬約七寸。每四頁爲一月。分四層。寫陰陽字。用朱書。吉神一層。全用朱書。每日推其所應有之吉神。注之。五日注候。半月注氣。一月注節。節氣候三字朱書。某節某氣亦朱書。墨注某時某刻。其某候則墨書。如其日應注日出日入時刻。則朱書於吉神之後。分作兩行。又墨書書若干刻。夜若干刻。於日出日入之後。分作兩行。若是日應書躔及某將。亦注於吉神之後。朱書。此日二字下。云某時某刻日躔某某在某宮。爲某月將。某月將三字復朱書。其每日所宜宜字朱書。其宜用何時。亦雙行注於下。與頒行本同。但朱書耳。其日不宜者。亦注明不宜某某。不宜字則墨書矣。但其日注宜。則不注不宜。注不宜。則不注

宜。宜與不宜。不同日注也。遇上下弦。則書於上格。日辰之右。朱書上弦及下弦二字。墨注時刻。遇日干與皇上景命同者。則亦朱書。

卑州不奉正朔

雍正丁未。曹亮疇權知浙江安吉州事。某年冬。藩司發下時憲書數百本。令散賣。繳價。禮房吏慮其難售。議弗受。擬稿詳覆。呈上判行。中有卑州僻在山陬。從來不奉正朔云云。亮疇大駭。呼入責之。不任咎。

春分秋分之祭

春分前後。京師之官中祠廟。皆有大臣致祭。世家大族亦於是日致祭宗祠。秋分亦然。

宮中五祀

宮中五祀。每歲正月。祭司戶之神於宮門外道左。南向。四月。祭司竈之神於大內大庖前中道。南向。六月。祭中霤之神於文樓前。西向。七月。祭司門之神於午門前西角樓。東向。十月。祭司井之神於大內大庖井前。南向。中霤門二祀。太常

寺掌之。戶竈井三祀。內務府掌之。而每歲十二月二十三日。皇帝又自於宮中祀竈以爲常。

每月薦新

奉先殿每月薦新。仍沿明制。而列聖秋獮木蘭。凡親射之鹿獐。必驛傳至京。薦新於奉先殿。

善月惡月

京師諺曰。善正月。惡五月。

京師遊廟日期

京都各廟。輒有市集。百貨充盈。游人紛沓。俗謂之遊廟。遊也。遊廟有定期。京師廣寧門外財神廟。廟貌巍煥。報賽最盛。每歲正月初二日。九月十七日亦然傾城往

祀。商賈妓女尤夥。廟祝更神其說。謂借神前紙錠懷歸。俟得財。當十倍以酬神。故皆趨之若鶩也。初三日。看旃檀寺打鬼。自初一日至十五日。游大鐘寺。十九日。游白雲觀。觀元之長春宮也。爲城外巨刹。花木甚多。俗稱正月十九日爲燕

九亦稱闌九。又稱會神仙。前數日。游人已多。而奄人夥。以元代邱長春乃自宮者也。二十日。看雍和宮打鬼。三月初三日。游蟠桃宮。十五日至二十八日。游東岳廟。清明。游南城城隍廟厲壇。四月初一日。游西山。亦名妙高峯山有天仙聖母廟。同治間。孝欽后曾爲穆宗祈痘於此。先期預詔廟祝。必俟宮中進香後。始行開廟。謂之頭香。初一日至十五日。藍靛廠廣仁宮進香。遊西直門外萬壽寺。二十八日。遊北頂。北方多山廟。必在山極頂。連類而及。故謂廟亦曰頂。五月初一日至十五日。遊南頂。卽碧霞門外。舊有九龍岡。環植桃柳。南鄰草橋河。是日。遊人輒就河上葦棚小飲。且有歌者侑酒。初一日至初五日。遊崇文門外臥佛寺。初一日至初十日。遊都城隍廟。十三日。十里河關帝廟進香。遊月壇外瓜市。至立秋止。六月初一日。草橋中頂進香。初六日。觀善果寺暎經會。二十四日。關帝廟賽會。七月十五日。城隍廟赦孤。釣魚臺看河燈。各寺燒法船。觀阜城門內荷花燈市。兒童點蒿燈。荷葉燈。八月初三日。遊崇文門外窺君廟。九月初九日。遊法藏寺。登塔。齊化門外土城登高。十月初一日。遊城隍廟厲壇。

滿洲歲時紀略

上元夜。好事者輒唱秧歌。唱者以三四童子扮婦女。別有三四人扮參軍。各持尺許兩圓木。憂擊相對舞。有一持傘燈賣膏藥者前導。以鑼鼓和之。舞畢乃歌。歌畢更舞。達旦始已。

正月十六日。婦女步平沙。曰走百病。或連袂打滾。曰脫晦氣。入夜尤多。

正二月內。有女之家。多架木打鞦韆。曰打油干。

十月。少年臂鷹走狗。遂捕禽獸。名打圍。按定旗分。不論平原山谷。圈占一處。曰圍場。無論人數多寡。必分兩翼。由遠而近。漸次相逼。曰合圍。或日一合再合。所得禽獸。必餉戚友。

西藏歲時紀略

西番不識天干。以地支紀年。亦以十二月爲一歲。

歲首。商民停市三日。互以茶酒果食爲禮。

元旦。達賴喇嘛設宴於布達拉。延漢番官員會飲。選幼童十餘人。作跳鉞斧戲。



初二日會飲如元日。以數十丈皮繩繫於布達拉山。童女猱升而上。以木板護胸。手足四舒。如矢離弦。應聲而下。

初三日有翻杆之戲。於諦穆佛寺前立一高杆。自鳴鑼鼓。唱歌曲。而上下於高杆。其輕捷不讓獼猴。

自初六日至二十一日。於拉薩宮殿爲大布施。是日甘丹、別蚌、色拉、桑蔦、四大寺及各處喇嘛悉來誦經。其在內者曰內招。在外者曰外招。衆跏趺坐於地。行列整肅。內招日得三餐。或數人與以銀錢一枚。外招則半。時或散給衣帽布疋木碗。出入之喇嘛。不下十餘萬。布施之費。大抵爲蒙古及各方信徒所捐助者。若無施主。達賴自捨之。其費歲需數十萬金。

十八日集唐古忒步騎兵三千。戎裝而執械。繞大昭三匝。至琉璃橋南。發巨礮驅鬼。礮大小不一。最大者鑄於唐時。鑄有威勦除叛逆五字。演畢。出金銀綉緞布茶勞之。各寺喇嘛集於大招。擁達賴下山。謁佛登臺。講大乘經。謂之放朝。土民越數千里而來者。踵相接。以金珠寶玩陳列炫奇。舉首跪而獻之。達賴達賴

受之。以麈尾拂其首。或以手摩其頂三度。其人必自誇得活佛之降福。上元日。懸燈於大招。立木架數層。設大燈萬餘盞。綴五色油麵。麵作人物龍蛇鳥獸狀。自夜達旦。視天之陰晴雨雪。及燈焰之晦明。以占年歲豐歉。

二十四日。有揚武之式。卽觀兵也。是日。達賴坐寶殿之側樓。駐藏辦事大臣坐於正樓。同閱之。文武諸官皆衣禮服。集樓下。兵皆戎衣。所騎之馬。亦鐵葉甲。露兩眼。手持金爐。中一人操大鈴。兩旁列喇嘛六十餘。擊大鼓。持大鐃銀笳者。各四人。各色旗旛數十對。持之者。皆白袍白帽。次則魔像。喇嘛抬之。次有童子五十人。從行。皆作鬼裝。次有護法神者。披白袍鎧。盛插鷄毛。口流涎沫。爲癡愚狀。若有憑附之者。送至市外。番兵放銃焚草而始畢事。

二十五日。爲競馬競走之戲。其距離凡二里餘。馬皆駿逸。十餘歲之童騎之。舉動活潑。揚鞭疾驅。按其先後。以判勝負。勝者。達賴賞以綉緞手帕。而首至之馬。例當獻於達賴。達賴償以五十金。供此役者。家免一年差役。競走亦如競馬。遠近大小不一。賞亦從同。捷足者先得之。

二月二十九日。送瘟神。又名打牛魔王。相傳西藏爲瘟神託足之地。達賴坐牀。乃始逐之。故歷年預雇一人。扮瘟神。向番官商民斂錢。可得千金。自大招逐出。卽起解。營官護送。悉以王爺稱之。解至山南。安置之於桑葉寺石洞。洞在寺之大殿旁。幽深而寒慄。體健者。年餘輒死。然瘟神入洞數日。卽潛回。不至喪命。是日。大招前之官兵。均如揚武狀。一人扮達賴喇嘛。與瘟神先後至招。旛幟不一。色。擊鼓吹笛。亦如前狀。有花衣黑帽者十數人。帽各插鬼頭。衣之前後。悉繡鬼形。在招前跳舞誦經。扮達賴者。鋪墊坐招前。與一戴鬼頭之法師對坐。須臾。瘟神出。面塗黑白。與達賴相詰難。詞屈。復擲骰以賭勝負。達賴之骰。以象牙爲之。面面皆六。三擲皆虛。瘟神之骰。以木爲之。面面皆梟。三擲皆梟。負而色赧。意欲別鬪法術。達賴與法師及揭諦神明斥其非。瘟神負隅不行。卽遣五雷逐之。衆喇嘛誦經送至河下。焚草堆如前。

三月初一日。挂大佛亮寶於布達拉山上。凡各寶玩及御賜物件。均陳於大招。喇嘛分列成行。衣繡花袈裟。扮種種神鬼。餘執旗旛寶品。自大招徐行上山。達

賴坐樓前黃繖下。俯視漢番各官。均在盛寶房前向北支帳房游觀。男婦闐咽。山坡無隙地。有綉畫大佛像。懸於山上第五層樓。垂至山麓。約長三十餘丈。中有達賴袈裟一襲。乃歷代相傳之物。以珍珠綴成。珠之大者如指。

四月十五日。有龍王塘大會。廟在水中央。須以舟渡。內多神像。正殿旁有一大祕戲像焉。卽歡喜佛是也。喇嘛指爲佛公佛母。四壁所畫。亦皆此式。

五月十五日。有工布塘蠻家大會。噶布倫之柳林。附近數處。以此爲最勝。綠陰滿地。藏江之水映帶左右。樓臺亭榭。可憩遊人。是日也。婦女臨水祓濯。歌飲竟日。

六月初七日。唱蠻戲。以後藏之娃爲之。喬裝男女。頭戴紙扇面兩枚。手執竹弓一。以跳舞。所唱爲唐公主時事。噶布倫家各唱一二日。大會親朋。日耗數百金。三十日。別蚌寺及色拉寺掛大佛。亦裝神鬼。男女皆豔服。或唱或歌。爲翻杆子。跌打各種跳舞。

七月十五日。別以故牒一人司農事。其地頭目牒巴。伴之游市郊。佩弓挾矢。導

以旂旛射飲一日。慶豐年也。

七月十三日至八月五日。人攜天幕至河岸。招邀戚友。浴於河。男女皆有之。俗謂可除疾病也。

七月二十五日。爲宗喀巴成聖之日。各寺窗戶牆壁間。皆燃燈。觀其燈焰之色。以下歲之吉凶。

十月十五日。爲唐文成公主誕辰。士女盛妝參賀。比戶皆飲酒。

十二月二十九日。木鹿寺有跳神逐鬼戲。喇嘛飾各種神佛鬼怪。薄暮至大招。放銃吶喊。謂以驅逐邪鬼。遊觀之男女。皆盛服聚歌。飲醉而歸。

### 宮禁之歲暮新年

乾清宮每歲封寶後。工部內府進燈竿二。盤龍楠木柱。高與宮檐齊。上銜五色八角圓燈。樹於東西墀中。

封寶日。宮中駕幸之所。以爆竹前導。

臘日。內廷翰林題椒屏進上。謂之椒屏歲祝。皆桃符遺製也。

封寶前一日。例進門聯。

立春日。南齋翰林進春帖子詞三章。五言一首。七言二首。用硬黃矮紙小摺細書。拜筆墨牋紙之賜。

御筆福字。賜近臣。舊例也。道光初年。加賜壽字。

新正二日。重華宮茶宴。聯句。

### 歲暮新春之打莽式

歲暮將祭享。選內大臣打莽式。例演習於禮曹。其氣象發揚蹈厲。蓋公廷萬舞之變態也。王公貴戚於新正競引之。以相戲樂。其態婉變柔媚。或令婦女爲之。此又莽式之一變耳。

### 孝欽后宮中之歲暮新年

孝欽后命宮人清理年事。輒以十二月十三日始。妃嬪各有所司。如洗佛像。易幔帳之類是也。餘令太監爲之。事畢。孝欽開辭歲名單。列名之人。得預於辭歲。孝欽命製新衣。賞妃嬪。妃嬪平日所衣。爲灰鼠裘。年終則賞白狐。

新年供神之餅餌。皆妃嬪所親製者。孝欽必先製一方以爲之倡。製糕有專室。太監預以米粉白糖酵。和爲團。製法與饅首略同。蒸之。卽墳起。宮中以此卜各人之年運。

二十三日。裝各種乾鮮果碟。上插長青枝。陳之神前。宮眷皆隨孝欽入廚。以糖果置玻璃碟。陳竈神前。

二十四日。孝欽寫福壽字。爲新年賞賜京外王大臣者。紙色有紅黃淡綠之別。書久而倦。則命人代之。

年終。各省督撫進呈貢物。孝欽一一審視。擇所愛者留置左右。餘皆度之於庫。某年。直隸總督進黃緞衣一襲。以珍寶綴成大牡丹花。葉以翡翠製之。光彩奪目。孝欽大喜。元旦曾一衣之。兩廣總督所進。爲珍珠四囊。囊各數千粒。大小如一。光色相同。妃嬪進手巾香皂。以孝欽極愛妝飾也。太監宮女進餅餌。禮物既多。陳列數屋皆滿。必俟孝欽有命。始可移動。

祀竈節前後。孝欽卽命停止召見。

除夕之晨。孝欽徧禮神佛。祖宗禮畢。入宮者絡繹不絕。計有孝欽之嗣女固倫公主。醇王恭王慶王之福晉。洵濤二貝勒之夫人。又有非近支而先世得有封號者。及滿洲大員之妻女。既見孝欽。退至他室休息。午後二時。咸集於殿。以次序立。由皇后率領行禮。卽辭歲也。禮畢。各賞紅緞平金荷包一個。中裝小銀鏤一錠。以押歲。

除夕奏樂。達旦始已。孝欽召集來賓。擲骰爲戲。宮眷各得犒銀。多者銀二百元。孝欽坐久而倦。乃以銀元擲之地。宮眷欲博其歡也。盡力奪之。夜半。陳炭於銅盤。熾以取暖。盤以銅爲之。置房中。內燃板炭。孝欽取松枝少許。投之盤。宮眷亦各折小枝及大塊松香以入之。頃刻。滿室氤氳。蓋取吉祥之意也。是時宮眷或裹餃。剝蓮實。以充元旦之食品。蓋元旦不食飯也。

天將明。孝欽略睡。及醒。宮眷進食品數盤。分盛蘋果青果蓮子。蘋果者。取其平安。青果者。取其長青。孝欽受之。以汝等平安之吉語爲答。梳洗畢。羣向之賀年。次及於德宗隆裕后。



宮眷無事。侍孝欽觀劇。晚戲既畢。則命太監奏樂。孝欽自唱。宮眷和之。又命太監唱。不成聲者。衆皆笑。孝欽顧而樂之。惟德宗訖無笑容。一日。宮眷德菱詢以何故不樂。德宗但以英語之。祝新年佳勝一語爲答。

正月初二日之晨。孝欽上殿禮財神。宮眷亦隨叩。

新年五日。宮眷日侍孝欽博。

初十日爲隆裕后萬壽。是日禮節略與德宗萬壽禮同。宮眷先遞如意。繼叩頭。隆裕立而受之。蓋以宮眷皆隨侍孝欽。故示謙也。向例。帝后妃不同食。惟萬壽日則會餐。孝欽命宮眷二人至德宗宮。承候設席。食時。不及在孝欽宮中之肅靜。宮眷在側。可談話。食酒肴。坐席之始。妃斟酒。奉德宗隆裕。席終。宮眷復命。衆知孝欽派往。不過監視之意。故亦無可報告也。

十五日爲燈節。夜懸各燈。或如鳥獸。或如花果。悉以白紗製之。上加彩繪。有一燈爲龍形。約長十五尺。支以十竿。太監十人執之。又一監在前。執一燈球。取龍戲珠之意。各處音樂齊奏。燈光月色。交相輝映。並放花炮。以夜間露重。則有木

屋。可移動。孝欽率宮眷坐於中。觀之。放數小時。夾以鞭炮。此夜乃新年之結局也。次日。來賓皆出宮。

### 除夕元旦之風景

除夕元旦風景。凡繁盛處所。大略相同。除夕之日。街市商店交易。輒至天明。游者採辦年貨者。至是更擁擠。及夜。寺廟之禮神者。車馬往來。幾弗能過。而乞丐之集於道旁者尤夥。至買賣之盛者。爲香燭店。年畫鋪。風箏紙鳶店。玩物攤。其他如茶食店。廣貨鋪。雜貨鋪。茶葉店。首飾店。典質鋪。人亦擁擠。惟戲園。則先數日而已。輟演。時至中夜。多爆竹聲。蓋比戶已迎竈君下界矣。

元旦。雖極繁盛之街衢。皆閉門息業。惟見有婦女進香於寺廟。游行於通衢而已。午後。則茶館戲園游人甚多。

### 黃陂之歲暮新年

黃陂居民。以十二月二十四日爲小除夕。凡耕具織具。均置空室。祀送竈神。至除夕之日。老幼男女。五鼓卽起梳洗。手持香至祖墓。名曰標山。請祖先回家度

歲喫年飯。或家有新喪者。其戚友於是日。必攜香燭冥鏹。叩靈辭歲。至夕。接竈出行。卽行拜年禮。首爲天地君親師。次祖先。次父母。拜畢。燃爆竹。開門上廟。初一日謁宗族。初二日謁舅氏。初三日謁外舅外姑。年前有新喪者。孝子白袍墨套。冠無緯空梁冠。以有服兄弟二人衣白袍者作陪。至戚族家叩首謝孝。曰管新靈。

宮廷新年玩具

宣宗之孝全后。爲承恩公頤齡女。幼時隨宦蘇州。明慧冠時。曾仿世俗所謂乞巧板者。斲木片若干方。排成六合同春四字。以爲宮中新年玩具。

立春日打春

立春日。迎春東郊。省城府城由知府主政。縣城由縣令主政。先期。禮房吏呈紅單。開列禮節。前一日。將事各官。咸朝服乘顯轎。列全副儀仗出東門。行迎春禮。且或借優伶冠服。招雇貧人乞丐。令衣之以隨行。時東郭外之壇廟中。供設紙紮之勾芒神。卽俗呼太歲者。又土牛紙牛各一。土牛之製。以板凳一條。塗以爛

泥。裹以蘆蓆而已。紙牛。則依欽天監所頒。以五色紙紮成。空其中。實以五穀。卽翼日各官所鞭打者也。官蒞壇廟。先祭。一跪三叩首。乃迎神與牛以歸。立春旣屆。各官又朝服將事。重行祭禮。禮畢。各執絲鞭打牛。五穀紛墮於地。則謂豐登有兆。相率稱賀而散。

### 立春日之春色

迎春之典。各省惟府縣官衣朝服。坐顯轎。陳設儀仗。萬民傘。德政牌。行城中一周而已。廣州則由商店斂貲。雇妓或小家女子。之有姿首者。扮演故事。坐方榻。以二人舁之。隨官輿後。遊城市。謂之春色。次日。又舁往各官署乞賞。所費亦不貲。

### 庚子西安行宮之立春

光緒庚子十二月立春。先一日迎春。祀勾芒神。京都舊例。是日。應由順天府進春牛。及春山寶座。庚子雖在行在。亦與順天無異。特選畫工。依欽天監頒行之式。寫春牛圖進呈。而順天府亦寫圖由驛馳至。同於是日呈進。

立春日。宮中以大盤二。各盛生蘿蔔二條。鏤字爲聯。分呈兩宮。謂之咬春。內監有善鏤字者。刻畫甚精。沿明制也。

### 元旦立春

諺云。百年難遇歲朝春。青浦諸聯於乾隆壬辰辛亥。嘉慶庚午。三遇之。

### 元旦上元開宴宗室

嘉慶以前。每歲元旦。及上元日。欽點皇子皇孫及近支王貝勒公。曲宴於乾清宮及奉三無私殿。皆用高椅盛饌。每二人一席。賦詩飲酒。行家人禮。

### 祭堂子

京諺有三不開。堂子祭典其一也。順治甲申。建堂子於長安左門外玉河橋東。祭神殿五間。南嚮。上覆黃琉璃瓦。前爲拜天圓殿。八面櫺扇北嚮。東南土神殿三間。南嚮。卽古之國社也。所以祀土穀而諸神禱焉。中植神杆。以爲社主。諸王亦皆有陪祭之位。神杆爲大社。惟松東社惟柏之制。光緒庚子之變。八國聯軍入京師。爲日本人圈入使館界內。殿宇皆廢。僅餘視牲亭。上蓋黃琉璃瓦。風剝

雨瀝頹敗不堪矣。

或謂堂子之神曰武篤。本貝子。或曰非也。乃明將軍劉綎。劉以勇聞天下。死之日。口齧一卒。腸挾二卒。足踐二卒。見者猶慄慄也。定鼎後。劉屢在宮中作祟。故太祖設堂子之祭以禳之。劉爲明桂王部下大將。所部嘗持鹿角。遇敵則布爲方陣。雖有萬馬不能前矣。太祖以計擒之。劉至死猶揮刀殺數十人。太祖遙望見之。詫爲天神下降。或曰此爲明之鄧將軍。鄧嘗隸烏帥毛文龍部下。善戰。沒而有靈。立廟島上。太祖起兵時。戰急甚危。禱之顯靈。脫於難。立廟遼陽。每祭必先之。元日亦先必謁廟。射奠致敬。否則宮中時時爲厲。或曰將軍爲明之有功將帥。戰沒海上者也。然明將之死於遼事。無鄧將軍其人者。萬曆間征朝鮮。副將鄧子龍。數有功。戰死海上。豈其神邪。或曰開國初。太祖常微服至遼東。以覘形勢。爲邏者所疑。子龍知非常人。陰送出境。太祖篤於舊誼。遂禱祀於社。以祀之。

堂子牆外。松柏成林。滿人欲請神杆者。具呈禮部。任擇其一。仍以穉者補之。

祭堂子時。皇太后在慈寧宮。親令妃嬪煮肉以進。祭畢。撤賜諸大學士。邸抄所載某某謝賞神肉恩是也。

旗員亦祭堂子。祭畢。家人席地而坐。拔刀切肉。大肆飲啖。所謂喫跳神肉是也。間亦餽送朋友。然非莫逆者不能得。

至其典禮。則每歲正月初一日。皇帝率王公滿洲一品文武各官。詣堂子。行拜天禮。前期十二月二十六日。內務府官詣坤寧宮請神。送往堂子。至除夕。內務府派員於圓殿內焚舊紙錢。欽派總管大臣一人。率諸王長史或一等護衛於圓殿內掛新紙錢。總管大臣於殿內高案下所立杉柱上掛紙錢二十七張。諸王長史護衛等依次各掛紙錢二十七張。初二日奉神還宮。

正月初三日。每月初一日。司俎官一人。司俎一人。於堂子圓殿內高案下杉柱上掛紙錢二十七張。陳時食一盤醴酒一盞於案。別設小案。陳椀二。一實酒。一虛設。司香。上香。奏三弦琵琶之內監二人。坐於圓殿外角路。西東嚮。鳴拍板。拍掌。之守堂子人。坐於東西嚮。司俎官立於圓殿外階下之東。司祝進跪。司香授

蓋。司祝接蓋。獻酒。司俎官贊鳴拍板。卽奏三絃琵琶。鳴拍板拊掌。舉蓋以獻。凡六獻。每獻。司俎官贊歌鄂囉囉。守堂子人歌鄂囉囉。獻畢。以蓋授司香。司祝一叩興。合掌致敬。司俎官贊停拍板。三絃琵琶拍板暫止。司香授神刀。司祝接神刀。進。司俎官贊鳴拍板。卽奏三絃琵琶。鳴拍板拊掌。司祝一叩興。司俎官贊歌鄂囉囉。衆歌鄂囉囉。司祝擊神刀。禱祝時。則歌鄂囉囉。誦神歌。祝禱三次。如前儀。如是九次畢。司祝一叩興後。禱祝三次。以神刀授司香。司俎官贊停拍板。三絃琵琶拍板皆止。司祝跪祝。一叩興。合掌致敬。退所供酒食。給守堂子人。春秋立杆大祭。豫於延慶州山。取徑五寸長二丈之松。梢留枝葉九節。製爲神杆。立於園殿前石上。懸神旛。掛楮園殿杉柱。亦掛楮。司祝於兩處擊神刀。誦神歌。致祝如儀。

每歲四月初八日佛誕前期。內務府於堂子饗殿中間。懸掛神幔。於覺羅妻內。擬定正副贊禮二人。卽司祝屆時。由坤寧宮恭請佛亭。並貯菩薩關帝神像二本。筒昇送於堂子。至時。奉神位於祭神殿。謹將大內所備紅蜜及諸王所備之蜜。



各取多許貯黃瓷浴池內。以淨水攪勻。司香啓亭門。司祝請佛於黃瓷浴池內浴畢。後以新棉墊座安奉亭中。仍請入宮。

坤寧宮廣九楹。內西大坑供朝祭神位。北坑供夕祭神位。朝夕則祭。皆設香碟淨水並糕。朝則司祝擊神刀誦神歌。三絃琵琶和之。以致祝。遂進牲。夕則司祝束腰鈴。執手鼓。躡步誦神歌。以禱。鼓拍板和之。亦進牲。撤香竈燈火。展背燈。青幕衆退出。闔戶。司祝振鈴誦歌四次。致禱。乃捲幕開戶。明燈撤內貯像。朝祭神爲釋迦牟尼佛。觀世音菩薩。關聖帝君。夕祭神爲穆哩罕神。畫像神。蒙古神而祝辭所稱。乃有阿琿年錫安泰阿雅喇穆哩穆哩哈納丹岱琿納爾琿軒初恩都哩僧固拜滿章京納丹延瑚哩恩都蒙鄂樂喀屯諾延。諸號中惟納丹岱琿爲七星之祀。喀屯諾延卽蒙古神。以先世有德而祀。其餘均無可考。正月初二日。每月初一日。月祭儀略同。月祭之翼日。卸神杆。斜仰倚柱上。乃祭天灑米致祝。解牲頸骨及膽。陳熟肉並米貯於杆之斗。乃立杆。

四季獻神。上駟院白馬二。慶豐司牛二。廣儲庫金銀緞布多件。由乾清右門至

坤寧宮陳之。奉金銀緞布等。至朝祭夕祭。神前祝如儀。以馬牛出三日。乃留銀備牲。金緞布馬牛交犧牲所。

又背燈祭。有四時獻鮮之禮。春雞。夏鵝。秋魚。冬雉。凡皇城內風雲雷雨廟之祀。以及各祀廟之歲供。皆內務府掌之。大內祭所用薩滿衣。衣庫掌之。又掛柳枝求福之神。稱爲佛多鄂謨錫瑪。瑪者。祈福則祭。爲保嬰而已。

### 辛丑西安行宮之元旦

光緒辛丑。孝欽后德宗在西安行在。元旦。百官朝賀。德宗御前殿正坐。王公班在階上。樞臣及各部院。一品者在階下。侍郎以下各官皆在二門外。

### 都人之元旦

京語謂元旦爲初一。屆日。於子初。焚香接神。燃爆竹以致敬。接神後。王公百官入朝朝賀。復謁親友。謂之道新喜。親者登堂。疏者投刺而已。是日。無論貧富貴賤。皆以白麵作角而食之。謂之煮餠餠。富貴之家。潛以金銀小鏢及寶石等。藏之餠餠中。以下順利。食得之者。終歲大吉。又陳几於庭。上列素葷乾果之

屬名天地桌。或五日或半月而徹。內城比戶如是。殆卽遼金拜天禮歟。

青海蒙番之元旦

元旦賀年。俗尙紅。染硃紅於牲畜之背。縱放山巔。客至其帳。主人以紅布覆客騎。延之入。男婦鮮衣持哈達。以次接見。然見其人。必視其牲畜禮也。馬駝牛羊。則用紅布結球以投之。每羣一球。帳前有犬。則獨投一球。

正月初二祭財神

正月初二日。京外致祭財神。燃放鞭炮。晝夜不休。商店尤盛。

正月初五爲破五

正月初五日。京師謂之破五。破五之內。不得以生米爲炊。婦女不得出門。至初六日。則王妃公主及命婦。冠輅往來。互相道賀。亦於是日歸寧。而闈園諸商。亦漸次開市矣。

正月之願星散燈花

正月初八日黃昏之後。京師居人。以紙蘸油。燃燈一百有八盞。焚香而祀之。謂

之順星。十三日至十六日，由堂輿以至大門，燃燈而照之。謂之散燈花。又謂之散小人，亦辟除不祥之意也。

### 上元驚蟄

歸安閔峙庭中丞鶚元九歲時。其外舅毛尙書於元宵宴客。閔以舊姻與焉。毛作對。闕客曰。元宵不見客。點幾盞燈爲河山生色。是日適屆驚蟄。閔對曰。驚蟄未聞雷。擊三搗鼓。代天地宣威。

### 上元調將

嘉道以前。京師每遇上元節。五城各設燈棚。寶馬香車。極承平歲華之麗。是夕三鼓後。步軍統領於正陽門城上。以燈繩曳取城外武營官名帖。謂之調將。

### 上元放和合

嘉道以前。圓明園正月十五日放和合例也。和合卽煙火盒子。大架高懸。一盒三層。一層爲天下太平四大字。二層爲鴿雀無數羣飛。取放生之意。三層爲四小兒擊秧鼓唱秧歌。唱太平天子朝元日五色雲車駕六龍一首。

上元廷臣宴

嘉慶以前每歲上元後一日。欽點大學士九卿之有勳勩者宴於奉三無私殿。名廷臣宴如曲宴宗室禮。蒙古王公皆預焉。

康熙兩上元盛典

康熙壬戌元夕前一日。聖祖饗羣臣於乾清宮。作昇旁嘉宴詩。人各一句。七字同韻。仿柏梁體。上首唱曰。麗日和風被萬方。以次而及滿大學士勒德洪明珠。皆拜辭不能。上爲代二句曰。卿雲爛漫彌紫閣。一堂喜起歌明良。且戲曰。二卿當各酌一觴以酬朕勞。勒洪果捧觴叩首謝。次日。頒御製序一首。乙丑元夕。聖祖命於南海子大放燈火。使臣民縱觀。仿大酺之意。先於行殿外治場里許。周植棧木。而絡以紅繩。中建四棚。懸火箱其中。平樹八杆。卽八旗也。旗人認旗色分駐。而當前四綠旗。則漢人所駐之地。官民老穉男婦。皆許進觀。初設鹵簿。及駕奉兩宮從。永定門赴行殿。諸王羣臣次第至。賜官廚肴饌。人酒三甌。能飲者不計。於是徹仗張燈。有宮眷五十人出。皆虹裳霓衣。被以雜綵。人擔兩燈。各踞

方位高低盤舞若星芒撒天。珠光燐海。真異觀也。既則火發於筭。以五爲耦。耦具五花。掄升遞進。乃舉巨礮三。火線層層。由下而上。其四箱套數。若珠簾。焰塔。葡萄。蜂蝶。雷電車鞭。川奔軸裂。不一而足。又既則九石之燈。中藏小燈萬。一聲迸散。則萬燈齊明。流蘇葩瑤。紛綸四重。箱中鼓吹並起。箏鞞簫篳。次第作響。火械所及。節奏隨之。霹靂數聲。煙飛雲散。最後一箱。有四小兒從火中相搏墜地。礮聲連發。別有四小兒衣花襦袴。杖鼓拍版。作秧歌小隊。穿星戴焰。破箱而出。翕倏變幻。難以舉似。然後徐關廣場。有所謂萬國樂春臺者。象四征九伐。萬國咸賓之狀。紛綸揮霍。極盡震炫而後已。次日校獵。聖祖親御弓矢。九發皆中。於是詔進百戲。都盧尋橦。拍張殼觥。畢陳於前。羣臣從觀者皆有詩。

### 孝欽后上元撒金屑

孝欽后嘗於元夕取金葉屑二升。臨高撒之。飄揚可觀。謂之金屑滿天飛。屑墮宮人頭額。謂之金花點額。凡受點者。皆得賜食。

### 辛丑西安行宮之上元

光緒辛丑。孝欽后德宗在西安。西安元夜燈火最盛。兩宮以年歲荒歉。宵旰憂勞。不許民間放燈。宮中惟以紙糊數燈。懸於門楣。至十六夜後。卽命撤之。

### 正月開印

官署開印之期。必於正月十九二十二十一日之內。由欽天監選擇吉日吉時。先行知照。朝服行禮。開印之後。則照常辦事矣。

### 正月送子

淮安有送子之俗。恆在元宵後。二月初二日前。凡老年無子。及成婚多年而未育者。戚友咸送以紙糊之小紅燈。間有用磚代者。此磚須取自東門外之麒麟橋堍。否則無效。蓋取麒麟送子意也。由送者先期擇日。備柬通知受者之家。臨時約集十餘人。鼓樂大作。持燈或磚送往。受者則遠迓門外。以所送之燈或磚懸於望子者之床中。並以酒筵款待送者。他日得子。則有重酬。

### 二月朔之太陽糕

二月朔。京師市人以米麪團成小餅。五枚一層。上貫以寸餘小雞。謂之太陽糕。

都人祭日者買而供之。三五具不等。

### 二月二日龍抬頭

二月二日。古之中和節也。都人呼爲龍抬頭。有食餅者。謂之龍鱗餅。有食麪者。謂之龍鬚麪。婦女亦停止針線。意恐傷龍目也。

### 孝欽后宮中之花朝

二月十二日爲花朝。孝欽后至頤和園。觀翦綵。時有太監預備黃紅各綢。由宮眷翦之成條。條約闊二寸。長三尺。孝欽自取紅黃者各一。繫於牡丹花。宮眷太監。則取紅者繫各樹。於是滿園皆紅綢飛揚。而宮眷亦盛服往來。五光十色。宛似穿花蛺蝶。繫畢。卽侍孝欽觀劇。演花神慶壽事。樹爲男仙。花爲女仙。凡扮某樹某花之神者。衣卽肖其色。而製之。扮荷花仙子者。衣粉紅綢衫。以肖荷花。外加綠綢短衫。以肖荷葉。餘仿此。布景爲山林。四周山石圍繞。石中有洞。洞有持酒尊之小仙無數。小仙者。卽各小花。如金銀花石榴花是也。久之。羣仙聚飲。飲畢而歌。絲竹侑酒。聲極柔曼。最後。有虹自天而降。落於山石。羣仙跨之。虹復騰



起。上升於天。

吳興尙黃明

浙江吳興風俗。清明後一日。謂之黃明。鮑西岡鈔令吳興日。有詩曰。喜見柔桑開雀口。清明明日又黃明。又曰。冷風疏雨過黃明。

禪房送春

青浦城西南眞靜禪寺。水木清華。花竹掩映。勝境也。道光某年。陳東橋潘溢塘顧培眞莊茶村蔡得硯於立夏前一日。至寺。作餞春會。寺僧若愚脫塵亦與焉。酒酣。蔡成送春詩。情緒悽愴。合座爲之不歡。脫塵援筆和之。有自此春心更寂寥句。陳曰。阿師得大解脫矣。

浴佛節之緣豆

四月初八日爲浴佛節。宮中煮青豆。分賜宮女內監。及內廷大臣。謂之喫緣豆。以爲有緣者。方得啖之也。光緒間。駐京各使眷屬。訂期四月初九日。覲見孝欽后於寧壽宮。外部侍郎聯芳奉派爲翻譯。先一日入宮。察看布置之是否合法。

是日適爲浴佛節。孝欽與諸宮女方作投瓊之戲。大啖緣豆。聯芳趨經宮外。低首疾馳。孝欽遙望見之。大聲呼其名。聯驚而趨入。賜以緣豆一小碟。聯就階下跪啖。叩首謝恩而退。

### 端午龍舟

乾隆初。高宗於端午日。命內侍習競渡於福海。畫船簫鼓。飛龍鷁首。絡繹於波浪間。頗有江鄉競渡之意。召近侍王公同觀。仁宗親政。亦屢循舊制。後以雨澤愆期。輒命罷演。

### 孝欽后宮中之端午

自五月初一日起。軍機大臣尙書侍郎以及近支宗室妃嬪太監。均獻孝欽后以禮物。開列黃紙禮單。進呈。中以洋貨爲多。太監輒以大盒盛之而入。孝欽留洋貨而已。

初三日。爲全宮獻禮期。均盛以黃盒。置大院中。隆裕后進自製之鞋及手巾荷包。陳設第一排。妃嬪宮眷所獻種類甚多。

初四日爲孝欽回賞之期。視獻物之厚薄以答之。若宮眷則人各一衣。銀數百兩。

初五日。大內演劇。所演爲屈原沈江故事。而宮眷所躡之履。則如小兒之虎頭鞋。且簪綢製之小虎於冠。孝欽所命也。王公福晉亦皆入宮賀節。

### 京師端午

京師謂端午爲五月節。初五日爲五月單五。蓋端字之轉音也。端午以前。世家大族。皆以粽相餽貽。副以櫻桃桑椹。葶薺桃杏。及五毒餅玫瑰餅。其供佛祀先者。則以粽櫻桃桑椹爲正供。亦薦其時食之義也。

### 五月二十三日分龍兵

京師謂五月二十三日爲分龍兵。蓋五月以後。大雨時行。隔轍有雨。故須將龍兵分之也。

### 展端陽

青浦朱香涇有月寧侯水神廟。每年端午將屆。衙署胥役輒斂貲賽會。迎其入

城。備物齋之。水中賽龍舟。且有飾成鳳形虎形之船。船中有臺閣。有鞦韆。自初一至初五。無日不然。某年閏五月。好事者又爲展端陽之舉。復迓神入城。張燈演劇。士女填咽。蓋道光以前事也。

### 七月喇嘛放頭會

蒙人奉達賴喇嘛爲神明。每年七月中。有放頭會。與孟蘭勝會水陸勝會略同。入會男女。必輸金錢。多者達賴爲之摩頂。或以木槌擊之。雖膚肉墳起。大如鷄卵。不敢言痛。且引爲慶幸。謂是年萬事如意。可免災害。且藉以稱雄於閭里焉。

### 七月初三日祓齋

七月初三至八月初三。爲回教祓齋之期。俗曰過年。期內日僅一餐。蓋日夜誦經持戒。直至中夜而始一食。七月杪。各家懸燈結彩。以誌慶賀。

### 宮廷七夕

七夕。宮中設果桌。祭牛女。皇后親行拜祭禮。其神牌曰牽牛河鼓天貴星君。天孫織女福德星君。孝欽后嘗命以盆盛水。置日光中。取小針數枚投之。針浮水

面。則觀盆底影。以驗人性之巧拙。

### 廣州七夕

七月初七日。牛郎會織女之佳期也。廣州人尤重視之。凡家有閨女者。必拜七夕。所費頗不資。以物品陳設多者爲貴。任人遊覽。

### 陳煒卿七夕詩

餘杭女史陳煒卿。名爾士。爲嘉興給事中錢儀吉之婦。嘗賦七夕詩。命意最高。詩云。梧桐金井露華秋。瓜果聊因節物酬。卻語中庭小兒女。人間何事可干求。

### 中秋泥塑兔神

中秋日。京師以泥塑兔神。兔面人身。面貼金泥。身施彩繪。巨者高三四尺。值近萬錢。貴家巨室多購歸。以香花餅果供養之。禁中亦然。

### 中秋後迷童子

廣州有迷童子之俗。多行於中秋節後之數夕。以其時月明如晝也。其法。先擇一童子。令合眼危坐。作法者乃先燒符一度。其咒語極簡令數人手持香火。向童子

前後畫圈搖拂。久之。童子卽喃喃自語。衆乃呼曰。師傅至矣。復問曰。師傅喜用  
刀耶。抑劍耶。問至童子點首。卽爲合意。衆乃以器械授童子。卽能飛揚起舞。若  
有家法。及演畢。童子復臥倒。呼其名。卽醒。或曰。是殆野鬼游神所憑藉也。願精  
於精神學者一研究之。

### 八月二十六日爲宮中節日

八月二十六日爲宮中節日。蓋太祖未入關時。轉戰甚苦。一日糧絕。太祖及軍  
士皆以樹皮充飢。卽是日也。故滿人以爲紀念日。屏除豪華。宮中尤重之。皆不  
食肉。以生菜裹飯而食。亦不用箸。以手代之。孝欽后亦然。蓋專制君主。每以土  
地人民爲私產。欲其子孫追念祖宗創業之艱難也。

### 京師九月九

京師謂重陽爲九月九。屆日。都人士。亂提壺攜榼。出郭登高。南則在天寧寺陶  
然亭。龍爪槐等處。北則在薊門烟樹。清淨化城等處。遠則在西山八剎等處。

### 展重陽

道光某年十月初九日。青浦諸聯招友集橫雲山下。作展重陽會。丹楓烏柏間。清吟淺酌。俗客屏跡。歸舟泊小赤壁。以復遊於赤壁之下七字。分體拈韻。題名石上。拍手曰。此小小燕然銘也。

十月朔

十月朔。南人有名之曰十月朝者。俗又謂之鬼時節。與清明同。有家祭。有墓祭。第非若清明之比。戶皆然耳。京都人民之祭掃也。所焚者。冥鏹之外。尙有以紙翦成之衣。故亦謂爲送寒衣。

大內之十一月十二月年事

十一月初一日。宮中始燒煖炕。設圍爐。舊謂之開爐節。

十二月初八日。爲一大節。俗所謂臘八是也。宮廷極重此節。雍和宮熬臘八粥。則派王公大臣監視。而大員且有拜臘八粥之賜者。又必須以清晨覲見。碰響頭謝恩。二十四日。乾清宮庭中設萬壽燈。八仙望子四架。二十六日。各宮殿掛門神對聯。二十八日。宮中及甬道東西兩廊。設五色羊角燈。

十一月月當頭

十一月十五日爲月當頭之期。小兒女恆徹夜不睡。以俟月之臨階。取影驗之。

冬至郊天

每歲冬至。太常寺預先知照各衙門。皇上親詣圜丘。舉行郊天大祭。前一日。御駕宿齋宮。午夜將事。壇上帟幄皆藍色。執事者衣青衣。王大臣服貂蟒。壇旁有天燈竿三。高十丈。燈高七尺。內可容人。以爲夜間駿奔助祭者之準望。屆期。正陽門列肆懸燈彩。上辛常雩亦如是。附近廟宇。不准鳴鐘擂鼓。亦不准居民施放鞭砲。以昭敬慎。

冬至胙肉納於懷

皇帝祀天圜邱。所受福胙。必納之懷。攜回齋宮。以示祇承天庥帝賚之意。亦以長至令節。北方隆寒。胙肉冰凌堅結。不至沾漬袞衣也。

冬至慶賀

光緒朝。某年冬至。百官慶賀。孝欽后表文一道。其文如下。臣等誠懼誠怵。稽首



頓首。上賀。伏以淑則昭垂。尊養愜萬方之願。繁釐茂介。熾昌開百世之基。欽惟慈禧。端佑康頤。昭豫莊誠。壽恭欽獻。崇熙皇太后陛下。德協坤元。道隆豫順。椒闈式禮。宏燕翼之詒謀。蘭殿敷仁。衍鴻龐而啓運。普天錫慶。薄海臚歡。臣幸際熙朝。欣逢長至。伏願慈暉普蔭。四時和而玉燭長調。壽寓延洪。五福備而金甌永固。臣等無任瞻天仰聖。懽懽之至。謹奉表稱賀以聞。

### 九九銷寒

宣宗御製詞。有亭前垂柳珍重待春風二句。句各九言。言各九畫。其後雙鈎之。裝潢成幅。曰九九銷寒圖。題管城春色四字於其端。南書房翰林日以陰晴風雪注之。自冬至始。日填一畫。凡八十一日而畢事。

### 十二月封印

京師大小官署。例於每年十二月之十九二十二三日之內。由欽天監選擇吉期吉時。照例封印。頒示天下。一體遵行。

### 十二月打窰

十二月禮部舉行打竈典禮。二尙書四侍郎咸升座。堂下盛甲手八人。佩箭上堂。見堂官行禮。與劇中演四郎探母番邦公主見駙馬爺之禮無異。禮畢。侍立左右。又有四人有頂戴者。抬一簸箕置堂上。又有以長篲擊簸箕者。

### 祀竈唱訪賢曲

乾隆一朝。大內祀竈。在坤寧宮行之。室有正炕。設鼓板。后先上至。駕臨坐炕。自擊鼓板。唱訪賢一曲。唱畢。送神。乃還宮。至嘉慶時始罷。

### 庚子西安行宮之除夕

光緒庚子。德宗奉孝欽后西狩。卽於西安度歲。除夕前數日。召行在官員。有內廷差使者。各賜綢緞數端。至除夕。德宗御便服小冠。冠頂綴紅絨結。垂肩黃絲穗。長尺有咫。內監皆服蟒袍。外罩青色半臂。而以藍布裹頭。如營兵。



清稗類鈔

氣候類目錄

- 大沽口氣候
- 宣化氣候之異
- 秦皇島氣候
- 長春氣候
- 洮南氣候
- 寧古塔氣候
- 黑龍江氣候
- 上海大雪
- 甘肅氣候
- 西寧一晝夜備四氣
- 伊犁炎熱
- 雪嶺之寒
- 青海小島氣候
- 永綏氣候
- 廣州氣候

清稗類鈔

氣候類目錄

頁  
 一 一 二 二 二 二 三 三 三 二 二 二 二 一 一 七

閩中冰雪  
 成都氣候  
 川邊氣候  
 金川雪牂  
 西藏氣候  
 雲貴天氣  
 雲南之瘴  
 內蒙氣候

一

稗

二

一 一 九 九 八 八 八 七  
 〇 〇



# 清稗類鈔

杭縣 徐珂 仲可

## 氣候類

### 大沽口氣候

大沽口冬季約有三閱月之冰凍。四月至七月午後四時。潮漲高九尺至十尺。八月晨十時。潮漲高七尺。口外沙線。起落無定。最大汽船不能進口。潮漲則較次者可至塘沽。

### 宣化氣候之異

宣化去京師數百里耳。而氣候截然不同。以居庸關爲之隔也。自岔道至南口。中間所謂關溝。祇四十五里。而關北關南。幾若別有天地。光緒乙酉五月下旬。有人入都。在宣化衣則夾也。過居庸。衣則棉也。出南口而炎蒸漸盛。入都門而搖扇有餘暑矣。迨八月下旬。則寒風凜烈。木葉亂飛。已似冬初光景。曉起登輿。竟有非此不可之勢。前人詩云。馬後桃花馬前雪。出關爭得不回頭。誠非故作。

奇語。蓋可以三秋如此。推之三春也。

### 秦皇島氣候

秦皇島夏季熱度最高。當華氏表八十六度。冬最低在零度。下平均四十餘度。

### 長春氣候

長春卽寬城子。其熱度冬夏均較奉天低五六度。冬至前後封河。二月杪三月初開凍。九月至三月爲雪期。時或下雨。山水最大時。在五六月。漲落甚速。

### 洮南氣候

洮南在長春西北。冬日寒甚。夏日午間之熱。乃或甚於關內。故其地種藝雖晚。而收穫反較關內爲早。雨澤極稀。

### 寧古塔氣候

寧古塔四時皆如冬。北斗在北。較內地微高。月出較早。七月露。露冷而白。如米汁。流露之數日。卽霜。霜則百卉皆萎。八月雪。其常也。一雪地卽凍。至來年三月方釋。五六月如內地。二三月亦復有欲裸裎之時。日昃須入戶矣。春多風。風烈。

常十餘日不能出戶。入夏多雹。雹下則黍苗殞。

### 黑龍江氣候

黑龍江四時皆寒。五月始脫裘。六月晝熱十數日。與京師略同。夜仍不能卻重裘。七月則衣棉矣。立冬後。朔氣砭肌骨。立戶外。呼吸之頃。鬚眉俱冰。出必時以掌溫耳鼻。少懈則鼻準死。耳輪作裂竹聲。痛如割。宣統朝則漸暖。不似前此江水之七月卽冰也。

### 上海大雪

江南地暖。上海居海濱。東鄰日出處。氣候尤和。每歲雪時。大小皆以寸計。咸豐辛酉十二月二十七八等日。大雪至三晝夜。深至四五尺。港斷行舟。路絕人跡。老屋茅舍。率多壓倒。時粵寇分股取川南。歙浦以東。皆爲兵窟。爲雪所阻。遂踞巢不出。於是難民乘機逃者數十萬。其被擄者。日服役。夜閉置樓上。時以雪地無聲。可免傷損。皆從牕中跳遁。因而得脫者。又不知凡幾。

### 甘肅氣候



甘肅氣候。夏日微熱。冬嚴寒。頗具大陸之性。

西寧一晝夜備四氣

西寧氣候。冬日最冷時。可至攝氏寒暑表零下二十度。夏日極熱時。華氏表不及九十度。常衣夾衣。甚或衣棉衣。青海沿邊一帶。每至夏秋。一晝夜而四氣皆備。晨衣棉。及午而易袷衣。午餘仍衣絮。入夜則可披毳裘。某君至柴達木。適在暑夏涼秋時。氣候忽變。其熱度高於西寧。夏時乾燥異常。日中蒸氣如釜。木葉自萎。貼麵餅於牆。曝而能熟。臨時可取食。隔宿則堅硬如石。牛羊肉不曝自乾。可醃爲熟脯。午後必衣紗葛。沙中熱。至不能插足。不就林蔭。易致疾病。牲畜道斃者。一宿卽臭爛。故毒瘴特甚。往往百里無甘泉。必攜革囊木桶。盛清水調麵。煮茶有餘。分飲馬匹。然七月卽雪。雪至必裘。晨起卽融。秋日溫度常較海東爲高。土人云。嚴冬始有積雪。極寒時。河水亦積堅冰。至來春方釋。夏多雹。冰塊大如桃。百卉爲之殞。或有黑霜厚積如氈。則草木皆枯矣。大戈壁在其北部。合黎山之南。當青海安西之交。東自英額池起。西至柴達伊吉河止。南自布隆吉河

起。北至邊界止。東西二百八十里。南北百六十里。面積四萬四千方里。其地質爲最細之沙。中含沙粒。小沙陀高低不一。沙之深雖不逮大漠。而過客鮮有度此者。戈壁之南無大山屏障。常遇暴風。發時塵埃蔽天。晝爲之昏。飛沙盤旋空中。高數十丈。沙邱沙淖。一日數移。每遇風日晴和。沙浪閃爍。則成五色紋。早晚常有雲氣。結爲漠市。城郭宮室。人馬雞犬。歷歷可數。馬頭漸近。則一片荒沙耳。其奇幻與海市蜃樓正同。

### 伊犁炎熱

道光以前。伊犁天氣炎熱。焦鑠千里。人皆避入窖中。至夜始出。

### 雪嶺之寒

青海有雪嶺。其地有漢番僦居焉。天寒不能支。相率遷避。土垣頽圯。不可息處。過客率插帳而居。曉風凜冽。晝日蕭森。夜深霜花簌簌有聲。無敢揭帳。揭則手腫不可握。涕沫凌封鬚鬚。耳鼻麻木。指不敢捻。先用溫水巾覆之。再近圍爐。行人以毡裹首。露二睛。俗名毡胄。戴之立雪中。兩頤猶冷如冰。古人所云積雪沒

脛。堅冰在鬚。猶未盡其狀也。有時風吹帳倒。則爇薪於上風。以禦寒威。而後舉手。否則墮指裂膚。且凍死矣。

青海小島氣候

青海有小島。六月卽雨雪。山之巔常年不消。然又不甚苦寒。夏有裸裎之時。四時多風。風必烈。拔木滾石。近岸至變爲平地。風起聞怪聲。山崩地裂。皆枯樹摧折之聲也。然山中又不甚苦風。以樹木層層遮蔽故耳。

永綏氣候

永綏僻處萬山。罕見人跡。氣候與內地迥殊。每值黑霧濛濃。對面不相見。且春夏霖雨連綿。秋冬霜雪早降。時下冰凌屋溜凍結。自簷至地。其大如椽。謂之冰柱。苗人以木杵撞開。始能出入。城外雖稍平曠。然亦寒居十七。熱居其三。春多寒。仲夏猶時挾纒。立秋日晴。則後二十四日大熱。甚於三伏。是日雨則涼。暖不常。諺云。秋風十八暴。言雨多也。中秋前後。卽衣薄絮。雪深尺許。則迺凍。冬雨。則轟雷。四境山多田少。漢與苗各因山之所宜。占四時之候。以爲種植。故所收多。

雜糧沿邊一帶。人烟稠密。其節序寒煥。稍爲適宜。

### 廣州氣候

廣州天氣。寒煥不時。蓋地近溫帶。冬令不見霜雪。嚴寒之日甚少。惟有時驟寒驟暖耳。十二月間晨起。僅可單衣。午後忽轉北風。卽驟涼矣。六月間。遇西江水漲。或陰雨連朝。則又驟涼矣。每見地方官迎春時。身衣裘。而乃汗出如漿。元旦賀年。竟有持扇者。山陰俞壽羽鶴齡有詩云。昨宵炎熱汗沾巾。今日風寒手欲皴。裘葛四時都在篋。無衣難作嶺南人。光緒壬辰十一月二十八日。忽下雪。次日嚴寒。簷口亦有冰條。木棉樹枯槁。數年始復活。聞道光間亦然。自壬辰以後。則屢有集霰之年。無復如咸同間之和煦矣。

### 閩中冰雪

冰雪爲閩中所罕見。官場習慣。歲暮新正。必衣紫貂及各色狐皮。閩中實不需此。故有用銀鼠石鼠爲衣。以天馬皮出鋒者。亦異狀也。達官貴人新正賀歲。有強御貂裘者。無不汗流浹背矣。

### 成都氣候

古人謂成都常夜雨。又稱漏天。皆言雨水之多也。今則氣候溫和。寒熱適度。晴雨亦均。惟春秋冬三季多陰雨耳。若晴正月可夾衣。二月可單衣。三月則必冷。俗謂之凍桐子花。四月中旬可棉衣。五月或不熱。三伏日之熱亦不至華氏寒暑表百度。而七月上半月之炎熱與六月下半月同。八月初亦有熱至九十度以外者。九月初則多陰雨。俗稱濫九皇。可衣夾棉或呢絨。十月初可衣小毛。無大雪及大冰雹。而降雪時期恆在交春之時。

### 川邊氣候

大相嶺以南多風。輒日中起。至夜中息。雅州氣候與內地略同。清溪較寒。盛夏猶著夾衣。大渡河一帶頗熱。越雋瀘沽西昌等處無盛暑。會理州四時和暖。無盛寒亦無盛暑。沙江一帶自三月起即異常炎熱。然一雨便成秋也。

### 金川雪牆

光緒甲辰八月。李心衡至金川。見控卡一路積雪不斷。四望皓如玉山。初甚驚。

訝後聞陳遊戎大剛言。歷夏日秋陽。照燦漸消。此特至薄時也。若自嚴冬至二三月。密雪層積。高及數丈。壓房屋且不見。乃驚人耳。李曰。駐防汛兵。何以得活耶。疑其言似欺人者。陳曰不然。他日子自知之。後李過懋功。時正月中旬也。初至山巔。一望無垠。輿馬逕度。若不知有城牆卡房也者。夫役等從他途就塘兵烤火。炊茶熟。請小憩。扶掖循路逕曲折入。如行小巷。坐塘房中。見房前雪高倍於屋。巉削似照牆。蓋汛兵日加鋤掃。開闢一線路。始得安作息。通行旅也。夾路雪牆。天光透澈。如琉璃屏障。門關在望。往來行人不絕。惟輿馬不能過。直須屋上行耳。

### 西藏氣候

西藏天氣凝寒。地氣瘠薄。千山雪壓。六月霜飛。石多田少。五穀難成。有粟黍豆菽之產者。僅藏東巴塘彈丸地耳。

### 雲貴天氣

雲南多晴多風。貴州多陰多雨。

### 雲南之瘴

土司地方之氣候。大抵不良。平原之地。尤劣於山嶺。如臨安府屬之十五猛。普洱府屬之十版納。鎮邊廳屬之孟連。上下猛。允猛。角董。順甯府屬之耿馬。猛猛。永昌府屬之孟定。潞江灣。甸登。魯埂。掌。騰衝府屬之芒市。遮放。猛卯。隴川。皆係著名煙瘴。入夏以後。內地之人。莫不視爲畏途。

### 內蒙氣候

內蒙地處高原。距海面自二千尺至六千尺不等。帶山環繞東南。瀚海橫亘西北。水源缺乏。地氣薄弱。早晚甚寒。正午驟熱。正午與早晚有相差四十度者。平時西北風爲多。孟秋卽下雪。白露前後入冬井水亦凍。季春尙以雪充飲料。六月亦有下雪時也。

# 清稗類鈔

地理類目錄 城寨附 道路附 橋梁附

全國環遊紀程

- 自江蘇上海縣至安徽懷寧縣
- 自江西湖口鎮至南昌縣
- 自江西湖口鎮至湖北夏口廳
- 自湖北夏口廳至武昌縣
- 自湖南岳陽縣至湖北宜昌縣
- 自湖北宜昌縣至四川成都縣
- 自四川成都縣至西藏
- 自湖北夏口廳至京師
- 自京師至山西陽曲縣
- 自山西陽曲縣至新疆和闐縣
- 自新疆阿克蘇縣至京師
- 自京師至東三省仍還京師
- 自京師南航連河至浙江鄞縣
- 自浙江鄞縣至福建馬尾

頁

- 一 已墾之土地
- 三 田畝種類
- 四 旗籍田產
- 五 小江南
- 六 無定河
- 六 木蘭
- 八 伊絲谷
- 一一 張家口
- 一四 盛京
- 一五 洮南地勢
- 一九 兀良哈三衛
- 二一 東道
- 二六 發祥之地為建州女真
- 二九 吉林為船廠

自福建馬尾至廣東番禺縣  
自廣東番禺縣經雲南蒙自縣至江蘇  
上海縣

南北之見

三〇  
三四  
三五  
三六  
三七  
三八  
三八  
三八  
三八  
三九  
三九  
四〇  
四〇  
四九  
四九  
四九



聖水渠

五〇

歸化城

五九

黑龍江

五〇

黃河水信

五九

察哈延山

五〇

伊河洛河灤河潤河

六〇

寧古塔

五一

鄭州

六〇

哈湯

五二

邠州

六〇

揚子江

五二

天生墩

六一

瓜洲故城

五三

河套

六一

溧陽改隸鎮江

五三

甘肅少水

六二

丹徒沙田

五三

金滿縣

六二

儀徵改揚子

五四

關西之走路難

六四

上海之昔日

五四

迪化

六四

上海租界之解釋

五四

準噶爾山河

六四

上海租界之沿革

五六

青海

六五

濟南山水天下無

五六

青海戈壁

六七

雞鳴島

五七

青海漢市

六八

小邾子故城

五八

青海柴達木

六九

開通太行北道

五八

青海巴顏喀喇山及諸山脈

七一

望都縣

五九

青海大雪山

七二

青海雪嶺

臺灣渡海開禁

臺灣置郡縣

宋村

茅麓山

長沙

入蜀之路

入蜀有三谷四道

棺材峽

溫泉

川邊番地

寧遠猓夷之區域

康藏衛分三區

西藏

三瞻

察木多

西康

西康之山

七三 騰吉里湖

七三 嶺左地勢

七五 榆林港

七五 粵西異境天關

七五 廣西省城形勝

七六 雲貴山水

七六 滇省水道

七六 壩子

七七 大理下關

七七 雲南土司轄地

七八 猓寨山

七八 臘耳山

七九 月崖

七九 蒙古道路

八三 多倫

八三 庫倫

八四 庫倫佛山

八五 哈薩克

八六

八六

八七

八七

八七

八八

八八

八八

八九

八九

九〇

九〇

九〇

九一

九一

九一

九二

九三

京師城門

九四

上海租界之路

一〇二

正陽門門禁

九五

鐵路橋

一〇二

京師五鎮

九六

蘆溝橋

一〇三

帶衛歸海

九六

船橋

一〇三

古長城

九七

臺灣藤橋

一〇四

萬里長城

九七

成都長春橋

一〇四

蔡元請修築邊牆

九七

溜渡

一〇四

上海縣城沿革

九七

雲南鐵索橋

一〇五

廣州城

九八

貴州盤江之橋

一〇五

臺灣不建城

九九

洛陽之寨

九九

湖南苗寨

九九

達園寨

一〇〇

安娘壩番寨

一〇〇

京師道路

一〇〇

胡同本爲火弄

一〇一

京師八大胡同

一〇一

京師王廣福斜街

一〇二

# 清稗類鈔

杭縣 徐珂 仲可

地理類 城寨附 道路附 橋梁附

## 全國環遊紀程

今欲環遊本國。周歷直隸奉天吉林黑龍江山東河南山西江蘇安徽江西福建浙江湖北湖南陝西甘肅新疆廣東廣西雲南貴州二十二省及蒙古西藏青海等處。汽船汽車而外。所恃以爲交通之具者。人與馬騾所致力之舟車是也。

### 自江蘇上海縣至安徽懷寧縣

吳淞 屬江蘇寶山縣

汽船沿江蘇境

江蘇南北距四百里東西距八百里無高山峻嶺而有揚子江橫貫其中湖之大者曰洪澤曰

太湖

之黃浦江而下。水流浩瀚。東北行三十里。至吳淞口。爲光緒間所闢商

埠。兩岸建礮臺。海口有燈塔。以便船舶夜行。

有鐵道通上海並由蘇州而達江寧

崇明縣 屬江蘇太倉州

既出吳淞口。有島橫扼揚子江。即長

入海之處。曰崇明縣。蓋

江水自上流挾沙至此積滯而成也。長一百八十里。廣五十里。土宜植棉。島民約百萬。

江陰縣

屬江蘇常州府

自吳淞入揚子江。由北口轉西北。經狼山。

屬江蘇通州

以傍岸淤

淺下。椗江心。行客至此皆攜裝刺小艇以渡北岸之通州。其南岸為福山鎮。

屬江

蘇常熟縣

江面寬廣。沙灘深淺不定。少頃西行。至江陰縣稍停。江之南岸有礮臺。設

兵駐守。蓋此為揚子江第一門戶也。江陰以西有圖山。江面至此頗隘。水流峻急。

丹徒縣

屬江蘇鎮江府

自江陰西行。至丹徒下椗。裝卸客貨。約半日之久。地為通

商巨埠。往來揚子江運河間者。必取道於此。故船舶雲集。貿易繁盛。租界臨江。土名銀山。門城東北有焦山。西南有金山。

江寧縣

屬江蘇南京府

越丹徒而南。至江寧。江蘇省會也。商埠曰下關。在神

策門外江岸。明太祖孝陵在朝陽門外。城中有秦淮河。莫愁湖。雨花臺。諸勝。

蕪湖縣

屬安徽太平府

自江寧泝江而上。過采石磯。

屬安徽當塗縣

壁立千仞。最擅形勢。蓋

已入安徽境。安徽界江蘇之西東西距七百餘里南北距九百里西南境多山餘皆平衍揚子江通其南淮水貫其北中有巢湖水廣而淺矣

由此而西經東西梁山水受山東縛江面驟窄礮臺夾江而守至蕪湖地在揚

子江南岸形勢便利為安徽最盛之商埠

懷寧縣安徽安慶府治蕪湖西上至大通鎮屬安徽銅陵縣以客貨裝卸頗繁亦棧泊焉

俄而西行至此地當長江北岸為安徽省會江水三面環城西有衆山高聳地

勢雄壯

鄱陽湖屬江自懷寧派江西行入江西境江西東西距八百里南北距千里三面環山惟省北地勢開展控引

江湖土質肥沃近湖之區尤勝西境非鄒縣有煤礦且有鐵道二百餘里西通湖南醴陵以資轉運東北景德鎮產藥之隆甲於世界過馬當山遙

望小孤山高峯獨聳峭立江心上有小姑廟巍樓傑閣下臨無地江流湍急其

西即湖口內湖外江鎮江水衝擊聲如洪鐘者石鐘山也

自江西湖口鎮至南昌縣

自湖口鎮改乘小汽船南行入鄱陽湖湖長二百七十里廣六十餘里我國大

湖當以此為第二

南昌縣

江西南昌府治

星子縣

江西南康府治

既至鄱陽湖。

見有漁舟無數。知漁利甚

溥也。過星子。則見廬山聳峙於前。山有白鹿洞。

宋儒朱子講學之地

南行至吳城鎮。

屬江西都

縣。小泊。鎮當贛江入湖之處。至此而舟入江矣。冬令水淺。汽船不易駛。由此而

南。至南昌。江西省會也。南昌以南為贛江。水益淺。多灘。禾田兩岸相望。時見古

塔。

自江西湖口鎮至湖北夏口廳

九江縣

江西九江府治

南昌之遊畢。返湖口。復乘汽船上駛。江流迅疾。五十里至

九江。地居揚子江上下遊之中央。商務繁盛。租界在城西。江干一帶。遙望廬山

環互。約數百里。西人率於山上避暑。

黃岡縣

湖北黃州府治

自德化西駛入湖北境。

湖北居揚子江西遊為中原要地東西距千二百里南北距八百里東西

北多山南路平坦江漢交流湖波相屬故水陸運輸最為利便土質腴美農業最豐西境岡嶺縱橫礦產尤盛大冶之鐵夏口之煤皆已開採至武穴小

泊。過富池口。南北岸萬山拱合。上流為田家鎮。形勢險要。自此而蘄州。

湖北黃州府蘄

州治黃石港、黃岡、皆泊舟片時。黃岡城西北之赤壁山。屹立江濱。石壁皆赤色。

東有宋蘇  
軾故居

夏口廳屬湖北漢陽府

舟過黃岡西北行。江流曲折。至夏口。泊焉。地當揚子江北。漢

水東。為京漢鐵道中樞。列肆之長約十里。水陸交便。貿易至盛。英法俄德日皆有租界。汽船至此。將仍泝江而下。以還上海。

### 自湖北夏口廳至武昌縣

武昌湖北武昌府治

自夏口西渡漢水至漢陽。湖北漢陽府治其地有專製鐵板鐵軌

之鐵政局。南渡揚子江為武昌。湖北之省會也。面江而負山。漢陽門上有黃鶴樓。燬於火矣。

岳陽縣湖南岳州府治

自武昌復至夏口。改乘淺水汽船。西南溯江而上。過陸溪

口。三國時周瑜攻曹操之地。亦稱赤壁。

南入荊河口。洞庭湖揚子江會合處也。入湖南境。湖南當

之南東西距九百里。南北距千里。全境多山。嶺其尤著者曰衡山。五嶽中之南嶽也。省北近湖之處多平原。水之大者曰湘江。資澧湘最巨。地質腴厚。產米麻。煙。棉。茶。紙。木材。礦產尤多。煤。南境徭苗雜處。近白。漢口數設鐵道。縱貫本省之地。達於廣東省城。至岳陽。地為湘省門戶。租界在

城北十五里。全省貨物出入。皆由此。城有岳陽樓。俯視洞庭。夙推名勝。



洞庭湖 長沙縣

湖南長沙府府治

洞庭湖在湖南省東北，周九百餘里，爲五湖冠。

多沙洲島嶼。君山尤大。近湖多沮洳之地。沿湖東岸行，入湘江。上溯過湘陰縣。

屬湖南長沙府

附近有汨羅水。

楚屈原懷石自沈於此

南行至長沙。湖南之省會也。據湘江東岸。

民物殷阜。後關爲商埠。

自湖南岳陽縣至湖北宜昌縣

沙市

屬湖北宜昌府府治

由長沙折回岳陽。復乘淺水汽船。溯江上行。西

北至沙市。貿易繁盛。俗稱小漢口。租界在鎮之西。自此而上。江中時有沙礁。舟人駕駛惟謹。至宜昌泊焉。汽船之航路止於此。再上。則江水湍急。數里一灘。改賃民船。乃可上達。楚蜀客貨之轉運。必於宜昌上下。故爲巨埠。

自湖北宜昌縣至四川成都縣

三峽 自宜昌賃民船入川。溯江上行。兩岸石山壁立。煙霧繚繞。非亭午夜分。不見日月。前望衆山。迴環若甕。舟行至近稍一轉折。則豁然又開一境。過西陵峽。黃牛峽。巫峽。崖瀑飛流。破石堆聚。與風水相激。舟行偶不慎。則撞石粉碎。上

行俱賴繹夫拖纜。至極險之灘。客必登岸步行。待舟過灘畢。始復登舟。

奉節縣四川夔州府治。過三峽。至巫山。入四川境。四川東西距二千餘里。南北距千餘里。地多山。雪山及北嶺之

脈周於四境。揚子江流其南。省中鴉礮江岷江嘉陵江烏江諸大川並匯焉。西南境有鹽井火井。西有瞿唐峽。兩崖對峙。中貫

一江。急水迴復。再上有灩澦堆。大石高十丈餘。突出江心。以水之漲落為隱見。

故舟行頗危。至奉節。江山高闊。地勢較平。有諸葛武侯廟。杜甫宅。諸古蹟。城外沙渚有武侯八陣圖遺址。自奉

節而西。江流沸湧。又多石灘。然猶不若巫山瞿峽之奇險也。舟至是。可泊萬縣

城下。

萬縣屬四川夔州府。地處衝要。商務繁盛。自此西上。灘險如前時。過忠州。四川忠州直隸州。州

治有陸贄白居易遺蹟。西南為酆都縣。屬四川忠州。以境有豐水平都山得名。小說家附會鬼山陰洞地獄闍

王之說。至巴縣。泊焉。宜昌巴縣之間。大灘二十一。小灘六十三。水勢湍急。間有

一二淺水汽船輒多阻滯。

巴縣四川重慶府治。川東南埠也。地當嘉陵江大江交會之處。而據其要道。三面

臨水。城就峭壁為之。依山之起伏為高下。城中商肆民居鱗次櫛比。

宜賓縣府四川敘州府治大江自奉節溯江上駛過七門灘大石橫江其數七望之

如門至瀘州四川瀘州直隸州治改賃輕舟則以自此而上江流益狹牽挽愈難也西

行至宜賓泊焉地當岷江大江之匯控扼通衢蓋自出江蘇寶山之吳淞口行

四十餘日入大江大江發源青海初名木里烏蘇江旋東南流改名金沙江以水雜金沙也又曲折東北流會鴉擊江岷江嘉陵漢水諸川

經雲南四川江西安徽江蘇諸省而入於海至此乃止焉

樂山縣府四川嘉定府治成都縣府四川成都府治自宜賓北泝岷江至奉節沿岸多鹽場

火井峨眉縣屬四川嘉定府治境有峨眉山為著名勝境北過眉州四川眉州直隸州治復北行

江山平遠風景如畫至成都三國時蜀漢建都於此有漢司馬相如諸葛武侯故居城外有薛濤井水可造紙土潤而

腴民殷物阜乃四川之省會也

自四川成都縣至西藏

鐵索橋居成都定乘輿入藏之計畫雇馱馬延譯人既定遂遵陸西南行經

邛邛九折坂二十四盤而飛越嶺聳峭盤折勢如螺旋渡瀘水須步行過鐵索

橋橋以巨鐵索九條繙於兩岸長三十餘丈上鋪木板廣九尺餘俯視洪流令

人目眇足弱。河西百餘里。卽康定縣也。

康定縣

四川康定府治。相傳漢諸葛亮征蠻時。曾遣將造箭於此。故一稱打箭爐。

此爲由川入藏之孔道。四圍

皆山。形勢險峻。中有廢湖。敞若平地。有土城。番人聚族而居。多疊石爲礮樓。有大寺。喇嘛數千。內地人頗有往貿易者。川茶藏產。輒以此爲交易之所。

裏化廳

一稱裏塘。 巴安縣

四川巴安府治。 由康定西行。渡鴉礮江。江窄流急。岸有戍兵。

行客皆以皮船

以牛皮縫製。僅載一人一舟子。

運渡。有大雪山。積雪常年不化。至裏化小佳所

遇皆食肉衣皮之番人。惟土司衣冠。尙遵國制。裏化西行五百餘里。至巴安風

土人情與裏化相似。

昌都縣

四川昌都府治。一稱察木多。

自巴安西行。渡金沙江。轉西北。入西藏境。

西藏東西距五千里。

南北距二千里。南境卽喜馬拉雅山。爲世界第一高嶺。西北有葱嶺山。有岷嶺山。皆高峻。而有瀑布。故江河甚多。雅魯藏布江最巨。自西而東貫全藏之境。東南流折入印度。界怒江瀾滄江。皆發源於此。 則見山巔終年積雪。冬夏皆奇寒。沿途多劫賊。土人稱曰

夾壩。商旅皆結隊行。執兵自衛。行一千五百里。始抵昌都。爲前藏門戶。有土城。

番民築礮以居。毗連約數里。坡下建營壘。列市肆。頗有都會氣象。

嘉黎縣

四川嘉黎府府治一稱拉里

自昌都而西。渡瀾滄江。旋經瓦合大雪山。五峯縣瓦

天雪相連。復渡怒江上流。踰朔馬拉山。魯貢拉大雪山。其險峻視瓦合大雪山尤甚。至嘉黎則已距昌都一千五百里。其地爲藏之咽喉。有營寨。地苦寒。積雪多陰晦。

拉薩 自嘉黎西南行。經高山數重。既過鹿馬嶺。則地勢平坦。路旁有溫泉。自

平地石罅中出。氣蒸而沸。濺沫。色如硫黃。經墨竹工卡。有水西流。卽藏河也。至察里。俗傳釋元獎西行自此至印度風景和煦。山川平曠。多逆旅。皮船可徑渡。由此西行。接近

拉薩。已抵中藏地矣。拉薩爲西藏都會。設駐藏大臣於此東西約七八里。南北約三四

里。居民五萬。率爲喇嘛。主教者爲俗稱活佛之達賴喇嘛。兼握政權。居布達拉大寺。寺在高阜之上。環門砌石爲牆。佛座最深密。羣僧侍焉。

甘孜州 自拉薩西行。路平地沃。乘木舟以渡雅魯藏布江。南爲厄木多克池。

中有大島。僧寺壯麗。西南行至甘孜。又南行十餘日。至亞東。其地爲藏南要隘。

南距英屬印度界。僅二百四十餘里。附近有營汛駐守。築邊牆。曰鎮西關。光緒二十

年開為商埠。遊畢仍還甘孜。

日喀則。甘孜西北行二百餘里。至日喀則。即後藏也。左有當多汎。右有朋錯嶺。皆天然要隘。有大寺曰札什倫布。倚山面江。垣宇壯盛。班禪喇嘛居之。其遠近瞻禮受法傳戒者。與前藏布達拉寺相等。惟所屬喇嘛較少。又由日喀則城西南行曲折二千餘里。至聶拉木。為西藏南疆要隘。有道通尼泊爾都城。商賈多由之而入印度。西藏之遊既竣。乃循舊路。沿揚子江而下。仍至漢口。

### 自湖北夏口廳至京師

至是而定北遊京師之計畫。易汽船而為汽車焉。乃自夏口啓程。乘京漢鐵道汽車。至澗口。陂塘相屬。地勢窪下。北經孝感縣。屬湖北漢陽府出武勝關峻嶺重岡。山脈雄厚。車行至此。穴山而過。約十餘里。北入河南境。河南古稱中原。東南西北相距各約千里。地勢西北

多山。東南平衍。黃河橫貫北部。洛河入之。東南有沙河。汝河皆入於淮。近省之地當黃河下流。屢有衝決。民多苦之。至信陽州。屬河南汝寧府過遂

平西平二縣。均屬河南汝寧府鄆城縣。屬河南許州而抵許州。河南許州直隸州地益平曠。與南

方風土迥異。北至新鄭縣。屬河南開封府其西為登封縣。屬河南開封府境有嵩山。五嶽之中

嶽也。高六千尺。周百二十里。三峯最高。中有峻極。東曰太寶。西曰少室。

開封縣。河南開封府治自新鄭北至鄭縣。河南鄭州直隸州州治開封在其東。河南省會也。

地近黃河。屢遭水患。城西二十餘里。為宋故都。有宋宮及長嶽故址。並唐時猶太教所建教堂遺蹟城南

有朱仙鎮。為四大鎮。湖北之漢口。廣東之佛山。江西之景德。及朱仙為四大鎮之一。舊時貿易甚盛。

黃河。鄭州北行四十里。至滎澤縣。屬河南鄭州地濱黃河。黃河發源青海。與長江

之源。僅隔一山脈。東北流過甘肅省。出長城外。作弧背形。復入長城。南流經山

西陝西之間。至潼關。水勢寔盛。折而東向。橫經河南直隸山東三省。而入於海。

河流挾沙。遷徙不定。每一汎至。氾濫數百里。輒成巨災。

汲縣。河南衛輝府治黃河有鐵橋。上鋪軌道。以通汽車。長數百丈。鐵柱深入沙中

渡河行數十里。入汲縣界。旋見城郭壯麗。有衛河環其北。太行山。在河南省西北境。縣互數

千里。山東省在其西。峙其西。出城渡衛河。有比過淇縣。屬河南衛輝府。有殷三仁故里至宜溝驛。

有周子賈故里

安陽縣河南彰德府府治

自宜溝驛北行。經湯陰縣。

河南彰德府有宋岳飛故里祠中樹枝皆南向

北至

安陽曹魏曾都於此

城之西南有山產白石。由東北之臨漳。

屬河南衛輝府有漢曹操銅雀臺故址

而北

渡漳河入直隸境。

白元代建都後明成祖由南京遷都於直隸之順天後因之南北距六千餘里東西距千餘里香山臨海運河北流至天津匯九河之水入於海自北而西羣山重疊有古北口獨石口張家口外制蒙古屹然天府其南湖泊至多有魚米之利惟北境高寒冬令多墮戶以居

高阜

纍纍遙望之有七十二。或曰此曹操疑塚也。北行至磁州。

磁州屬直隸正定府府治

正定縣直隸正定府府治

磁州盛產煤。多陶戶。其地山明水秀。略似江南。

南由此北行。過邯鄲縣。

屬直隸廣平府古趙國所都

經沙河縣。

屬直隸順德府

四望平沙。或積成邱阜。

阜北由邢臺縣直隸順德府府治

而至正定。自正定以西。別築鐵路。達山西之陽曲縣。

山西太原府府治長五百里。

清苑縣直隸保定府府治

自正定北行。過定州。

直隸州州治

其西山嶺蟠曲。為北嶽恆山之支脈。北至清苑。直隸之省會也。商賈雲集。自京而西。至晉秦隴蜀諸省。皆由此。

涿州屬順天府府治出清苑北行。渡易水。道左有碑。記燕太子丹送荊軻入秦事。北至

此。

涿州屬順天府府治

出清苑北行。渡易水。道左有碑。記燕太子丹送荊軻入秦事。北至



涿州。

蜀漢昭烈帝及其將張飛故里

出城渡永濟橋。橋跨拒馬河。長可里許。北過良鄉縣。

屬順天府

經蘆溝橋。其下卽桑乾河。橋左別建鐵橋。汽車行其上。直達京師。穿西便門城

缺處。至正陽門西車站止焉。蓋京漢鐵路。南起漢口。計程二千八百里。至此而

盡。

京師。京師在直隸省。別之曰順天。居白河之西。分內外二城。外城七門。周三

十八里。

有琉璃廠其附近琉璃廠

內城九門。在外城之北。周四十里。皇室在焉。國子監在

城東北隅。中貯石刻經文及周時石鼓。城東南有觀象臺。高十丈。儀器皆備。又

有各國使館。內城之中曰皇城。周三千六百餘丈。皇城之中曰紫禁城。西華門

之西通皇城。南北曰西苑。中分南北中三海。神武門北有景山。煤石所成。頗高

峻。其上有亭臺。

### 自京師至山西陽曲縣

當發軔之始。附乘京漢鐵路汽車。南至正定。小住。旋易正太汽車西行。渡滹沱

河。有漢光武帝麥飯亭。河流迅疾。深淺不常。過獲鹿縣。

屬直隸正定府

而西山徑迴復。

地勢險峻。過井陘縣。屬直隸縣北有山曰井陘。亦太行山脈。其山四面高平。中

下如井。

陽曲縣。井陘以西。為山西境。山西西北跨長城。東界直隸。南接河南。西隣陝西。東西約距六百里。南北約距千餘里。近北地高

山多而少雨。西南俱以汾河為界。中有汾河為本省巨浸。潞河之地平坦腴沃。西過壽陽縣。屬山西至榆次縣。屬山西

北五十里。即陽曲。山西之省會也。西臨汾河。為往來秦隴蜀藏之通道。

### 自山西陽曲縣至新疆和闐縣

臨汾縣。屬山西自陽曲西南行。傍汾水東岸。經徐溝縣。祁縣。均屬山西平遙

縣。屬山西而至於介休縣。屬山西南有縣山。晉介之推隱此沿汾水而南。至靈石縣。屬山西

有古石。高六七尺。非鐵非石。叩之有聲。西南至臨汾縣。

潼關。華山。越臨汾西南行。至侯馬。渡澮河。抵聞喜縣。屬山西西南經永濟

縣。屬山西復沿汾水東岸。南渡黃河。入陝西境。陝西古稱關中。東西距七百餘里。南北距千三百里。唐以

前歷代帝王多建都於此地。勢南北皆山。中央平坦。秦嶺橫互其中。渭水流其北。漢水流其南。黃河自長城外南流而為省之東界。渭水入焉。渭水流域東距黃河

南界秦嶺。北繞長城。萬山中有險仄之徑。可四達。故為西北扼要之區。兩山夾流。黃河自北來。至此折而向東。所

謂河千里而一曲也。至潼關。倚山據河。乃為天險。西至華陰縣。屬陝西其南有華山。即西嶽也。洞壑峯巒。為五嶽之冠。最著者為蓮華峯。峯勢相連。視泰華差小。故名少華。

長安縣

陝西西安府府治

自華陰西行。過華州。

屬陝西同州府

渭南縣

屬陝西西安府

至臨潼縣。

屬陝西

西安府有溫泉。出驪山下。即古華清池也。復西行五十里。抵長安。北環渭水。南屏

終南。頗占形勝。城周四十里。濠廣八丈。木金元舊址明永樂時增修之由東門入。見東北隅尚

有小城周九里。明秦王濠城向西轉南。則唐故宮之遺址。猶有存者。

咸陽縣

屬陝西西安府平涼縣

甘肅平涼府府治自西安西行。渡渭水。北至咸陽。西北行至

邠州。

陝西邠州州直

有大佛寺。穴山為屋。有石像。循涇水西北行。入甘肅境。甘肅邠州州直

部之西北。渭東西距三千六百餘里。南北距二千四百里。氣候甚寒。四月猶或飛雪。地多山嶺。沙磧惟沿黃河兩岸。土壤腴美。黃河之外。有渭河。洧河。水急不便行。

舟至涇州。甘肅涇州州直居秦隴東西之衝。衆山環峙。涇洑分流。一咽喉要塞也。

西北至平涼。西城有崆峒山。

皋蘭縣。甘肅蘭州府府治出平涼而西。踰六盤山。沿途土人。多穴處者。西抵皋蘭。為

甘肅省會居黃河南。爲通西域之咽喉。皋蘭山環城而峙於南。人民漢回雜處。

富庶甲西部。

西寧縣甘肅西寧府府治。出皋蘭城西行。過黃河浮橋。以船爲之。又西行。經碾伯縣。

西寧府屬甘肅。有四望山。道險狹。漢趙充國略定西羌以此爲形勝之地。西至西寧萬山迴合。近接青海。

漢番土產之互市在此。自此而西。踰日月山。卽入青海境。青海古爲西羌有湖曰庫庫淖爾大如海

故名東西距二千里南北距千里地勢甚高東有祁連山山嶺恆積雪巴顏哈喇山麓高出其東之鄂陵札陵二湖約三百里有噶達素老峯者上有池水噴出作金色黃河之源也其西鞏石山則揚子江之源也地氣沍寒人民以蒙古族爲多

張掖縣甘肅甘州府府治。自青海復至西寧。東北行。經大通縣。屬甘肅西寧府。北至永昌。甘肅

肅涼州府。西北行至張掖。西南有祁連山。產木。水草亦美。西行四百里。經肅州。甘肅

直隸州。又西北七十里。至嘉峪關。爲萬里長城極西之端。

哈密廳新設哈密直隸廳。出嘉峪關。道左有天下雄關碑。更西行。沙磧浩浩。已入

大戈壁。其地崇岡疊阜。高澗深溝。有九溝十八阪之目。經安西州。甘肅安西直隸州州治

西北行。山積中。旬日不見草木。水鹵不可飲。必攜食水自隨。至哈密。始入新疆。

境。

新疆為我國極西屏蔽本西域回部官軍征而有之光緒壬午置行省東西距七千里南北距三千里地勢高峻大山東西橫互分為南北兩路南路半

屬戈壁間有沃壤北路土脈較映川之大者北有伊犁河南有塔里木河民業龐雜除漢族外有駐防之滿洲及蒙古纏回各族纏回以布纏頭與內地普

裝飾之回人異又有哈薩克額魯特準噶爾等族而戶口蕃廣必推纏回故稱之曰回疆為新疆之門戶城小而固有渠

一道引而注之產瓜極甘美附近有回城回人居之。

吐魯番廳

甘肅吐魯番直隸廳治

自哈密循南路而西折而北行兩山中以避風戈壁

風戈壁者在山之南綠瓦數千里春夏多怪風

之險經鄯善縣

屬新疆吐魯番廳一稱關展

亦都會也西至吐魯番

再西南行至托克遜自此而西用紅錢西行至焉耆府

一稱焉耆府吐魯番皆有戍兵

阿克蘇縣

新疆溫宿府治

自焉耆西行渡海都河復西行達庫車州

新疆庫車直隸州治

經拜城縣

屬新疆溫宿府

至阿克蘇峭岸如削其上平衍回城依其麓縣城在其西

莎車縣

新疆莎車府治一稱葉爾羌

阿克蘇以西尤荒僻無廛肆西南渡葱嶺大河抵巴

楚州

屬新疆疏勒府

復西南行至莎車為南路大城之一周十餘里城內東南隅有古

塔周約十二三丈中有盤道至頂三十餘丈有市長約十里罪人之流戍新疆

者多居此城。

疏勒縣 新疆疏勒府府治 一稱喀什噶爾 自莎車西北行。經英吉沙爾廳 新疆英吉沙爾直隸廳廳治 有

界牆。回民居南。戍兵居北。西北至疏勒。爲回疆最西大城。城新舊各一。回民居

舊城。新城在其西北。戍兵居之。其地爲西域要津。是以村落繁密。貿易興盛。

和闐州 新疆和闐直隸州州治 自疏勒返莎車。東南行。約六百里。至和闐城。居崑崙山

北麓。有和闐河。克里雅河之灌溉。自和闐南行。可達西藏。惟山路險惡。瘴癘逼  
人。故行旅絕少。

### 自新疆阿克蘇縣至京師

南路之行。旣竣。折回阿克蘇。策馬北行。踰木蘇爾嶺。嶺長百里。堅冰巨石。互結  
而成。間有裂痕。其下無底。登陟必以冰梯。冬夏積雪。無鳥獸草木。徧山惟見馬  
骨。

綏定縣 新疆伊犁府府治 一稱惠遠城 旣踰冰嶺。復經數山。渡伊犁河。卽至綏定。其地山渠

交錯。土膏沃衍。自綏定東行。爲天山北路。東經精河廳 新疆精河直隸廳廳治。形勢險要。

多曠地。又東經烏蘇廳 新疆庫爾喀刺烏蘇直隸廳廳治。水土清腴。東行至綏定縣。城鄉富庶。

流水繞村。風景一如內地。

迪化縣 新疆迪化府治 一稱烏魯木齊

自綏定東南行經昌吉縣 屬新疆 至迪化。新疆省

會也。商業甚盛。富庶甲關外。城西有沙岡。城東南有博克達山。山極高。冰雪積

歲不消。

自迪化東北行。至古城。亦繁盛。有要路。可通蒙古。自此東行。經奇臺縣 屬新疆

地絕戈壁。居天山之陰。上無飛鳥。下無青草。所謂窮八站也。

鎮西廳 新疆鎮西直隸廳 廳治一稱巴里坤

過窮八站東。抵鎮西。亦在天山之陰。城西北有巴

里坤湖 古名蒲類海。後漢寶固追擊呼延王至此

源出天山北麓。西北流。匯為巨浸。天山以北之水

泉。此為最大。繞湖多良田。亦宜畜牧。城東別有城。舊為滿洲兵所居。南通哈密。

北有要道。可達蒙古。

科布多 科布多辦事大臣所轄者為杜爾伯特四旗。輝特二旗。明阿特札哈沁各一旗。阿爾泰山辦事大臣所轄者為新和碩特。新土爾扈特。各一

旗。阿爾泰烏梁海七旗。烏里雅蘇臺 在外蒙古西

自鎮西北行。入蒙古境。蒙古西北接

利亞為大高原。東西距五千三百里。南北距二千七百里。大沙 漠曰戈壁。西入新。水草俱絕。漠南曰內蒙古。漠北曰外蒙古。經札薩克圖

古蒙西部踰巴彥達爾克嶺。西北行抵科布多城。科布多金部之首邑。與其北烏梁海部之

地。並多湖泊。東行千三百里。抵烏里雅蘇臺。西北杭愛山。相傳即古燕然山。漢賈憲勒石紀功之處。

高大際天。東接興安肯特諸山脈。附近川流多發源於此。

庫倫。外蒙古北謝部之東北。買買城。自烏里雅蘇臺東行。至薩伊爾烏蘇。折向北行。至

庫倫。據土拉河之濱。土人多為喇嘛。活佛即居此地。當俄國商路。直北有買賣

城。與俄境恰克圖。僅隔一柵。

張家口。直隸張家口廳。治一稱張家口。居庸關。自庫倫東南行。經車臣汗部。在外蒙古之西。行戈

壁中。而抵四子部落。在內蒙古烏爾察布盟。復東南行。入直隸境。至張家口。是為北入蒙

古。西至山西之要道。東南行六十里。抵宣化。直隸宣化府治。地近邊牆。為直北孔道。

東南行。經土木堡。榆林堡。抵居庸關。巨石危崖。交聳互峙。中有溝澗。夏秋漲而

冬枯。自此東南行。經昌平州。屬順天府。還至京師。

### 自京師至東三省仍還京師

天津縣。直隸天津府治。自京師乘汽車。循京漢鐵路西南行。踰南苑而東。過黃村



楊村。均屬順天有大鐵橋。長里許。沿白河東岸。南抵天津。地為白河運河會合之處。

距海尤近。有各國租界。

塘沽。開平。均屬直隸自天津沿白河東行。為京奉鐵路線。其地盛產鹽。抵

塘沽。汽船進口當水淺時輒於塘沽下旋其外即大沽口。形勢扼要為京津咽喉。口門向有堅固

礮臺。經光緒庚子拳亂而毀平。自塘沽折而東北行。所經者為蘆臺唐山。均屬直隸

唐山有煤礦。開平山海關。在直隸臨榆縣東一名榆關秦皇島等處。自開平東北行。經灤州。屬直隸永

平昌黎縣。屬直隸永平府抵山海關。為長城極東之始。其地亂山高峻。逼臨海岸。關東

北路甚狹。誠要隘也。其南曰秦皇島。突出海中。冬不凍。便於泊舟。故亦開為商

埠。

錦縣。奉天府治營口廳。奉天營口直隸廳出山海關。循京奉鐵路。入奉天境。奉天南北

東西相距各千里。長白山時其東。醫巫闾橫其西。其巨川則西有遼河流域之長。直貫全境。東有鴨綠江。與日本之屬地朝鮮。盡江而守。南部瀕海之地尤多佳港。

嚴冬不冰。東北經寧遠縣。屬奉天而至錦縣。地臨遼東灣。商業頗盛。鐵路自此向東。

隨遼東灣之勢。曲折而南。抵營口。地當遼河入海之左岸。汽船可溯遼河而上。

駛也。

大連灣

旅順

兩地向為俄人租借地。於日據之。

自營口東南行至大石橋。附南滿洲鐵

道。為日本所有。

車至蓋平縣。

屬奉天。

大野無際。迤西為遼東半島。沿途皆日俄戰爭

遺跡。南過熊岳城。有古時烽火臺。至金州廳。屬奉天。其南即大連灣。金州西南

為旅順口。外有黃金饅頭諸山之險。內港廣闊。可泊大隊軍艦。我國原有礮臺

船塢。俄人既租。益運礮築臺。天險人為俱臻其極。故光緒甲辰日俄之役。日軍

猛攻數月。始能克之。

遼陽州

屬奉天。

瀋陽縣

奉天府。治舊為陪京。

自旅順復返蓋平。北至海城縣

屬奉天。

商務繁盛。再北。道旁有溫泉二。過鞍山堡。口俄苦戰之地。北至遼陽。當太子河

南。為至營口旅順朝鮮之要道。東北至瀋陽。奉天省會也。東北有天柱諸山。嵯

峨拱峙。而又西帶遼河。北距渾河焉。

鐵嶺縣

開原縣

均屬奉天。

出瀋陽北門。則西北隆業山。遠望可辨。渡溪越

邱而過懿路驛。

有古城址。

北至鐵嶺。為奉天北路咽喉。自昔遼河水運。皆以其地為

北端。再北則為開原城。商業亦盛。西南隅有塔。作八角形。角置佛像高十五丈。

相傳為唐代所建

開原北通昌圖縣。

奉天昌圖府治

中隔威遠堡門。

長春縣

吉林長春府治一稱寬城子

吉林縣

吉林府治一稱船廠

出開原東北行。泝開原河。經

葉赫站。北渡葉爾蘇河。遼河之源也。北入吉林省境。

吉林古為滿洲地南北距千餘里東西距約倍之山

嶺蟠結大者為長白山。東自寧古塔。西至奉天。諸山皆發脈於此。山嶺有潭。為鴨綠混同。圖們三江之源。混同上游曰松花江。自長白山北流會嫩江。黑龍等江入

海。他若圖們之入胡。詳鴨綠之趨奉天。皆尤著者。

由吉林省會而至長春。其地為伊通河左岸西北直

接內蒙古草地。市肆繁盛。東至吉林。則在松花江左岸。遙望長白山支峯。約略

可見。

琿春廳

屬吉林寧安府

由吉林東行。出入山中。經諸窩集。

俗呼森林為窩集

則落葉積數尺。

礙行路。泉水為之阻滯。至鄂赫穆站。地始平坦。南經敦化縣。

屬吉林寧安府

東南行。涉

川越嶺。即至圖們江岸。與日屬朝鮮夾江相望。至琿春。則我國與俄接界之要

地也。

寧安縣

吉林寧安府治一稱寧古塔

依蘭縣

吉林依蘭府治一稱三姓

自琿春北行。多山谷。越老松

嶺長數十里。北至寧安。其地在瑚爾哈河左岸。自此北行。越東清鐵道。沿瑚爾哈河左岸。道路俱鑿削峻嶺而成。經八站二十餘柵。至依蘭。則其地實臨松花江。

濱江廳 屬吉林雙城府 一稱哈爾濱 呼蘭縣 黑龍江府治 呼蘭府 一稱齊齊哈爾 自依蘭

而西行。過賓縣 吉林賓州府治 以至阿城縣 屬吉林賓州府 一稱阿勒楚 為西北都

會。東清鐵道經之。復乘汽車北行。抵濱江。地為東三省鐵道中樞。故日見繁盛。

北渡松花江。入黑龍江省境。 黑龍江東西距三千一百里。南北距千二百里。與

而入蒙古川之大者。曰黑龍江。源出喀爾喀。集衆流。東入混同江。又有嫩江。源出伊勒古爾山。南流會諸水。入松花江。省城東北有嫩江縣。即舊爾根城。為嫩

江上流要埠。東北隅有愛輝縣。據黑龍江南岸。與俄境劃江為界。漠河有大金礦。產金至盛。 經呼蘭南 有金時五國城。宋徽

附近皆沃壤。西北經蒙古界。而至龍江。為黑龍江省會。當嫩江左岸。分內外二

城。

扶餘縣 吉林新城府治 一稱伯都訥 自龍江沿嫩江南下。經蒙古草地。見東清鐵路自西

北來。直達濱江。沿嫩江一帶。漁戶弋人頗多。江中有小汽船行駛。過三河口江

流浩瀚。復入吉林省境。至新城。城濱松花江岸。商舶醫集。素稱要地。東南行至陶賴洲。復附汽車。渡松花江。至農安縣。屬吉林長春府。西門外有高塔矗立。南行。復至長春。

法庫門

屬奉天

新民縣

奉天新民府治

承德縣

直隸承德府治。承德府屬。熱河。

自長春舍舊路。循邊

牆之西以行。入奉天省境。經懷德。奉化二縣。均屬奉天。至昌圖縣。其南通江口。爲遼河上游要埠。南行。穿法庫門。爲洮洲陸路貿易要道。西南沿遼河行。至新民街市繁盛。自蒙古運進馬匹甚多。欲至瀋陽。則尙有約二小時汽車之行程焉。西南行。經鎮安縣。屬奉天新民府。廣寧縣。屬奉天錦州府。義州。屬奉天錦州府。踰九台門。復入直隸境。至朝陽縣。直隸朝陽府治。又西至承德。自此西行。經灤平縣。屬直隸承德府。入古北口。西南行。經密雲縣。屬順天府。返京師。

自京師南航運河至浙江鄞縣

通州

屬順天府

滄州

屬直隸天津府

出京師。朝陽門。登舟。所過閘壩甚多。東至通州。水陸

之衝要也。順流南下。至河西務。爲京津水陸之咽喉。南過丁字沽。至天津。自此

西南行。泝運河逆流而上。過楊柳青。津南沃壤也。至靜海縣。天津府南有太公

釣臺。過青縣。天津府南至滄州。又南過南皮縣。天津府東光縣。河間府入山東

省境。山東古為齊魯地。東西距千二百里。南北距七百餘里。東部濱海。多山。黃河自

亦稱煙臺。與三省相距海面僅百餘里。其東曰威海衛。租界與英國為其東。東海軍屯戍之所。東南即膠州灣。亦其港也。德國租借之。并築鐵道至濟南。經龍縣。周

村鎮等地。商務亦甚盛。

德州。山東歷城縣。山東沿運河以入山東。首至德州。自此輟車陸行。

過平原縣。山東曠野平曠。榆柳葱蘢。又過齊河縣。山東渡大清橋。其下即

黃河。自此而東。遠山聳翠。皆泰山支脈也。至歷城為山東省會。城中掘地僅尺

許。即見清泉。所謂濟水伏流也。有大明湖。楊柳芙蓉。一望無際。或比之浙江之

西湖。

泰山。孔林。均在山東曲阜縣自歷城至泰安縣。山東則見泰山在其北。即東

嶽也。山多石。石罅有松。少雜樹。其陽汶水西流。其陰黃河東流。最高之峯曰岱

頂。岱頂之東有日觀峯。日出時多奇景。復自泰安南趨。渡汶水。經徂徠。梁父。二

山對峙若門闕。其南平疇沃衍。泗水西流。孔林在泗水南十餘里。松柏森森。有

著草生其下。卽孔子之墓也。其南曲阜縣。屬山東兗州府城內有孔子廟堂。聖裔衍聖

公世守之。曲阜之南爲鄒縣。屬山東兗州府孟子故里也。由鄒縣西行至濟寧州。山東濟寧

直隸州州治復登舟。順運河南下。

清江浦。屬江蘇清河縣淮安縣。屬江蘇淮安府自濟寧東南行數里。一閘貫獨山湖。過微

山湖口入江。蘇省境南至宿遷縣。屬江蘇徐州府爲水陸衝衢。其南有黃河故道。昔河

此入海後改北向故名此曰淤黃河又南至清江浦。蓋南北衝要之大埠也。又南至山陽。有美韓

蹟遺 江都縣。屬江蘇揚州府武進縣。屬江蘇常州府舟經山陽。南過寶應縣。屬江蘇揚州府至高郵

州。屬江蘇揚州府地多湖高郵以南始有田。南至江都。則地當南北水陸之衝。商業稱

盛。又南至瓜洲口。渡揚子江。見金焦二山。南北對峙。過丹徒縣。南至丹陽縣。屬江

蘇鎮江府有練湖之勝。東南至武進。民物豐阜。人稱樂土。

無錫縣。屬江蘇常州府吳縣。屬江蘇蘇州府自丹陽而東。有山。繇延百餘里。至無錫。蓋九

無錫縣。屬江蘇常州府吳縣。屬江蘇蘇州府自丹陽而東。有山。繇延百餘里。至無錫。蓋九

龍山也。南峯曰惠山。山之東曰錫山。登惠山飲石泉。清冽而甘。其南曰陽山。陽山以南。巍然而葱鬱者。靈巖穹窿支硎元墓上方諸山也。靈巖之東。林木陰翳。其高出樹杪而秀者曰虎邱。虎邱而南六七里。至吳縣城。富庶爲江蘇之冠。所關商埠曰青陽地。

太湖在江蘇吳縣嘉興縣浙江嘉興府治自吳縣南行。有寶帶橋橫跨澹臺湖上。其外

即太湖地古號周八百里。中多山。山之大小者曰東西洞庭。南出吳江縣屬江蘇

過八坼平望均屬江蘇吳江縣有鴛鴦湖。南入浙江省境。浙江北爲海。南接福建。西鄰安徽。江西北界江蘇。東西約

距六百里。南北約距八百里。西南多山。東北平坦。由西南而東北。畫爲二域。錢塘江貫其北。甌江流其南。運河自杭州流入江蘇境。其關爲商埠者爲杭鄞永嘉三縣。而杭鄞尤大。

紹興浙江紹興府治鄞浙江寧波府治自杭州浙江杭州府治東渡錢塘江至西興屬浙江蕭山縣

過蕭山縣屬浙江紹興府至紹興。山巖環繞。泉水清甘。地產名酒。由紹興東經餘姚縣。

屬浙江紹興府至鄞爲通商大埠。租界在江北岸。

自浙江鄞縣至福建馬尾



定海縣

直隸 臨海縣 定海縣

自鄞乘汽船東駛抵鎮海縣

寧波府江口甬江入海

處也口外有山巖然曰招寶山傍山右行島嶼萬千島之大者曰舟山周百五

十餘里其南為定海孤懸海外之一島也舟山之東僅三里曰普陀滿山佛寺

僧徒數千山麓有潮音梵音諸洞海水激盪有聲西人至夏季輒往避暑

永嘉縣

浙江溫州府治

三都福建越定海而南環舟有島嶼羅列經三門灣浙海

之佳港也南至溫州灣溯甌江上駛有孤嶼山峭立中流宋高宗營駐此山麓有江心

寺

內祀宋文天祥

租界在南岸自此南駛入福建省境

福建為古閩地東南距九百里南北約距千里東南濱海全境

多山嶺武夷梁山天姥為名勝之最月之大者曰閩江源出南平縣界曲折東南流至福州之五虎門而入於海流急多灘氣候喧暖罕見霜雪民俗勤儉善貿易

多經營於南洋各島至三沙灣灣有小島曰三都周二十里已闢為商埠

### 自福建馬尾至廣東番禹縣

馬尾

福建福州府治

自三都南至閩江口入江上溯至馬尾有船政

局兩岸有礮臺其南小山上有六角大塔曰羅星塔由此改乘小汽船上駛

兩岸巖石高聳河面漸窄抵南臺島南有倉前山租界在焉有浮橋達閩縣為

福建省會據閩江左岸。多榕樹。故又號榕城。近東門有溫泉。

廈門廳

福建府

汕頭

廣東府

香港

原屬廣東現為英國地

九龍

屬廣東香山縣為英所租借

由閩縣

出閩江口南駛經臺灣海峽風濤至為險惡。至廈門則北至遼海南至粵海。皆有海艱往來。故貿易極盛。相距約三里曰鼓浪嶼亦闢為商埠。南行入廣東境

廣東為古粵地故又稱粵省東西距千九百里南北距千三百里山嶺盤繞北境大庾嶺與江西湖南分界南境西海西南一帶伸出海外若鵝頸有珠江匯東西

北三江之水南流入海氣候溫暖地膏經南澳島西行折入汀江口抵汕頭

西行抵香港英人歷歲經營商業隆盛設府治其對岸有九龍半島水深可泊

巨舟英人運送貨物船塢與

澳門原屬廣東香山府今屬澳門廣州灣廣東法租界瓊山縣廣東瓊州府治北海廣東合

番禺縣廣東府治自香港而西達澳門西南行至廣州灣南行抵瓊州海口

孤懸海外貿易不盛西北行至北海外國貨品之輸入廣西者多由此埠運往

自此折回至澳門入珠江口虎門礮臺在焉。至白鵝潭下棧其旁曰沙面租界

也。與城隔一河城北越秀山有鎮海樓。

清稗類鈔 地理類 三一 稗 三

自廣東番禺縣經雲南蒙自縣至江蘇上海縣

佛山鎮

屬廣東南海縣

蒼梧縣

屬廣西梧州府治

臨桂縣

屬廣西桂林府治

自番禺循粵漢鐵道西

抵佛山為廣東第二大埠貿易興盛西至三水縣

水陸便利自此乘汽船溯西江上駛抵高要縣

來要區西行入廣西省境

雲南曲折流貫本省合桂林二江之水東入廣東之珠江惟地多煙瘴山中有

陸路通商要埠左右石山高抵蒼梧地為桂省咽喉全省貿易皆以此為樞紐

及西江通汽船商業益盛自此沿桂江北上過恭城縣

萬山中崖高瀉急北至臨桂廣西省會也當桂江東岸

貴筑縣

出臨桂西北行入貴州省境

行萬山中徑路崎嶇榛莽蒙密經都勻縣

藩籬也西北至貴筑為貴州省會地近烏江無祲寒盛暑惟土地瘠薄城東二

里有銅鼓山嶺高百仞。俗傳諸葛亮征苗蠻雜處於此。苗蠻雜處。以仲家苗谷蘭苗為最凶悍。

明王守仁請龍場驛丞為修文縣。地因俗化導。習苗悅服。自此西南行。過關嶺縣。貴州安順府永寧縣。渡盤江。經普安

縣。屬貴州。即達雲南省境。雲南有滇池。故又名滇省。東西距二千五百餘里。南距千一百餘里。山嶺徧全境。如點蒼。鷲星。高黎。普

玉龍。其諸山並以名勝著。川之大者有金沙江。怒江。瀾滄江。盤龍江。湖之大者滇池。而外曰洱海。曰撫仙湖。內而川廣。外而英屬。之緬甸。法屬之越南。商賈懋遷。視

為衝要。咸四南襟鎖也。

昆明縣。雲南府治。騰越廳。屬雲南府。永昌府。屬雲南府。思茅廳。屬雲南府。蒙自縣。屬雲南府。黔滇之

交界處。有永安坊。題曰滇南勝境。山徑至此較平。西南經霑益州。馬龍州。屬雲南府。

靖抵昆明為雲南省會。西行過楚雄縣。雲南府治。西北抵太和縣。雲南大理府治。其

地居洱海之西。頗擅形勢。西南行過瀾滄江。潞江。至騰越。當西南極邊。為通緬

甸之陸路商埠。自此東南行。復渡潞江。瀾滄江。至思茅。則商埠也。東渡李仙江。

經元江州。雲南元江直隸州治。石屏州。屬雲南臨安府。至蒙自。法人自越南東京所築之鐵道經此。為陸路商埠。

頗繁盛。

至此。已至我國極南之境。周游全國之事。於是告竣。乃由蒙自出越南之東京。

海灣。東北航經南海而還上海縣。屬松江府

### 南北之見

康熙己未鄞縣萬季野預修明史。要蠡縣李剛主爲之審定。剛主婉言拒之。謂明宣宗嘗稱長才偉器。多出北方。頗怪季野所撰。北士殊少。而深慨於南華北樸之異。是則賢者亦不免有此見。蓋蔽於地也。

地域之有南北。不過辨正方位之一代名詞耳。民生其間。心同理同。雖有不齊。亦不過習俗稍殊而語言或異。至於取舍大端。有如渴飲飢食。夏葛冬裘。豈曾有相背而馳之理。在昔交通梗阻。老死不相往來。性習或尙離歧。而好惡仍歸一致。自風氣漸開。政教漸明。舟車漸備。斯民相生相助之需要漸切。合羣進化之功效漸著。世界且日趨於大同。況在一國之內。同種之民乎。乃亦較然劃分南北。積不相能。偶或被征服。反抗不已。豈正軌哉。至此說之由來。皇古三代既未前聞。卽春秋戰國各野心家。力政相攻。亦惟部分競爭。固無所謂南北之說。孟子教陳相。而曰陳良楚產。北學於中國。北方之學者。未能或之先也。此爲修

詞者之襯託。無關地域。且在當時尙視楚爲南蠻。而視鄒魯齊晉爲中國。故有是語。及三國分立。曹丕伐吳。曹之武力不足以取勝。始臨江歎曰。此天所以限南北也。南北之說。職是大興。

已墾之土地

各省已墾闢之土地。確已達二十億一千六百九十八萬三千畝、

(以畝爲單位)

| 省別 | 墾闢畝數        | 省別 | 墾闢畝數       |
|----|-------------|----|------------|
| 直隸 | 一三五·八〇〇·〇〇〇 | 山東 | 七五·九七〇·〇〇〇 |
| 山西 | 一〇一·八三〇·〇〇〇 | 河南 | 八七·九四〇·〇〇〇 |
| 江蘇 | 五八·六〇〇·〇〇〇  | 安徽 | 七四·八一〇·〇〇〇 |
| 江西 | 八九·四八〇·〇〇〇  | 浙江 | 五六·六七〇·〇〇〇 |
| 福建 | 六六·三二〇·〇〇〇  | 湖北 | 九一·四一〇·〇〇〇 |
| 湖南 | 一〇三·三八〇·〇〇〇 | 陝西 | 九五·二七〇·〇〇〇 |

|    |                |     |             |
|----|----------------|-----|-------------|
| 甘肅 | 九六·九六六·〇〇〇     | 四川  | 一六五·六五三·〇〇〇 |
| 廣東 | 一二九·九七〇·〇〇〇    | 廣西  | 七一·四六六·〇〇〇  |
| 雲南 | 一二七·七四六·〇〇〇    | 貴州  | 六四·七七六·〇〇〇  |
| 新疆 | 八一·一二〇·〇〇〇     | 東三省 | 二四一·八〇五·〇〇〇 |
| 總計 | 一一〇·一六·九八二·〇〇〇 |     |             |

田畝種類

田畝分官民二種。其在直隸者。民賦田。即普通民田更名田。即明代各藩所領編入民田者農桑田。

蒿草籽粒田。葦課田。歸併衙所地。河淤田。其在山東者。民賦田。更名田。歸併衙

所地。製鹽地。其在山西者。民賦田。更名田。歸併衙所地。其在江蘇者。民賦田。山

蕩漫灘。其在河南者。民賦田。更名田。歸併衙田。其在安徽者。民賦田。水衙所管屯

田。草山。其在江西者。民賦田。塘歸衙田。其在福建者。民賦田。汲入田。廢寺田。其

在浙江者。民賦田。蕩塘湖地。衙所田地。其在湖北者。民賦田。更名田。衙田地。屯

田。其在湖南者。民賦田。更名田。屯田。其在陝西者。民賦田。更名田。屯地。其在甘

肅者。民賦田。土司田。更名田。屯地。蓄地。其在四川者。民賦田。屯地。土司田。其在廣東者。民賦田。屯地。地溝。車地。其在廣西者。民賦田。獠田。獐田。其在雲南者。民賦田。馬場。夷地。其在貴州者。民賦田。苗田。土司田。屯田。其在新疆者。民賦田。回田。其在東三省者。民賦田。皇室莊。宗室莊。八旗莊。駐防莊。

### 旗籍田產

旗籍田產。有奉朝旨賞給之田。曰恩賞地。有親王子弟所授之田。曰貝子貝勒地。有皇室額駙所得之田。曰額駙地。有皇帝之女蒙賞之田。曰公主地。有親王以功受田。得以累世承襲者。曰世襲地。世襲之地。有原定世數。襲滿應行交還。而因仍未交之地。有王府公主出聘。後將原有田畝帶去之地。有將所得之地。帶入內務府者。有因罪被革之王公。應行交還而未交之地。有本爲漢人投入漢軍旗。遂將其地帶入旗籍者。種種轆轤。異常複雜。

### 小江南

天津城南五里。有水田二百餘頃。號曰藍田。田爲康熙間總兵藍理所開濬。河



渠圩岸。周數十里。藍嘗召閩浙農人督課其間。土人稱爲小江南。

無定河

唐人詩。可憐無定河邊骨。猶是春閨夢裏人。無定河。在直隸固安縣西北十里。國朝改爲永定河。非陝西之無定河也。河水東奔。潮汐無定。故有是稱。

木蘭

木蘭。在熱河東北四百里。本蒙古地。康熙中。近邊諸蒙古所獻。以供聖祖秋獮。後每歲行圍。大約至巴顏溝卽轉而南。不復北往木蘭矣。

伊絲谷

乾隆戊寅。高宗巡幸木蘭。舉秋獮禮。布魯特使臣來朝於布固圖昂阿。先是。乙亥。平準夷噶爾藏多爾濟等。丁丑。哈薩克使臣根札爾噶喇等。皆來朝於此。爰賜名其谷曰伊絲。伊絲者。滿語言會極歸極也。

張家口

張家口。東北通多倫經棚。以達中蒙各部。西北通庫倫恰克圖。以及阿爾太等。

口。西通歸綏包頭。西蒙伊烏兩盟。以及甘新等省。實爲貿易繁盛之區。

### 盛京

盛京一地。卽奉天。明季稱曰遼州衛。旣而太祖收轄東南之蒙古。遂進窺中原。以遼於輿地上最關重要。乃於天命辛酉取其城。越四年。由遼陽移都其間。及順治丁酉。改瀋陽爲奉天府。遂爲行省。盛京城垣。建於有明洪武戊辰。爲方式。四面有門。其後則增而爲八。門中有皇宮。乃天聰時所改建。城之高。計三十五尺。周十里。有四城樓。六百五十一堞。以便置砲。方城之外。有一套城。係圓形。城周三十二里。有八門。每間城牆約三里許。城中卽爲前皇宮室。已歷百餘年。不用鐘樓鼓樓。則分峙於小東門小西門間。城東二十里。林木暢茂。太祖陵寢在焉。是爲東陵。

### 洮南地勢

洮南。在科爾沁右翼前旗。東部介於奉吉黑三省之間。去長春齊齊哈爾。均不過五百里。至奉天。乃近千里。地勢平衍。北部有洮兒交流兩河。至城東北五里。

許合流。仍名洸兒河。岸高水清。泥底面窄。發源於索倫山。東流二百餘里。由月亮泡入松花江。泡類湖泊。水勢漫衍。淤泥堆積。致流不能暢。時泛溢爲災。城方五里。衢市嚴正。

### 兀良哈三衛

兀良哈三衛。

幅餘衛爲嫡會所居。秦寧不顏爲其別部。

自明洪武季年。已建置於遼河流域。及永樂

內篡。從征有功。乃割大寧地畀之。三衛益強。兀良哈者。卽西北極邊之烏梁海部。塞外疆域地名。每隨人種遷移而定。如前史所謂僑置者。明時兀良哈固逾遼而西。卽是。至國朝。則爲極北藩盟。遠在唐努山南麓矣。蓋廣寧地卽奉天廣寧縣。前屯至喜峰口外屬。朵顏。錦州。義州。跨及遠東。屬泰寧。鐵嶺。開元等衛。屬福餘。按三衛爲元裔。遼王阿禮失禮降明。處其衆於此。其遷至西北遠塞。爲避七先俺答之逼。當在明

正統天順間。

### 東道

奉天至吉林。大道三。自奉天東北走。出鐵嶺。踰開原。與東方鐵路別。經葉赫赫

爾蘇諸站而至伊通州。折而東。越大水河。以至吉林。是爲中道。長七百六十餘里。坦平寬廣。爲三道最次。爲西道。蒙人往來最多。故又稱蒙古道。自奉天而至長春。而吉林。全途皆有吉長鐵路之汽車通行。而車騎日少。凡長八百三十餘里。蓋長春扼哈爾濱上游。當蒙旗要衝。亦形勢上必爭之地也。其東道。則自奉天東繞海龍輝發折而北。掠磐石西鄙。以趨吉林。長八百里有奇。此道出深山大林中。崎嶇磴确。行旅不多。馬賊之所潛藏。狐貂之所出沒。蓋行軍之間道。而用奇者之所必出也。

由吉林經新城而至龍江府。凡一千零八十餘里。自東清鐵道興。人馬車輛之往來。殆倍蓰於昔日。自吉林北出。越烏拉。至舒蘭縣。折西行。至於陶賴。驛。一小都會也。東清鐵道出其東。自是更西北。經五家子站。三家子站。而至新城。由陶賴招至此。凡二百十四里。沿途多村落。村之四圍。繞以樹木。風景絕佳。新城者。舊日之伯都訥也。其城建於康熙癸酉。人口四萬有餘。有銀行商鋪。貿易殊盛。光宣間。日益發達。蓋地勢既當衝要。而土性復肥沃。利於耕牧。自是西北二

十八里。有伯都訥站。松花江嫩江之所合也。渡江至茂興站。新城至此。百餘里矣。茂興站煙戶數百。一小都會也。四十五里至新站。新站之西南爲柳官屯。戶數四百餘。蒙古大村落也。有大牧場。牧馬三千餘頭。馬市盛焉。自新站出。百九十六里至多耐站。其東方有貝子村。蒙民數十戶。杜爾伯特旗貝子所駐也。自多耐站二百十里有奇而至龍江府。

從濱江廳西北經呼蘭府至龍江府。長五百七十四里。其大部分通東部蒙古之平原。自濱江廳及呼蘭府雙廟子龍江府外。皆小村落。冬期人馬車輛往來極盛。

從琿春廳西至臨江府。長五百四十里。其大部分皆出山間谿谷中。居民少。馬賊橫行。去琿春廳不遠。始略平坦。琿春地沃。氣候和燠。尤爲吉黑之冠。

從琿春廳經局子街至鄂穆赫。約六百三十里而近。蓋卽從琿春廳至吉林大道之一部。沿道居民以朝鮮人爲最多。途通車輛。亦間有困難之所。

從延吉府經古洞河東行至夾皮溝。長七百一十里而弱。延吉府舊稱局子街。

自鄂穆赫至琿春廳中間之要地也。距琿春河約四百二十里。街衢以東西大街爲最盛。海浪河經市街之中央。橫斷南北。中有渡船。水涸時。可徒涉。各署皆在河南。商店在河北。居民三分之一爲韓人。三分之一爲山東人。自延吉府至夾皮溝。皆道出萬山中。穿羊腸。走峻坂。下谿谷。森林覆地。際天。午不見日。有時山澗奔流。遮絕道路。沿途人煙蕭條。行旅之中。此爲最苦。

從延吉府東北經黃溝至東寧廳。不及七百里。大部分皆山間細徑。不通車。自延吉府百四十里。經張家塘子至龍灣。道寬廣。便車騎。路旁田野相半。龍灣亦有旅店及商家。既過龍灣。遂入穆克特亨嶺。路峻坂干雲。深壑無底。其中王家塘子以北。道路至凹凸。甚至巨巖遮路。中容一人。側身乃過。夏日降雨之際。行潦漲溢。行人裹足。沿道無他部落。惟二三獵人之茅舍而已。自龍灣百八十里至黃溝。黃溝一帶山下村落星散。處處見之。皆樵獵爲生者也。北進越二澗。百三十里至綏芬甸子。綏芬甸子者。朝鮮僑民實居大部。華人三十餘戶耳。大率業農及業樵獵者。亦有二三旅店。道路亦出山谷間之細徑。百三十里而近。至

老黑山。自此至東寧廳。道路雖在山間。然已修整完善。車馬往來。得以自由。沿道人家。稍稍增加。汨汨之細流。經太平川榆樹川大肚子川佛爺溝。百二十里。達東寧廳。綏芬廳東寧廳者。當綏芬河大小烏蛇溝河三流之會合點。故又名三岔口。城市爲二十年前新建。商業尙盛。

從鄂穆赫至東寧廳。東行稍偏北。長三百五十餘里。殆全不通車輛。自鄂穆赫出山間。崎嶇之小道。經鳳凰店燒鍋屯。至牛圈溝。鄂穆赫以來。蓋百里矣。牛圈溝有特別之小車。以供旅客之賃者。東北道必爾騰湖。湖上漁船頗多。於窰店以東。渡牡丹江。寧古塔河右渡舟一。更前行至松嶺溝。牛圈溝以來。百有五里矣。松嶺溝附近有田畝。農人種二麥。其他沿道之大部。悉爲密樹雜草所覆蔭。松嶺長四十餘里。皆有森林。自是更百有五里。乃至廳治。

自鄂穆赫西南經敦化縣牡丹江至夾皮溝。凡長四百五十五里。一部分不通車輛。蓋山間之細徑。自鄂穆赫至黑石頭。中間山道稍廣闊。冬夏皆通車。沿道村落無多。自黑石頭行北三四里。得一湖。直徑里餘。爲圓形。湖水不少。自黑

石頭經敦家店亮白頂子小石頭河至敦化縣。自此道路良好。中途有響水河。夏季水溢時。杜絕車馬之往來。更行約五十米。突又得一河。架木爲橋。僅通行人。渡河之地名曰香磨。又會於牡丹江之渡口。名紅石礮子。橋梁渡船皆不備。惟有小石橋一條。自敦化縣七十里過官屯子。大石頭河。黃泥河子。太平山。前馬號。至帽兒山。帽兒山者一稱柳樺營子。牡丹江上流山間之一村落也。中韓兩國民之所雜居。道路走山間溪谷。不通車。途中過牡丹江。江上架橋以通南北。沿道人煙蕭條。自帽兒山七十里至牡丹嶺之麓。牡丹嶺中之道路。上下於山脊溪坂間。赤松柞樹一望無際。行人往來。皆穿林中。左折右避。僅行一人。途上柳樹河有舟。可渡行人。沿道人煙蕭疎。惟柳樹河之北岸。有十餘戶。山腹山下。有一二戶而已。自牡丹嶺七十里過富兒河。道路仍在山間。次越富兒嶺。金銀鼈嶺。金銀鼈嶺麓有農民十餘戶。越金銀鼈嶺。出山間之細徑而上大道。稍廣闊。然途中凸凹甚多。巨石散布於道。車殆不可過。自金銀鼈嶺七十里達夾皮溝。



從寧古塔東北經穆林河至蜜山府。凡六百五十四里有餘。大部皆良好之道路。間有車難通行者二三處。自寧古塔出發。於呼石哈村東北行。過三家子團山子之二村。至於南溝道路。自此向正西行。至磨刀石。其東北約三四里。有磨刀停車場。自磨刀石經過二三之寒村。至穆林河。自此百七十里不足。至青溝子嶺。嶺上有古廟一。道路至此。非常狹窄。山道至石頭河。始稍平坦。過黃泥河子狹亮子諸小村。自青溝子嶺行二百六十六里。抵蜜山府。鎮 蜂 蜜

從依蘭府經蜜山府至俄國烏蘇里州伊馬驛。則九百十里不足。道上崎嶇險峻相次。以幅尙寬廣。無不通車之處。然至夏日溪流奔溢。行旅亦往往爲之裹足焉。

自吉林鄂穆赫至臨江府。塔 寧 古 凡六百四十餘里。途中多荒山老林。吳漢槎所經大小窩集。卽此地也。自吉林東北行。渡松花江。經雙岔河。至額赫穆站。自此漸入山地。山中沿道。樹木甚茂。繁柯交蔭。枝條相糾。仰不見天。人行其中。如在洞窟。至拉法站。暫離林樾。已復入山。自此而東南。危嶺峭削。突兀直立。爲喇嘛

磊子山遠望頗奇特。山巔有觀音廟。行人可休憩。自拉法站更東百六十餘里。至鄂穆赫站。自鄂穆赫經都凌河子至塔拉站而東。復行於山層巖障之間。至必爾罕站。迤東地皆巖石。隄隄而行。至沙蘭站。此站戶數五十餘。一小都會也。自此經扒利甸子小藍旗溝大藍旗溝而至臨江府。塔古自臨江府至依蘭府。三行程爲六百里。實不過五百五十里。道出山間。險惡難行。有數處。僅容一人不通車。蓋光緒初川兵伊犁所特闢者也。自臨江府至三姓。正北直行。傍虎爾哈河而倚白山。凡八站。此數字自一至八名之。頭站起依蘭府。八站則近臨江府矣。每站各駐兵數人。

自吉林經土橋子至五常堡。凡三百二十里而近。人馬車輛往來最多。自吉林北越烏拉。至黃山嘴子。東北進。道側皆田園。桑麻翳目。遙望東方。連山重疊。相次而來。過東孤家子。始北行。平野寬廣。時見墟墓數點。蔭以叢樹。零落如殘星。自東孤家子至黑林子。則有四大逆旅。以便旅人寄宿。此一帶町畦相連。黃綠無際。自此更北。溪流涓涓。時見道側或橫小橋。或利徒涉。近土橋子。遙望山岳。

皆在東北方。土橋子之東。有山河屯。乃鄉鎮也。過老山屯。渡拉林河。近五常府。則民居漸稠。五常府者。山間之一都會。人口凡六千以上。自是更北行三十餘里。而至五常堡。堡爲協領所駐。亦一小市集也。

自吉林經烏拉榆樹縣阿城縣至濱江廳。凡五百八十五里。此道往來最衝繁。沿松花江東岸。行經烏拉街。於大坡東北行。至榆樹縣。沿道村落甚多。至大嶺北行六十里。渡拉林河。至拉林城。自榆樹縣以來。近百七十里矣。拉林城四方形。四面各關一門。商業殷盛。更九十里。達阿城縣。阿城縣又名阿什河。故阿勒楚喀城也。城踞阿什河左岸。商業極盛。農產亦豐。西北七十里。乃抵濱江廳。自吉林經兩江口及萬里河。帽兒山至朝鮮之厚昌縣。計九百八十餘里。自長嶺子經兩江口及頭道流河。至萬里河。中間山中小道。僅通單人匹馬。道中所見。惟山岳嵯峨。雜草暢茂。人家旣稀。芻糧殆絕。山坳間僅一二窩棚。供旅人憩宿而已。至二道江。乃有舟以渡行人。渡江以後。沿道居民驟多。栽種玉蜀黍粟米等。頭道流河沿岸。時見淘金者往還其間。自萬里河經湯河口至帽兒山。復

有樹木蒼鬱成林。躡蹠嘯啼數百里內。殆無居人。大鋪子湯河口之間。有二細流。澗時一躍可越。由萬里河。凡經三百三十里。而至帽兒山。俯山而窺。臨江縣治在焉。縣臨鴨綠江。地雖小。山間之要道也。自此更百二十里。而至日本屬朝鮮之厚昌縣焉。

### 發祥之地爲建州女眞

帝室自稱滿洲。爲其部族之名。非也。其部族實爲女眞。女眞起於遼世。或謂卽古肅慎之轉音。歷遼金元。皆稱女直。至明而復稱爲女眞。康熙己未。詔修明史。乃盡去之。滿洲源流攷徧詳。東夷各部族。而獨無女眞專條。蓋諱之也。其世系實爲建州女眞。地在吉林之興京附近。肇祖始受明之衛職。爲建州左衛指揮。卽愛新覺羅氏猛哥帖木兒也。

### 吉林爲船廠

吉林一名船廠。以其地有修造水師戰船之廠得名。廠濱松花江。光緒庚子前。猶存戰船無數。皆康熙間征羅刹時所用。羅刹卽俄羅斯也。定例。每年必修理。

一次。如是者幾二百年。庚子。俄兵入吉林。取以爲柴。燒之不數日。盡矣。

### 聖水渠

長白山有聖水渠。澄澈異常。較之七星湖水。每斤輕二兩有奇。

### 黑龍江

黑龍江水波澄澈。視遼河之渾濁者迥別。而獨以黑名。未知其義安屬。顧名稱已古。歷千數百年矣。唐書東夷之靺鞨。分黑水粟末兩部。粟末爲松花江松字之轉音。黑水則音訓相沿。尙仍其舊。滿語本稱爲哈薩連烏拉。哈薩連云黑烏拉。云大水也。古今名稱。直不稍差。特不知中間忽加附一龍字。緣何起義。且明以前地理誌。亦未見有此。自康熙以還。朝旨及奏章。始悉書是名。漸且數典忘祖矣。

### 察哈延山

黑龍江之西。有山曰察哈延。其穴巖中。白晝吐燄。晚則出火。經年不熄。近嗅之。氣味如煤。其灰燼黃白色。如牛馬矢。撚之卽碎。

## 寧古塔

寧古塔。歷代不知何所屬。數千里內外。無寸碣可稽。無故老可問。相傳當年曾有六人坐於阜。滿語六爲寧姑。坐爲特。故曰寧姑特。一譌而曰寧姑臺。再傳而爲寧古塔矣。固無臺無塔也。惟一阜如陂陀。殊不足登。本朝控制諸番。受貂狐皮貢。爰留卒以戍之。有邏車國者。黜諸番。使不得貢。敵之不勝。乃動大衆。勤舟師。遂擇八旗。旗八十人。長戍焉。復立牛祿章京。梅勒昂邦。以重其任。邏車亦不知其國在何所。云舟行萬二千里。不得其疆。其人皆長於烏鎗。世遂譌烏爲老。譌鎗爲羌。康熙間。其地無城郭。實枕河而居。樹短柴柵。環三重。闢四門。而命之曰城。中以碎石甃埤。丈餘。闢東西門。置茅屋數椽。而命之曰衙門。章京行政地也。埤雨卽圯。圯隨甃。柵內卽八旗所居。當事者厚待士夫。請旨居士夫於城內。餘人則散居諸屯。有數屯焉。隨所居多寡而大小之。無舊址。無定居。如曰牡丹者。滿言一日還也。曰沙兒虎。曰沙嶺。曰泥漿。曰要羅。皆類是。山川不甚惡。水則隨地皆甘冽。或曰稜所融也。有大川。匯衆川而達於海。可以舟。有東京者。在沙

嶺北十五里。相傳爲前代建都地。遠睇之。蔚郁葱菁。若城郭雞犬。可歷歷數。馬頭漸近。則荒城蒙茸矣。有橋梁存而板滅。有城闔軌存而國滅。有宮殿基礎存而棟宇滅。有街衢址存而市滅。有寺石佛存而刹滅。譌曰賀龍城。其慕容耶。

### 哈湯

寧古塔有哈湯之險。又曰蝦湯。淖也。數百里俱爲泥淖。其深不測。土人呼水在草中如淖者。曰紅銹水。人依草墩而行。略一轉側。則人馬俱陷於紅銹水中。冬則冰。

### 揚子江

揚子江之名。由來久矣。蓋江蘇揚州府城南十五里有揚子津。後稱揚子橋隋以前。

津尙臨江。不與瓜洲接。故江面闊至四十里。北人南渡者。悉集此津。而江亦以是名焉。及唐時。江濱積沙。至二十有五里。瓜洲遂與揚子津相連。江面乃隘至十八里。於是渡江者。南岸則濟自京口之蒜山渡。北岸則濟自瓜洲。揚子津之名。由是不著。而江竟千古矣。

瓜洲故城

瓜洲舊在江中。形如瓜字。故名。唐時始與陸路相連。宋乾德間。因以築城其上。遂恃爲濱江一重鎮焉。年代湮遠。地勢變遷。至道光時。則故城復陷落江心。瓜洲乃名存而實亡矣。惟每當風日晴和。渡江之客。猶時於波光澄清中。見堞垣痕影也。

溧陽改隸鎮江

溧陽相國史文靖公。雍正己酉。以山西巡撫署福建總督。明年。調署兩江。以本籍疏辭。詔勿許。其時溧陽正屬江寧府。適在總督駐所。是年六月。遂奏請以溧陽改隸鎮江府。從之。

丹徒沙田

江蘇丹徒縣境。東北濱江。各地多爲沙田。名曰洲圩。如順江御隆大港。高資永固。平昌圖濱各市鄉。沿江一帶。沙田有二十餘萬畝。十年一清丈。計坍塌若干。漲沙若干。招鄉人繳價承領。此常例也。



### 儀徵改揚子

儀徵縣。因避宣統帝御名。改名爲揚子縣。有人出一聯云。揚子雲渡揚子江。到揚子縣。或對以端午橋逢端午日出端午門。

### 上海之昔日

上海一埠。始僅一黃浦江濱之漁村耳。咸同粵寇之役。東南紳宦及各埠洋商。避難居此者日多。稅源日富。華爾戈登常勝軍之編制。亦起於是時。李文忠公鴻章。因以奏平吳之大業。而當時如龔橙。王韜。容闈之徒。亦多起於上海。時獻奇計於粵寇也。

### 上海租界之解釋

海通以後。外人至滬經營租界。在當時定議之初。並不名爲租界。不過我政府劃定一地。准於此租地建屋耳。故租界之租字。乃係租地之租字。移換而來自我國統治權日漸放棄。於是外人始設工部局以理市政。設巡捕房以總警政。而商埠之上海。乃成爲租界之上海矣。觀法大馬路名公館馬路。則以法領事

署在此而名。而當時領署不自居衙署之列。可知。巡捕房普通稱之曰行。福州路之巡捕房稱老行。南京路之巡捕房稱新行。行爲買賣交易之稱。謂則當時巡捕房亦不列於衙署矣。其後。洋文之公共租界爲公共殖民地。法租界則更進而爲市鄉。宣統辛亥九月。工部局發貼告示。竟大書特書曰各國駐滬公地。是已悍然將租字剔去矣。今則卽我華人自稱。間亦省字作法界英界也。又上海外人勢力。以英法美德爲最鉅。故居留人除日本外。亦以四國爲最多。惟滬人之稱四國人。亦復各別。稱英人曰大英人。頗符國際上互相尊敬之義。稱法人則曰法蘭西人。間有音訛作拔蘭西者。與洋文原音相去更遠矣。稱美人則曰花旗人。稱德人則曰迦門人。迦門係日耳曼之音。此種稱謂。稍一移易。如直稱德人。美人是。中下社會卽不知所對。蓋此事各有其歷史上之緣因也。惟花旗之稱。則當時以與英人語言文字種族一一相同。無他標異。故以國旗名其人也。

租界各馬路。在公共租界者。大率以我國行省及內地著名城市命名。在法租界者。大率以該國著名人物命名。而吾人對於兩租界之馬路。亦各有習稱之

名。如南京路曰大馬路。公館馬路曰法大馬路。此等不勝屈指。惟彼之命名。由於人爲。我則並未命名。偶沿有慣稱而已。故新築之路。若愛而近路。若卡德路等。則已無我國之名矣。

### 上海租界之沿革

上海公共租界面積。凡三萬三千餘畝。習俗所稱英租界美租界者是也。惟英租界美租界爲光緒己亥以前相傳之名稱。至光緒己亥西關泥城橋以西至靜安寺路。東北關虹口迤東之地。以迄引翔港。由各國公使議決。將舊時英美租界并東西新闢之地。統名曰公共租界。此租界名稱之沿革也。吾人不察。仍稱蘇州河以南洋涇浜以北爲英租界。蘇州河以北迤東爲美租界。泥城橋以西爲公共租界。或新租界者。誤也。

### 濟南山水天下無

山東濟南形勢。南起泰山之麓。蜿蜒北來。而龍洞而玉函而歷山。陡然跌落平地。而爲省城。東西山嶺廻環。以黃河爲門戶。以鵲華爲關鎖。海岱間一大都會。

也。其地本漢濟陰郡。文帝丁丑年爲濟南國。景帝初復爲郡。歷代屢有改易。明仍爲濟南府。國朝因之。改爲歷城縣。周二十餘里。其門四。東曰齊川。南曰歷山。西曰灤源。北曰匯波。後復開便門。四東門之南曰巽利。南門之西曰坤順。西門之北曰乾健。北門之東曰艮吉。其外城爲咸。同間所築。三面屹然而獨缺。其北以匯波門爲城內出水總口。且外無居民故也。其池則自南關黑虎泉湧出一脈。劈分兩派。東會珍珠泉。西會趵突泉。灤水相抱而爲護城河。雖久旱色不濁。量不竭。城西北隅有大明湖。會合十數名泉。汪汪而爲巨浸。遠山倒影清流見底。舟穿荷柳游魚可數。古人云。濟南山水天下無。又云。濟南瀟灑似江南。信不誣也。

### 鷄鳴島

鷄鳴島屬山東登州府榮成縣。孤懸大海中。明代曾置衛所。大兵入關。農夫野老不願薙髮者類往居之。島田腴甚。且稅吏絕跡。儼然一海外桃源。光緒甲午中日之戰。海軍中人有巡至其地者。島始發見。驟睹居民之褒衣廣袖。爭呼之。

爲道士島。惜居民無讀書者。不能道其詳也。

### 小邾子故城

嶧山之間爲春秋邾國故地。邾入於魯。其後乃遷於鄒。宣統辛亥春。建築津浦鐵路。掘地見故城址。據兗州志攷之。知爲小邾子故城。

### 開通太行北道

山西潞安澤州二府。在萬山中。唐以前。有孔道。可通車馬。宋後久堙塞。行旅苦之。光緒丙子丁丑間。秦晉豫大旱。山西災尤重。至有一村數百戶餓死不留一人者。而澤潞二郡乃大有年。穀賤農爲之傷。而運道梗阻。竟不克輸出山外。於是朝邑閻文介公以工部左侍郎家居。奉命爲山西賑務大臣。巡撫曾忠襄公方派員購米湘鄂。隔越數千里。不得時至。文介謂唐會昌中。用兵昭義。曾勅石雄率朔方軍由平陽東南取道曲亭進兵。徑指上黨。旣可行軍。其軌道必非甚隘。上下未及千年。不應遽無蹤跡可尋。乃與忠襄謀。派員往勘。往來月餘。得曲亭故址。遵此入山。直抵潞安城外。則舊跡宛然。且廣闊能並行兩軌。不必鑿山。

堙谷。僅平夷險阻。即可通車馬。文介大喜。因奏請以放賑餘款興工。未竣。而文介解賑務。忠襄亦調任去。張文襄繼爲督撫。乃始成之。

### 望都縣

望都縣。舊名慶都。慶都者。堯母名也。乾隆丙寅。諭曰。朕自正定迴鑾。固城祁水之間。有縣名與堯母同名。義雖述古。於意弗安。其易爲望都。

### 歸化城

歸化城。設官鎮守。南關顏額。上爲蒙古書。下橫書翁阿洪三大字。亦左行。用蒙古式也。城中惟官倉用陶瓦。甃壁堅緻。餘皆土室。空地半之。城南民居稠密。視城內數倍。駝馬如林。間以驢騾。其屋皆以土覆頂。楹聯皆漢字。窗戶精好。

### 黃河水信

黃河水信。清明後二十日。曰桃汎。春杪曰菜花水。伏汎以入伏始。四月曰麥黃水。五月曰瓜蔓水。六月遠山消凍。水帶礬腥。曰礬山水。秋汎始立秋。訖霜降。七月曰豆花水。八月曰荻花水。九月曰登高水。冬曰凌汎。十月曰伏槽水。十一月

十二月曰蹙凌水。河上老兵能言之。

### 伊河洛河澗河澗河

伊洛澗澗四河爲夏禹治水所開。伊河之水發源於西南。經過龍門。斜入洛河。離南門七八里。洛河水由西至東。澗河水由北至南。兩河皆逼近城垣。澗河水由西而灣南。此河離城七里。伊洛澗澗四水皆達黃河。伊洛水深河寬。有船往來。澗澗則不及伊洛。河道隘狹。非在發水時。直同澗流。故難以舟楫。

### 鄭州

鄭州爲北上大道一州縣。初無重要之位置。其風土亦至荒涼。自京漢汴洛鐵路相繼通行。此爲交點。而鄭州之名。乃盛傳於世。當道亦因時勢之需要。由散州而升爲直隸州。由開封屬之三縣屬之

### 邠州

陝西之邠州。距西安三百二十里。卽周太王所居地。皇澗在東門外。過澗在西門外。皆爲驛路所必經。州境梨棗彌繁。綠陰數十里不斷。蓋陝省之上腴也。

明祖山距邠州西門十里。乃石山。俗名花果山。在大道旁。是山中空。有七十二洞。曲折相通。總名曰水簾洞。緣山皆鑿佛像。多而且工。大小畢具。年深漸隱。須諦視始辨。摩崖有隆慶元年創造六字。隆慶。明穆宗年號也。

### 天生墩

朔方戈壁。以嘉峪關外爲巨。其徑長百二十里。平沙無垠。風色慘黯。其中一阜。名天生墩。恆有戍卒據守。至冬夏皆儲積水草。以備兵馬往來之用。先是岳威信公鍾琪西征過此。疑是墩爲土山。飛沙日積。故沒其半。山爲發水之源。苟就其頂而深掘之。當有所見。以觀儲蓄水料。其勞逸殊矣。因命步卒穿之。竭一日夜之力。至數十丈。在下兵卒忽墮無跡。穴上人俯聽之。惟聞風聲雷吼而已。岳立命輟。是役問之。幕師僱佛氏地風水火之說解之。可知盤旋大氣。斡運地中。陰陽生尅。歸諸造化。不能以爲異也。然徐舍人蒸藁曾云。戈壁雖積沙。無水草木不生。倘擇老樹本下深鑿之。當有水泉。在昔烏魯木齊築城時。曾用此法以引水。蓋亦木以水活之意也。



### 河套

河套夾岸沃壤千里。岡阜銜接。曠無居人。舟行數百里。始一逢村落。是地沙土雜糅。投種可穫。岸旁衰草長二三尺。紅柳短柏。隨處叢生。紅柳高四五尺。春晚始萌芽。葉碧似柳。枝幹皆赤色。柳條柔靱。居人取織筐筥。色澤妍麗可愛。

### 甘肅少水

甘肅少水。水甚珍。有至阜蘭者。每宿旅舍。有一盃水。送客盥面。盥畢。不可潑去。潑而清之。又供用矣。凡內地諸水。不通河者。謂之死水。久則色變。臭穢不可食。甘省獨不然。土井土窖。絕不通河流。但得水。卽藏人。雖臭穢。不顧也。久之。水得土氣。則清澈可食矣。甘省各處。以得雨爲利。惟寧夏不惟不望雨。且懼雨。緣地多鹹氣。雨過日蒸。則鹹氣上升。彌望如雪。植物皆萎。故終歲不雨。絕不爲意。然寧夏稻田最多。專恃黃河水灌注。水濁而肥。所至禾苗蔬果。無不滋發。不必糞田也。田水稍清。則放之。又引濁水。

### 金滿縣

唐代極北之縣治。以金滿縣爲最遠。且廣尙有殘碑沒蘚。摩挲可讀。地學家謂其縣卽特納格爾。相近爲吉木薩地。唐時所設北庭都護府故城基址。猶有存者。蓋卽李衛公蒞治時所築也。是城圓徑外線約四十里。層累俱土塊疊成。每塊厚一尺。廣一尺五六寸。長二尺七八寸。堅重逾於窰磚。叩之能作鏗鏘聲。城中有古寺一。殿廊圯敗。僅餘石檻斷柱。約略可辨爲舊宇。以供佛多石質。腰以下盡陷入土。然半截猶高約七八尺。當年金碧崔巍。可想見矣。旁有鐵鐘。高亦七八尺。邊廊有銘鏤錯落然漫滅。莫可辨。審其稜角。意似八分書耳。城以東有小城一。峙崗上。與此若成犄角。土居父老云。乾隆以前。有攻其故城者。以小城阻力。迫而用火。四圍礮臺遺址。卽其蹟也。紀文達公奉檄赴烏魯木齊時。嘗與永餘齋籌畫駐兵地點。時永爲迪化城督糧道。接人論事。極見虛心。惟以是處山雜路紛。非屯營善地。磋商於文達。至數日不敢決。文達謂是地沿革。前曾略得於父老傳說。徵之古籍。甚爲可憑。卽援李衛公所築之遺址。重度形勢。確可斷爲要隘。後人所見。烏足勝之。莫若因其舊而用之。較有把握。永然其說。因決

議修築。名爲破城。後爲溫大學士改爲古城營。其城孤懸天半。然山巒高下。蹊徑錯雜。非過此城。不能飛度也。

關西之行路難

出嘉峪關西行。抵安西州。其地荒沙滿目。砂石縱橫。高下難行。西北阻天山。南接青海。幅員爲全隴府州冠。行者出關多駕車馬駱駝。乘暮夜西征。其故有二。一則日間四望無邊。牲畜急欲奔站。易於疲困。一則途中無水。夜涼不至大渴。若當夏季。日中尤不敢行。向晚起程。天明送站。乃行西域之不二法門。遇流沙時。馬行輒退。沙擁輪膠。其俯噴仰鳴之情狀。更可憫也。

迪化

新疆省城治迪化。卽漢車師後王庭。唐可汗浮圖城。地勢北阻戈壁。接科布多之防。南憑天山。達土魯番之道。東達巴里坤。通蒙古之捷徑。西帶阿爾雅。據伊塔之上游。西域有事。必爭地也。

準噶爾山河

康熙戊申準噶爾酋策妄阿拉卜坦來犯邊。聖祖親征。至各多里巴爾哈孫西北望鄂里雞圖。有山如案。平行長百餘里。賜名玉儿山。策妄阿拉卜坦敗。迺遁居窩克阿拉里。經年。湖譯名慈母湖。距科布多二日程。所部至食魚爲活。旣死。其子策凌襲爲台吉。殺其異母弟舒魯達瓦。阻伊里河而居。其河深廣。須舟筏。乃渡。西路自巴爾庫軍營至其地。二千六百餘里。較北路爲近。

### 青海

青海。古曰西海。圖駟曰西海東去西平郡二百五十里是也。曰卑禾羌海。闕駟曰金城臨羌縣西有卑禾羌海。亦是也。曰零海。酈道元曰古西零之地也。曰鮮水。曰羌谷鹽池。漢神爵初。西羌叛。酒泉太守辛武賢請擊罕开在鮮水上者。又趙充國請治隍陁以西道橋。令可至鮮水左右。漢元始甲子。王莽誘塞外羌獻鮮水海。允谷鹽池置西海郡。是也。青海之名。則見於西魏時。涼州刺史史寧與突厥分道襲吐谷渾。還會於青海。是也。蒙古語稱庫可諾爾。又曰庫克渾爾。諾爾。渾爾。狀音字之異。總之言海也。其水高出海面九千八百五十尺。上古時海。

水極廣。蓋北接蒙古瀚海。合渤海南溟成我國四海之名者也。北魏時周千餘里。唐時尙八百餘里。其後東西徑二百里。南北一百三十里。周圍尙六百六十里。面積二萬七千二百方里。一曰周五百八十里。面積約一萬九千三百方里。一曰周五百五十里。面積一萬八千五百方里。測其東岸。其勢逼仄。不及百三十里也。全海之形如鰻魚。口向西北。四岸羣峯環繞。海中二島。自海面準望。則偏於西岸。東一峯名奎遜。托洛亥。峯巒純白。上有石洞。稍西一峯。名察漢。哈達。蒙古猶言白峯也。二島周九十里。高二百七十仞。島中約有僧寺十餘處。番名刺薩。札爾。梵語刺薩。猶漢言佛地也。札爾應作招爾。梵語廟爲招。札爾其轉音也。番僧習禪定者。於冰合時裹糧而入。或返或不返。島番或插帳。或巖居。約二萬人。或云五萬人。亦於冬時渡冰入口。購辦糧茶。足一歲之食。島陸往來。一日不得達岸。必在冰上經一宿也。沿岸沙石草湖約寬十餘里。有水漲痕。畜牧不至其地。平時人跡稀絕。惟野獸奔突而已。

環青海多高峯。東自察漢托洛亥山。賽前山起。西而復東。至卡裏蓋山止。內喀

喇什羅山本與希拉朶山同爲一山。哈立蓋山又與卡裏蓋山同爲一山。合之凡十三峯。皆分列於各旗。族山川之次。海岸窪地小湖泊密如蜂房。草湖結草如球。履之而渡。失足則陷。海水漲時。渾而爲一。最大者曰巴冷泊。漢人呼爲海耳子。附青海西岸。如海口之銜珠。四面河流瀦於海者。大小數十道。以布喀河爲最巨。布喀河上源有數處。中曰英額池。池分河道二。東流者爲哈拉西納河。東南流者爲布喀河。右曰沙爾池。分流爲河。東下百里。與布喀河合。左曰西爾哈河。羅色河。兩水逕南流。合吉爾瑪爾台河。與布喀河會。合於胡胡色爾格嶺。吉爾瑪勒台山兩山之中。至此。數支合爲一幹。東南流七十里。入於海。河流寬而味鹹。產魚最佳。世所稱青海無鱗魚者是也。

### 青海戈壁

青海和碩特南左翼次旗。千格和之西。爲朶巴搭連圍牆。圍牆之南爲戈壁。戈壁。滿語。謂沙漠也。蒙語曰額倫。西羌語曰額濟納。戈壁斜長百數十里。寬三十餘里。面積逾五千方里。沙粒微細。間雜碎石。風吹之。成浪紋。色純白。瑩然如銀。

屑。

地學家言戈壁地質本花崗石以日間酷熱夜間嚴寒漲縮之度過烈石質鬆

且多鹹湖故知爲前代內海遺迹名之曰瀚海允矣

青海之柴達木及黃河附近諸戈壁。占地頗寬。上古

時。青海水面本極廣闊。觀於海岸戈壁。及附近戈壁之鹽泊。爲古時之海底。無疑也。戈壁有石。巨者如卵。小者如豆。沙石下有潛水。沙愈深而質愈粗。其上浮沙最細。下層沙粒如米。泉水卽潛其中。至深五六尺。能識沙中泉脈者。莫如駱駝。是以蒙番行沙漠者。無不以駱駝隨行。夏月。無論晝夜。尤爲氣燥易渴。駝更不可缺少。駝行沙漠。隨地亂嗅。以前蹄抉沙而鳴者。就其處挖下。必得泉眼。其法。張布帳於上風。以障飛沙。挖坎長數尺。寬祇尺許。挖去乾沙。再將溼沙挖至見水。約候十分鐘時。泉水卽溢。取之不竭。淺者。牛馬駝皆屈前蹄而飲。深者。掘坎之半爲斜埧形。以牲畜能下飲爲度。飲畢撤帳。須臾。坎爲飛沙填滿矣。至泉眼最巨之處。駝羣必圍而長鳴叱之不肯行。一若待人挖驗以顯其能者。

### 青海漢市

青海巴顏山之北。大沙漠共三處。沙性各有不同。黃河岸之大沙灘。其質爲濕

沙枯棘布滿。風力不能簸揚。虎山北之戈壁。其質爲沙粒。大如米。中含碎石。風吹之。飛揚不高。惟柴達木北部之大戈壁。東西橫亘二三百里。南北亦百數十里。其質爲最細之沙。中雜沙粒。與大漠同。漢中空氣乾燥。有小沙陀。略生水草。人畜入其中。茫然不辨南北。猶在大海風浪間。風颺沙起。則陷沙不得出。倘或風晴日煖。早晚遠望沙中山岡。蠱起結爲城郭宮室樓臺殿宇。中有旌旗。有刀劍。有寸馬豆人。各相馳驟。瞬息忽更爲樹木。爲駱駝牛馬獅象虎豹。又爲內地人塞外人。男女衣服悉如其制。及迹至之。都歸於烏有。古書稱崑崙之山有五城十二樓。卽此種雲氣。謂之漠市。蒙番見者。詫謂佛國顯靈。羣焉膜拜而不忍去。其餘零崎之沙磧沙窩。散亂飄忽。均無此壯觀也。

### 青海柴達木

青海柴達木。土壤遼闊。行程荒遠。然村居相望。一路有停驂息迹之所。循大道而進。各站皆有屋。猶如新疆之官店。旅客實稱便焉。在柴達木南部者。有古城。都藍寺。巴倫。哈多。桑托洛亥。達巴蘇圖。巴彥托懷。哈拉呼遜等處。係由海南西



行之路。中以巴倫巴彥托懷爲市鎮。巴彥托懷桑托洛亥。且有溫泉可浴。在北部者。有都藍奇特、庫車、哈順、摩將悉、蘇開、琛如等處。係由海北至安西新疆之路。摩將悉一站。略形寂寞。餘皆市鎮也。在西部者。有清喀利、朱古爾、圖格爾、蘇夾、呼耳托古爾、葛摩耳、哈洽格爾、租哈、賽罕托哈、失亞耳托、乃什、什來、拜巴、那林、租哈、阿爾善特、潮湃、托羅伊、得布特里、哈雅阿魯、托拉塔拉林、那瑪噶、卓卡、託克多渾、哈爾馬岡、巴爾瑪、那謨克、察汗托輝、巴爾、梯克、哈爾西、馬格來、巴夏伊吉、烏勒爾等處。係西藏新疆安西出入之路。內以圖格爾蘇夾托克多渾、租哈察汗托輝。舊冊均稱察汗輝託爲市鎮。托拉塔拉林。從前林木百餘里不斷。屢經野燒。千年古樹。火燼數月不滅。後惟一片焦土而已。三部村市約有四五十處。每處住數十家。少則十餘家。數家村外圍以小圩牆。亦有有窰屋而無人煙之處。上著自蒙古以外。漢番兩種。所至皆有。西部則纏回居多。所居有窰洞。有土舍。以茅茨木板爲牆。而氈幕穹廬。常附近以爲居。人畜鬻聚。卽數家村落。有時亦頓成市集也。

青海巴顏喀喇山及諸山脈

青海之巴顏喀喇山。譯言大雪山。西面高度。平均約一萬八千尺至二萬尺。上接中崑崙。東入青海境。曰巴顏喀喇得里奔山。納木齊圖烏蘭木倫河導源於此。又東爲阿木屯巴爾布哈山。巴顏喀喇烏拉山。匝巴顏喀喇山。匝。猶言中間也。巴顏喀喇山橫貫青海。至此適中。又東南跨鄂格布拉格河。卽小金沙江之源而下。南曰巴顏喀喇札拉山。北曰仄胡爾巴顏喀喇山。擇巴顏喀喇山。巴顏託胡穆嶺。公嘴察哈拉嶺。漢名大山郭洛克山。漢名銀山自此入西藏界。爲瑪穆巴顏喀喇山。連峯萬里。諸峯擁護而東。其間巴顏喀喇烏拉山。東北岡巒重疊。衍爲六七支。最北一支爲那木山。卽那木洪河發源之谷。一爲阿拉克沙爾山。卽柴達木河發源之谷。又南一支爲布呼集魯肯山。一支爲巴爾布哈山。一支爲固爾班圖哈圖山。及烏拉得錫山。一支爲奇爾薩托羅亥山。漢名牛頭山及碩羅鄂刺嶺。木素鄂刺嶺。其最近一支則爲噶達素齊老峯。碩羅者石。蒙語石又曰七老鄂刺者山。音鄂博卽古積石山也。木素鄂刺。漢名雪山。噶達素齊老。譯言爲北極星。諸

山之間。則黃河重源出焉。噶達素齊老峯下。飛泉百道。旋洄亂石間。曲折而下。匯於鄂敦撻刺。蒙語鄂敦謂星。撻刺謂平川。卽古星宿海也。凡山水湧溢之谷。必有亂石堆積。巨川之源。石更紛鋪數十里。星宿海南北僅寬二里許。東西長五六里。怪石嵯峨。水行石罅中。忽隱忽現。無汪洋之勢。登高俯視。似一片黃砂積。謂爲石中海可也。上古時必係一沙石山。其石質不堅。山水湍激。岩穴洞壑。石根爲水穿嚼。崩頽坼裂。遂陷爲深谷。宣統中。岸邊頽石。尙有爲水沖擊者。細砂浮落。如砂質之搏成者然。

### 青海大雪山

青海倒淌河之東。爲大雪山。山後爲東科寺地。山之陰陡削不可上。而山之陽。則斜坦而袤長。日光暴暖。一山耳。陰陽分位。寒暖判然。倒淌河卽發源於其麓。雖有數溝入注。而流尙緩弱。氣陰寒。或曰大雪山產大黃。水爲藥氣薰蒸也。西北有地名阿什漢。爲哈拉庫圖。至察漢托洛亥適中之地。形勢便於控制。又北爲察漢托洛亥山。蒙古言察漢爲白。托洛亥爲頭。謂白雲覆於山頭。故邵陽魏

源直隸爲白雲山也。山前爲察漢城。聖祖親征噶爾丹。遣使宣諭青海諸部落。集盟於察漢托羅亥。又羅卜藏丹津之亂。誘諸部盟於察漢托羅海。卽此道。道光癸未。以其地當孔道。凡諸番入口辦糧。及海番度冰上岸者。悉由此道。匪案迭出。乃就其地以建城堡。在隴西各鎮標內。調軍弁二十四員。兵千名。駐此。以便彈壓而資防護。期限一年更換。咸豐間。裁青海長官。每年秋季蒞此。祭海會集。蒙番各長。日舉行會盟典禮。光緒丁未。建海神廟於城外。兩山之間。可望見青海。迤西爲將軍臺。駐兵時爲演武場。將臺自此得有漢名。西望青海。水色濃綠如濯錦。天半落霞。又如金蛇萬道。游泳中流。島嶼若隱若見。不可逼視。須臾薄霧混。海景卷藏。海心山更虛無縹緲。而不可望焉。

### 青海雪嶺

青海有雪嶺。雪深盈丈。長里許。陰風如刀割膚。噤不能聲。人少。凍且死。人多。則冰凌水溜。下山陡絕處。泥滑失足。杳無蹤跡。雪花隨風飄洒。四時不辨陰晴。

### 臺灣渡海開禁

臺灣自古不通內地。名曰東番。明天啓中。荷蘭人居之。屬日本。順治己丑。鄭成功據之。而逐荷人。置承天府。名東都。設二縣。曰天興。曰萬年。其子錦改東都曰東寧省。升縣爲州。康熙辛酉。聖祖用姚啓聖議。授施琅爲靖海將軍。征之。癸亥。琅率舟師由銅山進。入八罩。直抵澎湖。殲其精銳。鄭克塽窮蹙歸命。臺灣平。改置府治。領縣三。雍正癸卯。復添設一縣。初。私渡之禁嚴。閩粵人利其土地肥美。輒偷往開墾。久之。欲歸則不忍棄業。歸則干例禁。其父母妻子之在內地者。亦不得往。大吏憫焉。曾奏寬其禁。未幾。復停罷。乾隆己卯。光山吳士功撫閩。特奏懇飭部定議。嗣後除內地隻身無業之民。及並無嫡屬在臺者。仍遵例不許過臺。有犯卽行查拿。遞回外。若在臺有業良民。果欲迎其祖父母。父母。妻。子女。子。婦。孫。男女等。及同胞兄弟過臺者。許赴臺地。接管官報明籍貫。眷屬姓氏。年歲。冊移原籍。覈覆給照。回籍搬接。其在內地眷屬。欲過臺完聚。報明該管地方官。移臺核覆。中督撫給照亦如之。過臺時。驗照放行。如人照不符。而放行。及濫給路照。各該管官司均分別議處。其餘偷渡人。仍如舊例嚴禁。疏入。下部議行。

### 臺灣置郡縣

康熙癸亥臺灣初定。提督施襄壯公琅。請設官鎮守。有謂宜遷其人棄其地者。聖祖召問閣臣。高陽李文勤公霽奏云。棄其地。恐爲外夷所據。遷其人。恐奸宄生心。應如琅議。上韙之。遂置郡縣。

### 宋村

浙江開化與遂安交界處。有地名宋村者。環村皆山。惟一谷可通往來。村之大小。民之衆寡。無由知悉。但聞自宋以來。歷元明迄國朝。村人曾無斗粟尺帛之供。而地方官以其負嵎。不易征剿。亦竟純事放任。不加干涉。

### 茅麓山

茅麓山在湖北鄖陽界。毗連三省。廣數千里。明末流賊餘黨郝搖旗等竄入。明疎宗某繼至。郝等奉爲主。恃險假息。康熙初。命圖海督師與川督李圖英護軍統領穆哩瑪率三省兵會剿。諸將皆於層巖陡壁間。攀荆援葛而進。逾年。始蕩平巢穴。故京師諺語。有險難事則曰。又上茅麓山耶。則當日之形勢可知。

長沙

湖南長沙。在洞庭湖之南。水道以岳州爲第一門戶。臨資口爲第二門戶。靖港爲第三門戶。其陸路北連湖北。南連粵東。亦寰中形勢之區也。湘江中有沙墳起。若新築之馬路。長短不等。最長者曰老龍沙。長至六七里。長沙命名。或以此耳。通商口岸在小西門外。風俗樸厚。人物繁庶。巨大商店。羅列如林。

入蜀之路

入蜀之路。可由秦階。經桔柏渡。而至劍關。亦可由鳳翔寶雞。經漢中。以至寧羌。陸路不同。若取道歸州。穿夔巫。入成都。卽吳漢伐公孫述之路。其地雖皆屬大彭井絡。而山川形勢迥殊。

入蜀有三谷四道

入蜀有三谷四道。西南曰褒谷。從褒入。南曰駱谷。從洋入。東南曰斜谷。從郿入。其所從皆殊。謂首尾一谷者非也。其棧道有四。從成和階。文出者爲沓中陰平道。鄧艾伐蜀由之。從兩當出者爲故道。漢高帝攻陳倉由之。從褒鳳出者爲連

雲棧。漢王之南鄭由之。從城固洋縣出者爲斜谷道。諸葛武侯屯田渭上山之。  
棺材峽

三峽有名棺材峽者。高百餘丈。上有棺。不知何年物也。光緒中有夔州府幕。遣人沿緣而上。取棺之木爲琴。果取木數片下。木質蒼堅。不知其名。

### 溫泉

四川關外溫泉。處處有之。其水自岩隙流出。就地貯池。以供人浴。外建屋宇數椽。爲官廳寢室廚房諸所。且置役看守。並司洒掃。故凡宴會者。祖餞者。多假坐於此。然屋宇之宏敞清潔。以鱸城爲最。裏塘次之。巴塘又次之。餘則僅一池耳。泉有硫質。初浴。多暈者。再浴卽安。水中有微蟲。由皮膚吸人血。吸飽卽去。土人云。此吸人毒也。凡有瘡疥。一浴立愈。故關外漢蠻兩族人。鮮有瘡疥者。泉最溫煖。僅能浴一二十分鐘。縱身體健全者。亦不得過三十分鐘。久則汗涔涔。令人難耐。故有寒疾者。一浴亦愈。或浴已酣睡。亦妙。泉能消食。必食而後浴。否則初浴卽飢矣。故此泉又名消食泉。泉可飲牛。牛飲之。力倍增。故蠻民往往率數十



百牛飲焉。泉水散漫。凝結如白雪。蠻民掃之。用以熬茶。磋麵。或糊牆壁。如內地之用石炭石鹼也。

川邊番地

出汶川城五里。岷江從北來。索橋界其上。長可百餘丈。編竹爲索。橫亘空中。人行。輒蕩漾顛簸。心目暈眩。久之渡橋。沿草坡河折而南。卽興文坪桃關。對岸路尺許。下臨千仞。雪後冰凍。控馬行。殊可畏也。是河。一源於沙派溝。一源於龍潭溝。下流入岷江。又三十里。過礪頭。始見所謂礪者。其圍牆以碎石壘成之。上施木梁。以石板平其頂。可行可坐。番人家其間。中萃而高者爲戰礪。高至二十餘丈。蓋瞭望之所也。旁插旗。大小以百數。用唐古忒旁行字體。書梵經於上。沿途有轉經樓。其制。於水石湍急處架屋。屋中書經於旗。插旗於輪。寘輪於水。使水激而轉之。又三十里。抵草坡瓦寺。土司行署。自汶川徼外。皆加渴瓦寺安撫使地。西訖於斑斕山。與沃日接壤。

寧遠猓夷之區域

四川寧遠爲蠻疆。山谷幽阻。水泉泛濫。無道路可紀載。約計之。則在大渡河以南。敘州府上游之金沙江以北。小金沙江以東。峨馬雷屏之西。度其方面。不過千數百里。若分按之。自大渡南涉。其中除去越嶲冕寧鹽源西昌會理之內地。蠻族所據之山川。亦不過千里而已。

### 康藏衛分三區

康藏衛實分三區。蓋打箭鑪以西。丹達山以東。爲康。丹達山以西。如拉薩等處。凡達賴喇嘛所屬者。爲前藏。班禪喇嘛所屬者。爲後藏。藏卽唐古忒也。藏之外。乃爲衛。今者衛已亡矣。藏已與英人立有條約矣。完全者僅一康而已。世人不知有康。一出鑪關。卽謂之進藏。殆以其語文風俗相同。卽視康爲藏耶。抑以祇設駐藏大臣。而無駐康大臣。卽統名爲藏耶。以風俗論。西寧金川亦與藏同。固不得謂西寧金川爲藏也。

### 西藏

西藏。古號烏斯。唐爲土番。在青海西南。處萬山之中。其地縱橫連屬者。南界雲

南怒江北界西寧河源。西極後藏業爾欽之沙漠。東達打箭鑪。後藏可分爲二。曰喀齊。曰阿里。

由成都起程至打箭鑪九百二十里。層巒峻嶺。削壁懸崖。隔瀘河勢最險要。天時多寒少暑。打箭鑪東一百三十里有瀘定橋。卽瀘水也。初以鐵索橋爲渡。後亦有以木船渡人者。水漲則不可過。仍行橋上。橋長三十一丈一尺寬九尺。施索九條。覆板於其上。水頗險惡。有大風亦不可行。爲通鑪要隘。

郭達山在打箭鑪東北一里。高七百餘丈。時有青羊繞山而行。相傳漢諸葛武侯七擒孟獲時。命郭達至鑪。於沙畦納安鑪造箭。故名。山上有郭將軍廟。將軍郭達也。

裏塘在打箭鑪西六百八十餘里。天寒多雨雪。昔隸青海部。層巒疊障。道路紆迴。爲西藏要地。

巴塘在裏塘南五百四十五里。土地饒美。氣候暄妍。凡游邊藏者。莫不停驂於此。幾若上海。故有內地蘇杭關外巴塘之諺。然其地無城郭。無街道。漢蠻雜處。

寥寥百餘戶而已。其所以得此美名者。蓋以地當衝衢。百貨齊備。飲食衣服。備極奢華。而又有種種名勝之區。供人遊眺。故也。山則峻標甲嶠。水則流合金沙。昔爲拉藏罕所屬。去巴塘九百餘里。地名乍丫。一大部落也。

金沙江之源。自達賴喇嘛東北烏泥烏蘇流出。烏泥烏蘇。譯言乳牛也。其水名烏魯烏蘇。東南流入察木多。又東南流。逕中甸。入雲南境。塔城關。名金沙江。至麗江府。名麗江。

巴塘至察木多一千四百又五里。中隔乍丫。路出西北。天時無異。裏塘。三山環偪。二水合流。爲西藏門戶。界通川滇。北河有四川橋。南河有雲南橋。

瀾滄江有二源。一源於察木多之噶爾機雜噶爾山。名雜格河。一源於察木多之濟魯肯他拉。名傲木格河。二水會於察木多江。巴林寺之南。名拉克格河流入雲南境。爲瀾滄江。南流至車里宣撫司。爲九龍江。流入緬甸境。

瀾滄之西。爲哈拉烏蘇。卽禹貢之黑水。今雲南所謂潞江也。其水出自達賴喇嘛東北哈拉諾爾。東南流入察木多。又東南入雲南。爲潞江。

拉哩在達隆宗西北。距察木多一千五百餘里。天時嚴寒。山勢陡險。無城郭。所屬寺院。有堪布喇嘛。主掌兼第巴事。又有工布江達。在拉哩西南。工布僻處一隅。而江達則爲西藏孔道。天時和暖。產稻米。有水田。絕域中之沃壤也。

黑水源出西藏之喀喇池。入潞江。至緬甸入海。渡黑水。行十餘日。至烏思藏。烏思藏西南二千里。懸崖峭壁。積雪凝冰。山之巔。清泉百道。奮湧爭流。而四面羣山環峙。有如兒孫。西北走喀齊。西南走天竺。東北走甘陝。東南走川滇。爲名山五千二百七十。奉爲鼻祖。則崑崙山也。

渡折支。沂洄而上。四山中有沮洳場。約二百餘里。汎濫不可數計。土名苦敦腦兒。譯言星宿海。黃河發始之源也。

前藏東拉哩西一千零十餘里。有達賴喇嘛坐牀之所。曰布達拉寺。在布達拉山。布達拉山四面皆崇山峻嶺。不生草木。殆古所謂鐵圍也。其中原隰平衍。南北約六七十里。東西約二百餘里。中通藏江。自東北繞西北流。藏江之北。北山之南。平地突起一石。其周五六里。高一里許。依山疊砌高樓十三層。形勢莊嚴。

則布達拉寺也。

羅卜嶺崗。在布達拉西南十五里。爲達賴喇嘛沐浴之所。水自藏布江引入池中。池有榭。壁繪諸佛像及青石梯。六佛昇天之遺跡也。

由前藏行八日。九百餘里。至後藏。地曰札什倫布。翁結巴寺。則爲班禪額爾德尼坐牀之所。

### 三瞻

西藏三瞻之地。兩山抱護。形勢險固。土肥產豐。道光中。工勒布盤踞其間。以劫掠行客爲事。藏路不通。同治癸亥。蜀督駱文忠以內地兵丁不服水土。借藏兵攻破碉樓山寨。生擒工勒布。並勦其黨。惟藏中墊軍餉五十萬。乃以其地償於藏。仍由藏中派土司治理之。光緒丙申。瞻對土司有離心。蜀督鹿傳霖調兵四營往勦。奪碉樓要口。藏中所委土司子重。以餘黨逃。官軍報捷。鹿督乃改其地爲州治。名曰定瞻州。

### 察木多

察木多。舊名喀木。爲西藏之頭藏。據瀾滄江上源薩楚河鄂穆楚河會流之地。當打箭鑪至前藏之中央。滇蜀羌隴之孔道。藏東第一要隘也。番人所居。背倚南山。碉房深邃。洞宇縈迴。坡下建營壘。築市肆。商業殷盛。無異都會。有二橋。跨南河路通雲南者爲雲南橋。跨北河路通四川者爲四川橋。實往來通道也。

### 西康

西康。古康藏衛三區之一也。東起打箭鑪。西至丹達山。凡三千餘里。南與雲南之維西中甸二廳接壤。北踰俄洛已達野番。與甘肅交界。亦四千餘里。其西南隅。過雜瑜外經野番境數日程。卽爲英屬。

由雜瑜取道野番境回國均經邊務大臣趙爾豐電政府與英交涉在案西北隅毗連西寧。東南隅抵四川寧遠所

屬各州縣之境。東北隅爲四川甘肅之交。幅員遼闊。倍於川。等於藏。爲西藏廓爾喀朝貢之大道。駐藏大臣出入之通衢。

歷代不知經營。以地畀於酋長。官爲土司。而自治者十之五。畀於呼圖克圖者十之一。流爲野番者十之三。賞給西藏者十之一。光緒丙午秋。詔設邊務大臣。

漸將土司呼圖克圖之地改土歸流。野番之地。征討投誠。賞給西藏之地。如江卡貢覺桑昂雜瑜瞻對。次第收回。均奏明設官。類伍齊碩。搬多洛隆宗邊壩四部落。亦以兵力收回之。此實宜由康設官。仍以丹達山巔爲康藏分界。則西康之疆域全矣。

### 西康之山

康境之山甚多。終年積雪。人迹不能到者。山雖高而無名。統而名之曰雪山。無地無之。其人力所通之處。山高有道路者。番人名之曰拉。無道路者。名之曰熱。猶內地之山有穴者曰岫。出脊者曰岡。大而高凸曰嵩。小而高曰岑。銳而高曰嶠。卑而大曰扈之類也。康爲川藏通衢。沿途大山與川交界者曰折齒山。自此前進。則有高日山博浪工山三壩山大朔山寧靜山昂地山王卡山恩達山瓦合山。與西藏交界者曰丹達山。此數山者。盛夏之時。天陰則雪。秋冬及春。有時大雪封山。不能行路。驛站亦有阻雪之日。此指大道而言也。小路之山如甘孜赴德格之濯拉。德格赴昌都之熱埡。巴塘赴鹽井之覺隴。白玉赴德格之恩作。



拉。登科赴召渠之恩科。亦皆高而積雪。此外尙多。不能歷數。惟登高一覽。則衆山俱小矣。

### 騰吉里湖

騰吉里湖。爲西藏第一大湖。在拉薩西北。高於海面四千六百四十米。突。東西長而南北狹。四周約七十七里。湖水極淨。與雪峯相映。最爲奇觀。水含多量鹽分。帶苦味。以氣候寒冷。湖水易冰。際嚴冬。則湖面如鏡。土人常往來於冰上。每年五月始裂。聲聞於四遠。

### 嶺左地勢

梅江韓江。爲廣東通渠。江岸名城。有潮州嘉應州。梅江下流會韓江。以入於海。而鎖鑰於汕頭。連山由南條分支。蜿蜒北走。瀕海揭陽潮陽諸山。尾閭於是。如神龍舒爪。左右拱繞。兩端兀峙。成馬嶼口。口外則雲飛波走。莽無涯涘矣。口內水深且無沙線。故爲南方之良港。口內有崎嶇礮臺。形勢頗利。近則漸廢。礮亦窳陋。石磴苔荒。大旗風冷。守臺老兵。種菜煨芋而外。無所事也。

## 榆林港

廣東崖州有榆林港。最深。可泊大兵艦。爲我國第三船澳。某督在粵時。擬於瓊州府城外設守。經營榆林港。籌有定款。購有極巨之礮數十尊。及李瀚章繼任。則以臺礮無用。盡舉以贈直督。

## 粵西異境天開

粵西山水奇特。往往異境天開。相傳某邑鄉人樵採。至一峭壁。無可攀躋。其下忽露洞口。蛇行而入。屈曲十餘丈。始見天日。高山平原。清流嘉蔭。靡所不有。出以語衆。且擷幽花異果以證其實。好事者入而跡之。則有宮室廢址。及漢篆碑版。不知避秦世外者。何以入而復出也。厥後邑人往游者繁。宰官迷信最深。以爲必係鬼神之域。懼于幽譴。固以泥丸日久。遂失所在矣。

## 廣西省城形勝

廣西省城居全省之北。與湖南接境二百餘里。形勢雄勁。將至城垣。羣峯攢簇。僅一線通路。南則面對府江。對岸亦環以諸山。其陸程至邊關二千餘里。極崎

峴間無宿店。水程則由府河下梧州。繞上左右江。過潯州南寧。亦在三千里外。灘石阻梗。水淺時。月餘始達。一遇江漲。則立須停舟。更多危險。光緒壬午。法越事起。轉運維艱。卽文報急遞。動須半月。當路頗以爲憂。以全境四至論之。改省南寧。則要害適中。於邊防大計。呼吸可通。且市廛繁盛。舟楫四達。實爲水陸衝途。滇廣越南。百貨出入。與梧州相等。邊地戍兵。轉餉輪班。皆必由之路。開府於此。眞足控制中外也。其後省垣僅通湖南一路。荒陋之狀。不可名言。世號爲第一瘠省。信然。

### 雲貴山水

雲南山多平坦。多高厚。水多清冷。土多黃。貴州山多槎枒。多深阻。水多湍悍。土多沮洳。

### 滇省水道

滇省水道甚稀。每有一溪一川。皆以江或海名之。大理之洱海。漾濞之漾濞江。與瀾滄江。不過大山間一百餘尺闊之巨流耳。以視江浙之太湖。不知當以何

物名之。顧江浙人之視丘爲山。要亦與滇人之以川名海。同一淺見也。

### 壩子

滇人稱平原爲壩子。壩子有數方里者。有十餘方里者。有數十方里者。大小不等。至其所謂壩子。非從前之府治卽州縣治。或大村落。蓋雲南全省。本屬嶺地。山嶺居十之七。一遇平原。卽相其地勢。以爲府治。以爲州縣治。或人民集居。因成村落。至若居民數戶。依稀平之坡。築室而居。以種玉蜀爲生者。則名之爲鋪。而不名之爲壩子。且壩子多在兩山之間。往往將至一縣或一大村。當下坡時。卽先見萬山圍繞中。平地一片。惟其形幾如釜底。推以理想。千百年前。或本一大河也。

### 大理下關

大理下關。爲雲南迤西門戶。蒼山繞其左。洱海臨其右。誠天然之形勝也。蒼山高度。約距地平線七千餘英尺。終年積雪。風景絕佳。至下關西一里許。石城巍峨。古壘高矗。關前有石碑一。書漢丞相諸葛武侯擒孟獲處十一字。關以外水

聲淙淙。如飛馬奔馳。白浪四濺。誠洱海西流之大觀也。

### 雲南土司轄地

臨安府屬土司。惟納樓長舍二舍。情形略近內地。江外猛丁一帶。間有平原。其餘多屬磽瘠。普洱府屬。平原頗多。鎮邊廳屬。惟孟連猛濱。平原較大。餘則山多原少。順寧府屬。平原廣漠。永昌府屬。如保山所轄四土司。特苦磽瘠。騰衝府屬。平疇萬頃。蓋沿邊各地。山多者恆瘠。原多者恆肥也。

### 猓塞山

河口爲滇邊要塞。顧瘴氣甚重。附近有猓塞山。山地高。氣候甚寒。鐵道盤旋其上。守路防塞。兩可兼顧。

### 臘耳山

臘耳山介楚黔之間。其山自貴州正大營起。北界老鳳芭茅猴子諸山。東接粟林天星鴨保岑頭諸坡。故苗之介居三廳及松桃銅仁間者。舊史統謂之臘耳山苗。

## 月崖

貴州思南沿河司東岸有月崖。苗人以漆畫一月於上。夜有光。而日間黯然。周三丈餘。拜之爲神。漢人既有是地。相聚而謀曰。是苗人之以術制我也。遂圻之。今惟白色一團而已。

## 蒙古道路

由張家口至庫倫。都凡三千六百里。出張家口。一望皆沙漠。淡水殊少。每二三十里。始有一井。非土人之拙於墾。溶也。其土深厚。不易掘耳。往往有掘數百丈。尙不得涓滴者。人馬經此。逢井必憩。有時人尙可支持。馬則已渴甚。輾轉必需飲矣。故蒙古交通。除台站外。其所有道路。惟游牧之徑途耳。無水可飲。無柴可取。又無村落可寄宿。一片荒涼。極目不見一人。

## 多倫

多倫居內蒙中樞。夙爲重鎮。猶外蒙之庫倫也。自張家口至此。凡四百八十里。實則口外里數。每里足抵內地二里焉。

昔爲蒙人游牧之場。康乾以來。均由漢人陸續開墾。時移業進。漸成鉅鎮矣。

### 庫倫

庫倫爲外蒙總匯。位置在西經九度。北緯四十八度。居喀爾喀土謝圖汗東北。游牧地最廣。庫倫者。蒙語城柵之意。以四圍皆木柵。故名。城南十餘里有汗山。綿延高聳。茂林蒼翠。蒙人尊之爲神山。四時致祭。禁止樵採。自京師正北偏西行。過居庸關。出張家口。西北行三十站。轉北行十四站。至庫倫。距京師四千餘里。更由庫倫北行十一站。至恰克圖。卽買賣城是也。再北行。卽爲西伯利亞。由恰克圖北行五百餘里。卽爲上烏丁次克。沿鐵路至貝加爾湖。北卽伊爾庫次克。與恰克圖相對。一爲西伯利亞之大商場。一則蒙古之大商場也。故由上烏丁次克至庫倫。實不過平常十八站地。而至京師。則須四十四站。以軍郵計。八日始達庫倫。卽草青馬肥之時。亦須六日。

國朝設庫倫辦事大臣。轄土謝圖汗車臣汗兩部。車臣汗部西界黑龍江。南界內蒙東盟。以烏珠穆沁旗爲界。庫倫辦事。並兼轄恰克圖貿易事宜。凡四十七

卡倫。恰克圖東卡倫二十八屬。土謝圖汗車臣汗二部。恰克圖西卡倫十九屬。三音諾顏札薩克圖二部。此四十七卡倫。皆歸庫倫辦事大臣管轄。至三音諾顏札薩克圖二部事。則歸烏里雅蘇臺管轄。土謝圖汗部地勢平坦。水草廣茂。北部多山。南部多沙漠。庫倫卽在土謝圖汗部北偏東。察烏罕蓋山。互其南。色楞格河繞其東。自左翼右末旗分之。北則高山細流。縱橫蜿蜒。南則平沙廣漠。草木不生。外蒙中部最險之域也。每卡倫駐庫什固爾兵二百人。庫什固爾者。保安之意。猶漢語保安軍也。然此種兵皆非能戰者。且訓練無方。器械窳舊。亦徒有其名而已。

### 庫倫佛山

庫倫多山。有名佛山者。禁地也。徧山皆綠葉松。

### 哈薩克

哈薩克地居新疆。其種族爲蒙古。元之後裔也。當元之盛時。分封於哈薩克。故以哈薩克人呼之。其後子孫蕃衍。有徙居東土耳其斯坦者。有徙居伊犁科布



多塔爾巴哈台者。其在外蒙哈薩克之哈民。以雍正丁未恰克圖界約及咸豐庚申中俄續約。劃歸俄羅斯。乃不屬於我國。哈人善騎。故俄之哈薩克馬隊頗著名。然因地近寒帶。冬日嚴寒。以南方較爲溫暖。頗思內向。往往潛行越界。借地游牧。名曰潛哈。曾經奏明有案。然不敢以原屬我國之蒙哈。令其爲我國之國民者。恐俄人以哈薩克既歸俄國。卽指哈人所借之地爲俄國之領土也。光緒壬寅癸卯間。科布多參贊瑞洵及志銳等先後奏請收回借地。迭經諭令潘效蘇會同瑞洵妥籌辦理。並有不得以借地爲已成之案。憚於更正之諭。然邊疆大吏皆以爲多一事不如省一事。原奏者非欲認真辦事。不過藉此以邀功。查復者則更畏難苟安。不惜飾詞以罔上。故迄未查明借地。實行收回。

京師城門

京城周四十里。高三丈五尺五寸。門九。南曰正陽。南之左曰崇文。右曰宣武。北之東曰安定。西曰德勝。東之北曰東直。南曰朝陽。西之北曰西直。北曰阜成。明永樂己丑所建。順康以來。修整宏壯。其名則仍舊貫。

阜成門又名平賊門。平闖賊也。當明末時。闖賊從此門遁出。其南壁上尙有手印之蓮花迹。城內有一胡同。曰追賊胡同。亂定後。居民惡其名。改追賊爲錐子。而書平賊爲平則。

### 正陽門門禁

京都城禁綦嚴。向夕卽閉。正陽門外城有門三。中央者正對天橋。爲馳道所經。故終年不啓。車馬往來咸取道於左右兩門。舊例。京朝官吏除宗室親貴旗人外。皆居外城。每日晡則兩門皆閉。至三鼓時。左右兩門啓一次。以備各官入朝。內城居人之偶留於外城者。卽乘此時隨入。故俗有倒趕城之說。又謂之趕夜城。然祇許入不許出。防宵遁也。自光緒庚子拳匪肇禍後。外人以此門密邇使館。時閉時啓。出入不便。要求弛禁。許之。顧初猶左右虛掩。繼乃虛掩一門。至光宣間。則上半夜啓左門。下半夜啓右門。於是車馬雜遝。終夜有聲。而交通大便矣。

左門中有觀音殿。殿址始於明。松山之役。思宗聞洪承疇殉國。旣賜祭十六壇。

復建祠以表其忠。祠成而聞其生降。遂罷。後乃塑大士像以奉之。右門中有關帝廟。廟貌如生。而甚短小。相傳像初塑於明宮中。尚有一巨者。同時以塑成之。年月日時。召術者推算。術者素以神術聞。謂大者身且不保。小者則香火可數百年。語聞於思宗。特留其大者而舁小者於正陽門側。崇禎甲申難作。大內灰飛。像亦同燼。而在門側者果無恙。至國朝而奉祀如故。

京師五鎮

永定門外煙墩。爲南方之鎮。大鐘寺爲西鎮。鷄獅潭爲北鎮。黃木廠爲東鎮。煤山爲中鎮。

帶衛歸海

天津之建治營城。昉自明末。國初時。邑人周姓。又曾以私財修之者也。城周九里。關四門。北帶河。西衛安。南歸極。東鎮海。命名之始。審勢象形。具有深意。光緒庚子。聯軍破天津。八國分兵據其地。和約既定。外兵遵約撤退。而郡城與大沽礮臺。同在毀棄之列。爰就園城舊址。築馬路。而所有碑石。則全爲英人移往威

海。爲建造港塢之需。故津人迷信者。羣謂四門之名。適有帶衛歸海等四字。物之成敗有定數也。

### 古長城

自木蘭北數百里。有土堆巍然。東至俄羅斯。西抵準噶爾。蜿蜒數千里。道光以前。屯戍墩堠。猶有存者。土人云。古長城也。

### 萬里長城

長城東起臨榆之山海關。跨直隸山西陝西甘肅四省。蜿蜒屈曲。約長五千餘里。東半內外均砌巨磚。黃河之西。則築以泥土。

### 蔡元請修築邊牆

康熙辛未。總兵官蔡元疏請修築邊牆。上初命閣臣集九卿於闕門外。面詢可否。以聞。羣臣未及對。上復召大學士諭曰。朕思衆志成城。豈在邊牆。諸臣叩首曰。大哉王言。臣等見不及此也。所請遂不進行。

### 上海縣城沿革

光緒中葉以前。上海縣城。僅七門。曰大東。曰小東。曰大南。曰小南。曰西門。曰老北。曰新北。戊申己酉間。南市漸興。邑紳有以城垣之阻爲不便交通者。乃倡拆城築路之說。事爲固執者所聞。大倡非議。遣人持籍四出。迫令居民簽名。以爲抵制。於是遂有拆城保城二黨。私鬩不已。稟之有司。有司莫能袒。則請議於文廟之明倫堂。衝突久之。卒不解決。於是模稜者。謂不如不拆城而別闢高大之城門三五。以利交通。二黨莫能難也。議遂定。於是復闢新東小北小西三門。又別拆小東新北二門而高大之。

### 廣州城

廣州有舊城新城外城之分。舊城。昔爲尙可喜駐鎮。新城。則其子姪及漢軍藩屬官僚大小衙署在焉。外城。乃咸豐中粵寇蕭朝貴增築。以資防海。今僅存土基。粵寇旣平。官署盡在舊城。漢人居東。旗人居西。中以旗望街分之。撫署爲可喜第。最宏敞。將軍署爲之孝第。尤壯麗。堂前拜台石。闊六十方尺。深半之。門前獅子二。耿精忠自肇慶取石鐫成。高大無匹。出西門三里。曰寶珠礮臺。曰白鵝。

潭。曰沙基。曰十三行。曰濠畔街。曰一約。曰二約。以至七約。皆各國通商立埠之所也。

### 臺灣不建城

臺灣平後。雍正年間有請建城垣者。世宗諭云。臺灣非內地比。此次之易於收復。亦因賊無險可據。設有城垣。賊必負隅抗拒。更費兵力矣。故臺灣郡縣不建城。而用刺竹。

### 洛陽之寨

距洛陽城五里有墩。十里有鋪。十里以外。每五里設墩臺。鄉村之烟戶稠密者。公同築圍。形式若城。亦有門有樓。特較城稍小。其名曰寨。

### 湖南苗寨

鎮筸五寨而外。苗寨以土爲之。統分十里。上六里卽永綏廳。下四里卽乾州廳。外更有筸子長官司所轄之苗寨數十處。鎮溪所千戶東南附近之苗寨數十處。苗寨在上六里下四里。初爲所官管轄。後隸保靖宣慰司。其性獷悍。土官亦

羈縻之而已。千戶長官司所轄。邊牆內者居多數。土官尙能彈壓之。頗知畏法敬官。邊徼有事。撻伐甫及。輒爭先投誠。其風較十里爲馴。

### 達圍寨

四川邊外番人居達圍寨。寨凡三層。其制下以棲人。中之右。土司居之。左爲喇嘛誦經所。中供佛。其上則土司婦女所憩。

### 安娘壩番寨

安娘壩番寨。疊石三層。入門。拾級而上。四周約數十間。中一樓最高。有金頂。爲供佛之堂。廊下環小牛皮箏十數。中貫以柱。男婦拽而轉之。箏內皆皮紙所寫各部佛經。番人聰俊者。誦經於佛堂。不能。則日夕轉此經箏。以當課誦。

### 京師道路

京師街市穢惡。初因官款艱窘。且時爲董其事者所乾沒。繼因民居與店戶欲釀資自修街道。而所司吏役。輒謂妨損官街。百般訛索。故亦任其蕪穢。又京城例於四月間。於各處開溝。蓋溝渠不通。非此不能宣洩地氣也。是時穢臭薰人。

易致疫癘。人馬誤陷其中。往往不得活。開溝之處。鬧市獨多。差役因從而漁利。又開溝者。每故意擇大店門口。居中開挖。店主以貿易不便。必重賂之。乃稍移偏。光緒中。潘文勤公在工部時。有司員某銳於任事。以開通溝渠。平易道路爲己任。鋪戶聞之大喜。亦願釀資助費。而文勤執不可。某叩其故。文勤曰。汝以通溝平道爲美。然一時之利也。汝之後。安得復有汝。將至路仍不修。而年年勒令店戶出資。是貽無窮之害矣。不如其已。遂止。

### 胡同本爲火弄

京師稱巷曰胡同。其義無所出。蓋閩中方言。家中小巷謂之弄。南史東昏侯遇弑於西弄。卽巷也。元經世大典謂之火弄。後因訛爲胡同。

### 京師八大胡同

京師八大胡同。名稱最久。皆在正陽門外。卽石頭胡同。臙脂胡同。大李紗帽胡同。小李紗帽胡同。百順胡同。皮條營。陝西巷。韓家潭是也。韓家潭初爲伶人專有。其家宅俗呼下處。豪客輒於此取樂。光緒庚子亂後。南妓麀集。伶人失業。始



有妓女蹤跡。而入八大胡同之列。或謂有十條胡同。則益以王廣福斜街櫻桃竹斜街也。

### 京師王廣福斜街

京師有王廣福斜街。始人競稱爲王寡婦斜街。後則易爲王廣福三字。地名稍雅。而失其真矣。此與麻狀元胡同。可以作對。

### 上海租界之路

上海公共租界馬路之建築。除南京路四川路用鐵梨木火磚鋪設外。其餘普通爲兩式。一以沙與石子拌和平鋪者。普通名之曰馬路。一以碎石大小疊砌者。普通名之曰石路。

### 鐵路橋

津浦鐵路之橋。河身偪仄。且河底少沙。故其橋亦普通製造。京漢鐵路之橋。河水漫溢八九里。底多沙土鬆蘇。不易建置。脚用螺旋。深入數十丈。誠爲世界所未有。正大鐵路越固關井陘之險。汽車行飛崖間。易致顛隕。其軌兩端不等。一

端寬四尺八寸半。一端寬三尺三寸。車至寬處。其輪軸自由伸展。至狹處。其輪軸自由收縮。此係我國某工程師之所新發明也。

### 蘆溝橋

蘆溝橋在京師廣安門外。溝本桑乾河故道。因其水濁而黑。故曰蘆溝。又曰渾河。國朝改名曰永定河。橋始建於金大定己酉。長約二百餘步。石欄雙鎖。上鐫獅像百餘。姿勢各異。亦前代美術之一種也。在昔爲南北往來衝要。騷人墨客過此。必流連題詠。故燕京八景中有蘆溝曉月。與長亭灞橋。同爲勝蹟。明顧元起詩云。西山籠霧晚蒼蒼。一線桑乾萬里長。最是征夫望鄉處。蘆溝橋上月如霜。自京漢鐵路開車。此橋遂寂寞矣。

### 船橋

蘭州北門外橋。名鎮遠。以船爲之。橫排二十四艘。自南岸達北岸。每船相離尋丈。船填土石。頭尾用大鐵索。囊磚石。沈河底。復用大鐵練連貫之。練環大如盤。兩岸均有鐵柱。插沙土中大合抱。出地約丈餘。相傳爲明初所鑄。船面鋪大木。

板數層。以草土填平。沿河聯以紅欄。凡往來甘涼口外者。悉由此橋。車馬日以千計。諺所謂天下黃河一道橋是也。冬河冰合。甘督率僚屬祭河神。始拆船橋。車馬皆行冰上。正二月間。冰泮。仍駕以橋。

### 臺灣藤橋

臺灣諸羅有遊八社。其第五社曰藤橋。高山對峙。中夾大溪。深數千仞。番人剖大藤爲經。繫於兩麓大木上。以小藤爲緯。橫織如梁。翼以扶闌。行則搖曳如欲墜。過者股慄目眩。不敢俯視。而番人以頭頂物。往來如飛。

### 成都長春橋

四川成都東門外之長春橋。俗呼東門大橋。一名濯錦橋。光緒癸未間修築時。發現宋碑一方。則此橋猶爲宋代所建者也。

### 溜渡

溜渡者。居瀾滄江上岸。至峭削。江寬二三十丈。無可施鐵索。土人細竹爲巨纜。兩端綴以石碣。更取藤作三圈。貫纜上。名曰溜筩。渡者自縛筩內。岸人舉纜力。

送。須臾達中途。纜受重下垂。曲如弓背。渡者以兩手攀纜遞進。始達彼岸。纜有二。以通往來。其運物亦如渡人之法。別以細索繫圈上。中路停滯。則振其索。圈動纜升。久之亦抵岸矣。以用溜渡。故稱此江爲溜筩江。

### 雲南鐵索橋

雲南鐵索橋。在響水關側。兩岸壁立。下臨深谿。亂石壅流。飛濤百丈。以不能累石爲柱。則以鐵索大如臂者。貫於兩岸之崖石。或十餘條。或二十條。用木絞使直。鋪板作地平。翼以欄杆。橋長者或數十丈。望之如飛樓虛閣。往來者不知行於空中也。

滇中以瀾滄江爲最。明李定國燒斷以拒大兵。吳三桂用竹筏過兵至永昌。旣逐定國。始動帑三千金修之。

### 貴州盤江之橋

黔中盤江一橋。視雲南瀾滄江更勝。鄂爾泰節制三省時。改驛路於此。今爲通大理之沿邊要道。



清稗類鈔

名勝類目錄

燕京八景

京都諸勝

京西諸勝

水局

十刹海

後海

陶然亭

金魚池

八里莊

二牖

玉泉山諸勝

西山諸勝

白河風景

秦淮河

雨花臺

頁

莫愁湖

京口三山

第一泉

劍池

蕪湖風景

汴中名勝

三百三十有三亭

九峯山之勝

琵琶亭

黃鶴樓

奧略樓

巴塘八景

三十六江樓

榕巢

粵西奇山

雲南響水塘瀑布

名勝聯句

一八

一七

一七

一〇

八

七

七

七

七

六

六

五

四

一

一

一八

一七

一七

一六

一六

一四

一四

一三

一三

一三

一三

一〇

一〇

一〇

一〇

一八

一八



# 清稗類鈔

杭縣 徐珂 仲可

## 名勝類

### 燕京八景

金明昌逸事。有燕京八景。曰居庸疊翠。玉泉垂虹。大液秋風。瓊島春陰。薊門飛雨。西山積雪。蘆溝曉月。金臺夕照。明人更薊門飛雨爲薊門煙樹。高宗更玉泉垂虹爲玉泉趵突。蓋泉從山根仰出。噴薄如珠。實與趵突之義相合也。又更西山積雪爲西山晴雪。各景皆勒石。紀之以詩。

### 京都諸勝

鼓樓 鼓樓在地安門北。昔之金台坊樓。舊名齊政。元建。置銅壺滴漏。制極精妙。故老相傳。以爲宋代故物。其制爲銅漏壺四。上曰天池。次曰平水。次曰萬分。下曰收水。中奉饒神。設機械。時至。則每刻擊饒者八。以壺水漏爲度。涸則隨時增添。冬則用溫水。



鼓樓有門三。樓之東南轉角。街市均斜鋪。樓之西。昔爲斜街。率皆歌台酒館。有望湖亭。爲達官貴人游賞之地。齊政者。取書璇璣玉衡以齊七政之意。

鐘樓 鐘樓在金台坊東。卽萬寧寺之中心閣。元至元中建。後之鐘樓在鼓樓北。明永樂中建。旋燬於火。乾隆乙丑重建。有御製碑。

鐘樓之制。雄敞高明。與鼓樓相望。有八隅四井之名。蓋東西南北街道最爲寬廣。至元中建閣四層。簷三重。懸鐘于上。聲遠愈聞之。

玉河橋 玉河橋在東城根者曰南玉河橋。在東交民巷者曰中玉河橋。在東長安街者曰北玉河橋。水自皇城內箭亭流出。南穿城。歸正陽橋城河。橋東西兩岸皆植柳。垂蔭水面。

觀象台 觀象台在城東南隅堞堵上。元至元十六年建。中爲紫薇殿。內有御書聯扁。台上舊有元代郭守敬所製渾天儀簡儀銅球量天尺諸器。康熙癸丑。以舊儀年久多不可用。御製新儀凡六。曰天體儀。曰赤道儀。曰黃道儀。曰地平經儀。曰地平緯儀。曰記限儀。均陳于台上。歷朝遵用。其舊儀移藏台下。乙未年。

又製地經平緯儀。乾隆甲子。又製璣衡撫辰儀。並陳台上。占風竿亦名順風旗。上有鐵籠二十八道。蓋以象二十八宿之數也。自遠即可望之。

紫薇殿東小室曰壺房。卽浮漏堂。內有銅人一。銅壺五。曰日天壺。曰夜天壺。曰平壺。曰萬水壺。曰分水壺。每逢日月蝕前三日。調壺則置銅人於萬水壺上。面南抱箭。箭又名量天尺。長三尺一寸。鐫晝夜時刻。上起午正。下盡午初。壺中安箭舟。如銅鼓形。水長舟浮。則箭上出水盈箭。盡則洩之於池。箭上時刻與赤道相符。晝夜一周。再注水亦如之。雖遇陰雨。其時刻亦無差也。是銅人爲調壺所用。固非占日晷長短之具也。東廂三間爲測量所。又別有室三楹。爲晷影堂。南北平置銅圭於石台。長一丈六尺二寸。闊二尺七寸。周以水渠。南端置銅表。高八尺。上端施銅葉。中穿圓孔。徑二分。午正日影自圓孔透圭面。成橢圓形。南界爲日體上影。北界爲日體下影。中心爲中影。

泡子河 泡子河在崇文門東城角前有長溪。後有廣淀。高堞環其東。天台峙

其北兩岸多高槐垂柳。河水澄鮮。林木明秀。不獨秋冬之際難爲懷也。河上諸招提。苦無大者。水濱頽園廢圃。多置不葺。城內自德勝河外。惟此二三里間。無車塵市囂。惜無命駕者耳。宣統年間。河身尙存。經呂公祠南石橋出南水門。以入通惠河。

京西諸勝

京西八里莊慈壽寺。明代爲慈聖太后祝釐之所。有浮圖十三級。與天寧寺相同。塔旁有二碑。東爲太后畫九蓮菩薩像。王錫爵書瑞蓮賦。西爲太后畫關帝像。後寺毀而浮圖及碑存。西直門之西北。有如山陰道上。應接不暇。去城最近者。爲高梁橋。清明踏青。多在此地。沿河高樓多茶肆。夏日游人多有至者。惟無明代踏青之俗矣。南岸樂善園久毀。後又以牆圍之。再西則爲可園。俗稱三貝子花園。又西北岸極樂寺。明代牡丹最盛。寺東有國花堂。成親王書。其後牡丹漸盡。又以海棠名。樹高二三丈。凡數十株。國花堂前後皆海棠。光緒中海棠亦盡矣。又西北岸大正覺寺。俗稱五塔寺。後亦毀。惟五塔存。又西北岸有萬壽寺。

寺建於明。乾隆中重修。爲太后祝釐之所。寺極宏麗。大殿後疊石象三神山。舊有松七株。最有名。光緒庚寅。後樓火。并松俱燼。但存七松證道圖。寺西城關。爲萬壽街。俗稱蘇州街。兩行列肆。全仿吳中。舊傳太后喜蘇州風景。建此仿之。後已毀盡。又西爲麥莊橋。又西爲廣仁宮。在南岸。地名藍靛廠。火器營駐此。街衢繁盛。廣仁宮每歲四月廟市半月。土人稱爲西頂。又北東岸有化成寺。又北至海甸海甸。大鎮也。自康熙以後。御駕歲歲幸園。而此地益盛。王公大臣亦均有園。翰林院有澄懷園。六部司員各賃寺院。清晨趨朝者。咸集德勝西直二門外。車馬絡驛。公事畢。或食公廚。或就食肆。其肆多臨河。舉網得魚。付之酒家。至足樂也。及咸豐庚申秋。御園被燬。湖上諸園及甸鎮長街。日就零落。舊日士夫居第。多在燈籠庫一帶。後亦頽廢。

### 水局

京師自地安門橋以西。皆水局也。東南爲十刹海。又西爲後海。過德勝門而西。爲積水潭。實一水也。元人謂之海子。宋褻詞所謂淺碧湖波雪漲。淡黃宮柳煙

濛者也。然都人士遊踪多集於十刹海。以其去市最近。長夏夕陰。裙屐尤爭趨之。

### 十刹海

京師十刹海。在後門西。上接積水潭。名淨業湖。下通大內三海。荷花楊柳。風景幽絕。光緒中張文襄入相。建樓數楹爲寓廬。自題一聯云。亭上有蝦兼有菜。濛邊非我亦非魚。以此地本有蝦菜亭舊址尙存也。潭上舊有寺。高蠡梵宇。顏曰首善第一樓。相傳粉牆一帶。卽明李西涯故宅。法梧門學士詩龕亦在其間。然已不可確指。惟海旁楊柳夾堤耳。有酒樓曰會賢堂。院宇宏敞。軒窗明徹。王公貴人。遠方游客。消夏攜尊。咸集於此。五六月間。門外車馬盛極一時。

### 後海

京師之後海較前海爲幽僻。人跡罕至。水亦寬。樹木叢雜。坡陀蜿蜒。兩岸多古寺名園。騷人遺蹟。成親王之詒晉齋居其北。法時帆之詩龕在其西。蝦菜亭楊柳灣。李公橋。十刹海皆在此地。湖上看山亦以此地爲最暢。

## 陶然亭

陶然亭爲都下名勝之一。亭在南下窪。爲郎中江藻所建。江、鄂人。取白居易詩「更待菊黃家釀熟與君一醉一陶然」意以名之。地高曠。三面明窗。尤爲雅潔。秋日白楊零落。紅蓼花開。都中墨客騷人。多宴於此。

## 金魚池

京師崇文門外南小市東偏之金魚池。本名魚藻池。取葩經「王在之義」方塘小泊。縱橫若町畦。居民皆養魚爲業。池上有殿。榜曰瑤池。明代都人。每於五月五日。走馬魚藻池。以爲樂。國初亦然。今則殿址不存。舊俗亦不復舉。但見荇藻一碧。朱魚浮泳。隄旁垂柳成陰。參差掩映。饒有濠濮間想而已。

## 八里莊

八里莊在京城外。以國初諸老時往看花而名。始著。王阮亭、查初白、皆有摩訶菴詩。其地有酒肆。所售良鄉酒。頗著名於時。

## 二牖

京都昆明湖例禁泛舟。十刹海僅有踏藕小船。而二牐遂爲游人薈萃之所。每歲自五月朔至七月望。青帘畫舫。酒肆歌臺。令人疑在秦淮河上。居內城者。例自齊化門外登舟。至東便門易舟。至通惠牐。居外城者。則自東便門外登舟。午飯可就牐上酒肆。小飲既酣。或徵歌板。或閱水嬉。悉隨人意。

玉泉山諸勝

京師天然名勝。爲玉泉山。游者可出西直門。道坦平。垂楊夾道。過海淀鎮。鎮在京西。更前進。至萬壽山麓。孝欽后所建頤和園在焉。自此右折。再折而北。爲大路。巨石砌道。厚三四寸。縱七八尺。廣亦四五尺。惜年久失修。兩石相接處。已裂巨罅。山有古寺。亦名玉泉。入山門。則見林木葱鬱。道路迂迴。山麓窪地。隨處皆泉。水清澈可鑑。以手試之。冷冽如冰。池不廣。有小洲三。其上有瓦礫殘址。康熙庚申年。卽金章宗芙蓉殿遺址。以擴爲園林。名靜明園。當時以十六景著。曰廓然大公。曰芙蓉晴照。曰竹爐山房。曰采香虛徑。曰聖因綜繪。曰繡壁詩態。曰清涼禪窟。曰溪田課耕。曰峽雪琴音。曰玉峯塔影。曰裂帛湖光。曰風篁清聽。曰雲

外鐘聲。曰鏡影涵虛。曰翠雲嘉蔭。曰玉泉趵突。流風遺韻。所存不逮其半。山之四周。地低下。前有高水湖。後有裂帛湖。距玉泉咫尺。水脈暗通。而高水裂帛。復合注於昆明湖。卽頤和園所據爲勝境者也。池旁一船亭。下泊小舟一。平首而昂尾。徧身鐫竹葉形。髹以翠色。可乘之以泛玉泉神廟前。有石級。於此登巖。而泉之穴在其下。涌出作珠點。此間有童子。嘗以小杯取泉水勸游人飲。壁刊二碑。一爲天下第一泉。一爲御製玉泉山天下第一泉記。高宗碑紀云。水味貴甘。水質貴輕。玉泉每斗重一兩。他處名泉無此輕者。池底皆碎石。碧綠水藻。浮沉其間。池水不深不淺。終歲如是。

自此左上。爲石塔。四周刊佛像。右上爲一洞。洞口前有澄照二字。後有函雲二字。由石塔而下。繞至古華嚴寺。屋尙整。惜無几案。院旁有資生洞。甚小。過一佛殿。而至伏魔洞。益小。由洞側至玉峯塔下。塔已圯。不可登。然此已爲玉泉山之巔矣。塔下一破屋。故爲樓兩層。有佛一尊。肢體不備。下山至華嚴洞。較資生伏魔二洞稍大。四壁刻小佛。或立或坐。或臥或跏。雲紋繞之。其狀萬千。無一同者。



中一石臺置佛像亦石質缺首領蓋頭爲銅質被人盜以易錢也此洞皆爲雲母石或石英故現黃黑色卽地質學所謂水成巖也正門爲含輝堂帝后遊山時輒休憩於此

西山諸勝

白玉泉山騎驢西行作西山之遊。西山在京西三十里。爲太行之首。峯巒起伏不計萬千。而一峯一名聞者不易誌。知者不勝道也。其在京畿一帶者以位置當太行之西。故名西山。由玉泉山來者。先至荷葉山。山在玉泉西南。平壤間約八九里。入臥佛寺。卽唐之兜率寺。雍正間賜名十方普覺寺。門前有琉璃坊一座。前鑄同參密藏四字。後鑄具足精嚴四字。皆高宗御筆。其內一池作半圓形。蓄小金魚甚多。水石甚清。門內爲甬道。長約里許。古松奇檜夾道。森列殿三進。最後有一臥佛。以手支頤而臥。長約一丈六尺。範銅滲金。精髹五彩。元至治辛巳。詔建西山大壽安寺。冶銅五十萬斤作佛像。殆卽此也。兩隅有方桌。各陳佛鞋。爲人民製以奉佛者。大小不一。凡二十餘對。最大者長約二尺五寸。鞋頭闊

八九寸。前院有杪欏樹一株。又名七葉樹。其葉七出。略如鷄爪。故名。樹最潔。古人謂爲鳥不棲。蟲不生。幹圍兩人抱。約一丈一尺以上。上半已枯。心空如剗。然巨枝下垂。猶拳曲如虬龍。相傳爲唐貞觀建寺時。自西域移植而來者。自臥佛寺至香山之碧雲寺。約三里。西山佛寺累百。以碧雲爲最閎麗。故遊西山者。靡不至碧雲。高宗西山碑記。謂元耶律楚材裔名阿利吉者。捨宅開山。淨業始構。明正德間。稅監于經擴而充之。魏忠賢踵而大之。廟貌益宏云。出山門。門前二石獅。雕鏤工細。年久冒風雨。黯然作蒼翠色。稍入爲一橋。橋下澗深二三丈。樹木雜生。兩側泉流。其下盈不及寸。而汨汨然作暴雨聲。橋之左右。徧植柏樹。濃陰下覆。涼爽宜人。更入。西爲般若堂。爲禪堂。東有小院。爲屋數間。前有鐘亭。左右對峙。腐舊已甚。其一尙有鐘懸於梁。院前壁下有石龍首。泉水自龍口噴出。清而涼。沿壁作石槽。導之下注。聲清越可聽。更入。殿宇傾圮。佛像幾無一完整者。院中爲方池。上架石橋。正殿頗舊。殿前左右有八角華表。上鐫經文。字極挺秀。更入。正中爲碑亭。內植乾隆己巳年重修碧雲寺碑記。碑亭之後又一殿。亦

腐舊。更入一院。花木清幽。銀杏杪樞。白骨松尤多。杪樞雖茂。不及臥佛寺四分之一矣。院甚寬廣。右爲司房。左爲客堂。正殿三間。左右各有一室。左爲方丈。出是院左折。別有一院。有榆葉梅一株。開時色艷。紅不及桃。而淡不及杏。有微香。稍入。樹木蒼鬱。山石嶙峋。復甃石爲池。有泉白石隙噴薄。入小渠。曲折達寺前。泉旁舊有亭榭。柱石猶存。亭前爲玉仙洞。凡三穴。空無所有。洞外有一瘦柳。半幹作一大曲。復森森而上。姿態絕佳。是院右折爲羅漢堂。內列五百羅漢像。正殿之後。歷兩石階而上。計三十餘級。有一礬石坊。雲紋精妙。四方柱。徧刻之一小橋。橋下一溝。無水。此爲金剛寶座塔院。古木錯列。左右碑亭各一。作六角形。內勒乾隆戊辰年御製碑文。碑作漢滿蒙及梵書。四種並列。又有一坊。高宗書西方極樂世界阿彌陀佛安養道場十四字。壁作粉紅色。磚石間砌無損。歷石階三十餘級。又左右折而登。凡十餘級。爲一方形臺。以礬石爲之。壁刊佛像甚多。正面有燈在菩提四字。凡三折而上。作洞龕。其頂有塔七座。純以玉石爲之。中方形者最大。四隅各一次之。前面二座爲圓形。稍小。方者凡十三層。頂各有

帽。在塔上俯觀兩側。白骨松數十株。宛如白龍之羣舞空中。塔下北有土邱。爲明魏忠賢葬衣冠處。相傳忠賢重修碧雲寺。預立生壙。寫碑題銜。享殿僭制。忠賢既誅。其徒私葬衣冠於此。康熙間御史張瑗奏除之。後餘荒邱。繇亘三四丈而已。惟松檜甚繁茂。

游者可命碧雲寺僧備山輿。以游香山寺。高宗所建靜宜園在焉。有兵守之。非以名刺白守長。不得徑入。寺建於金大定丙午年。爲遼中丞阿里吉所捨。殿前二碑。載捨宅始末。碑石光潤如玉。白質紫章。或云。寺卽金章宗之會景樓。正統中。太監范宏拓之。費七十萬。門徑寬博。喬木夾蔭。流泉界之。依山以爲殿宇。寺前有石橋。橋下方池。爲知樂濠。瓔珞巖居其東。慈恩殿右爲香爐岡。乃乳峯石。昔人謂其時嘯雲霧。類匡廬之香爐峯。故名。左爲來青軒。下臨絕壑。玉泉諸峯。屏列於前。洵勝境也。

靜宜園外蔽短垣。長約十里。舊時園內有二十八景。有瓔珞巖之巖石片片。錯落平立。隨處可作蒲團坐。色蒼黝。古松奇檜。如掌蓋。如列屏。而泉聲泠然。如磬。

音之遠至。其上爲綠雲深處樹尤茂。巖下月河如帶。有瀑注之。長約丈許。下激山石如飛銀花。有南北二水道。北水道以石築長堤。廣僅四五尺。中鑿水軌。寬約五尺許。深祇寸許。自下而高。水汨汨流其間。絕無阻窒泛溢。其來源實居高處可知矣。西至韻琴齋。更入則爲正凝堂及暢風樓。其後山石嶙峋。有方亭據其端。前爲見心齋荷池一方。水皆山泉所注。清可以鑑。臨池爲軒。所謂清如許也。得月軒懸架池上。憑欄俯瞰。人影宛然。有半圓形之長廊繞池三面。旋至昭廟。乾隆庚子建。凡三層。兩旁有邃洞。以白石爲階。折而上。凡數十級。殿居其巔。備極崇宏。惜傾圮已甚。其下瓦礫歷歷。不可任步。門前有琉璃坊。題慧照騰輝四字。殿後有六角形御碑亭。

獅子窩在盧師山麓。西山諸勝之一也。自香山靜宜園而來。道經門頭村。入旗校閱場。將臺已巍然在望。凡越二三嶺而達獅子窩。蓋自香山至此。已十五里矣。左入前爲關帝殿。後爲菩薩殿。右爲霍山宗祠。再登爲望仙樓。繞廊而至碧雲天。東望平疇。煙雲彌目。石刊奇觀二字。由望仙樓東折。得石橋。橋旁有仙人

洞甚小。再下爲長廊。有聊齋畫壁。橫廣五尺。高約七尺。凡三十五方。甚完整。廊盡處建一方亭。由亭側登盧師山。俗名青龍山之頂。頗崎嶇。旣上。甚平坦。濯濯無一樹。遙望渾河。蜿蜒如帶。而太行山脈。不知幾千萬重。聳接煙雲之內。昆明湖。玉泉山。碧雲寺。皆在履舄間矣。至福惠寺。有重建青龍山福惠寺碑記。明嘉靖時。魏雙慶。王福喜。嘗捐巨資。後歸內監。管理故寺。無一僧也。

西山有所謂八大處者。一曰寶珠洞。二曰香界寺。三曰龍王堂。四曰大悲寺。五曰三山庵。六曰祕魔崖。七曰重興寺。卽靈光寺。八曰長安寺。自獅子窩至翠微山。登寶珠洞。洞甚黝暗。旋至香界寺。前後越數山嶺。無往不陂。無陂不斜。或臨陡壁而進。寺在翠微山麓。舊爲平坡寺。創於唐明仁宗。賜名圓通。康熙戊午。葺之。賜名聖感寺。乾隆己巳。改名入門老松一蔭。全院兩側有鐘亭。更進爲天王殿。爲佛殿。後進爲高樓。凡七楹。兩旁皆有屋。丹朱剝落矣。

自香界寺至虎頭山麓之龍王堂。甚近龍王堂。一名海泉菴。又名慧雲禪林。康熙辛丑。重建入門。卽至聽泉小榭。下有二泉。一在石階下。鑿龍口出水。瀦爲方

池深約四五尺。中蓄金魚。此處之泉名龍泉。鋤月老人有龍泉甜水歌。書一小方。懸於小榭。窗懸一聯云。當戶老松生夕籟。滿山紅葉入新詩。小榭之左爲丹楓染翠軒。殆以院落多植松楓兩木故也。又有觀音堂三間。

自龍王堂至大悲寺甚近。亦稱大悲庵。至此已在翠微山左麓矣。雍正甲辰。慧澄禪師重修。入門有竹林。蒼翠庇牆。前爲藥師殿。殿前有銀杏二株。姿態奇古。後進歷十餘級而登。爲大悲殿。明嘉靖丁未所建。

自大悲寺至重興寺亦近。入門可憩於歸來庵。端方嘗卜居於此。有屋五楹。四壁懸聯額。徐世昌有聯云。緣石菖蒲蒙綠髮。纏松薜荔長蒼鱗。端方自書一聯云。篋有三山記。心藏五岳圖。錫良復爲之記。門臨小池。左倚峭壁。壁上有二洞。院頗荒落。惟樹木葱鬱。山色湖光兼而有之。此可留宿。且有籐製山輿可乘。池右有石磴數十級。曲折而上。至韜光庵。更上爲八角亭。無題名。佇此可以望遠。前有菩薩殿三間。

自靈光寺至祕魔崖約里許。崖上證果禪寺。明成化間建。相傳祕魔祖師居之。

崖在盧師山半。大石嵌空。幾二丈。色黝。是名祕魔崖。洞內有石磴一。相傳爲盧師晏坐處。其後復有眞武洞。甚小。洞旁有軒三間。面對翠微高峯。樹木頗多。東行百餘步。有大石側立道旁。一池瀦焉。卽大小青龍所蟄處。在祕魔崖右望。平田一片。渾河在其前。渾河卽桑乾河下流。自此向張家口而去焉。舊屋甚多。大半傾圮。山門內鐘鼓樓遺址尙存。

### 白河風景

自通州至天津。水程三日可達。河身甚廣。寬處約五十餘丈。古所稱白河者是也。河兩岸植楊柳。蜿蜒逶迤。經數百里不絕。當三四月時。舟行其中。篷窗閒眺。千絲萬縷。籠霧含烟。水天皆成碧色。間有竹籬茅舍。隱現於桃柳之間。爲狀至麗。

### 秦淮河

江寧之秦淮河。自文德橋至利涉橋。夾岸河房。向爲應試士子僦居地。折而東。至釣魚巷。則鶯花舊隊也。桃葉渡在武定橋畔。



### 雨花臺

江寧雨花臺地不甚高。而形勢雄壯。登高一望。全城在握。山產石子。紋理圓潤。置於瓦盆石洗中。植水仙花一二株。疎影橫斜。饒有天然風韻。吳門顧希林嘗得一石。上作蝴蝶雙飛形。山之麓茅屋三楹。茶鐺竹具。可供遊客休憩。

### 莫愁湖

莫愁湖在江寧水西門外。每至夏令。萬荷競放。掉舟其間。如入香雪海。湖有曾公閣。隔湖清涼山色。蔥菁可人。人多假此宴客。

### 京口三山

京口三山。曰金曰焦曰北固。北顧俱負盛名。北固山有寺。曰甘露。在北門外五里許。入寺。有天下第一江山六大字嵌於壁。爲宋吳琚所書。寺右有樓。曰多景。對江而立。卽梳妝臺故址也。樓凡三層。樓右十步小亭。曰一覽。五步大亭。曰江山多處。亭西爲石帆樓。再左爲彭楊魁三祠。而關帝廟介於其間。最左爲高宗和東坡詩碑亭。甘露之勝盡此矣。寺對面如青螺小髻者。卽北固山。負地理歷

史之重名。其風景却蠢蠢無足觀。上有礮臺。金山在西城外五里許。額題爲江天禪寺。曰金山寺者。俗稱也。入門隨山而高。拾級而登。爲大雄寶殿。阿羅漢甚莊嚴。殿後上十餘級。爲藏經樓。樓後爲高宗御製詩碑亭。凡三亭。右稍上爲塔。塔七級。登臨眺矚。全城宛在目前。塔北有亭。聖祖題江天一覽四字。卽妙高臺遺址也。塔下有法海洞。黝黑不辨手指。有僧居之。洞外有碑曰浮玉山。蓋金山舊名爲浮玉也。焦山在東門外九里許。孤峙江中。須棹舟登之。山麓有海若庵。庵右爲高宗御製詩碑亭。再右爲文昌閣。文殊庵。東昇樓。樓憑江極明暢。彭剛直公玉麟謂足爲焦山諸勝之首云。山上舊有普濟禪院。聖祖御題爲定慧寺。寺左爲行宮。右爲松寥閣。題曰松寥竹塢四字。爲高宗御書。再右爲瘞鶴銘亭。字漫漶已甚。有一二字爲人鑿壞。以墮水而見重。將以出水而損其天真矣。右有大牆。題海不揚波四大字。所對處卽不波亭。右爲海西庵。卽焦光祠。壁嵌漢三詔之碑石。後爲仰止軒。祀楊椒山像。有三詔洞。卽焦光隱處也。洞狹小。不能容膝。觀音崖有觀音閣。閣左爲夕陽樓。上爲西笑閣。折上數十級。爲迴光精舍。

再上爲礮台。再上爲吸江樓。上供四面佛。憑檻四眺。羣山繞膝下。象山則隔江仰首。若承顏色。實名勝也。

### 第一泉

金山寺有第一泉。泉欄作方形。天下第一泉之題。沒於水中。不能見。別有題碑曰中冷泉者。其別號也。以椀貯泉水。雖高出椀口二三分而不溢。其厚冽與杭州之虎跑泉相類。味極甘美。

### 劍池

蘇州虎邱之劍池。相傳爲吳王試劍處。有顏真卿書劍池二字。

### 蕪湖風景

蕪湖攬長江之勝。風景極佳。城南有赭山。山傍桃塘。堤柳春舒。池荷夏放。風景至佳。赭山之巔有高樓。舊爲庠序。後則宿兵矣。對江爲臬磯祠。靈旗映漾。宮殿蒼茫。山右爲弋磯山。有病院。與聖公會爲比鄰。

### 汴中名勝

九龍臺在洛城東北。灑河之左。臺高三十六階步。約十丈立方。四周皆平地。臺有廟宇十餘間。供龍神像。臺右有明季重修石碑。勒明欽差督造府第內官監簽書右監丞孔寵重修。又一碑。其略曰。古有九龍臺。基跨邛嶺。地屆灑濱。臺基所築。未詳何時。

存古閣在洛陽東關外。離城二里。藏古碑八十餘種。方圓長扁不一。魏碑最多。秦漢碑亦有數十件。並有岳武穆行書碑數塊。筆有龍馬精神。

龍門在洛河之南。距城二十五里。兩山相對。形如壁立。中有一水。曰伊河。碑像不計其數。五尊一洞。名曰一鋪。像大至數丈。小至數寸。卽以山石原質鑿成。皆北魏時許愿之所築也。天子最高。諸侯次之。大夫又次之。下至庶民。祇能寸許也。

香山寺在龍門對面。伊闕山上。道途平坦。柏木成林。

此柏有葉無枝。葉生於樺高而且直。名曰箭桿柏。

外有瑤島蓬壺諸坊。山秀水碧。廟宇層層如階級。清潔不凡。御碑御匾及沿山佛像亦多。

### 三百三十有三亭

大興朱竹君名筠。嘗督學福建。於使院西偏爲小山。號筭仙山。諸生聞之。爭來人致一石。刻名其上。凡九府二州五十八縣咸具。刻名者三百餘人。因名其山之亭曰三百三十有三亭。

### 九峯山之勝

浙江仙居縣之九峯山。距城十餘里。遙望之。適有九峯。遂以得名。層巒疊嶂。上出重霄。中有一峯最高。所謂主峯者是也。山下有亭。游人至。皆稍憩息。乃登山。山路蜿蜒曲折。頗不易行。路旁石壁直立。行一里許。則壁上有洞。洞有木椅一具。相傳爲葛洪修道處。又行里許。始至山門。門左側之壁上。有泉眼無數。水點下滴。纍纍如貫珠。又如水晶簾。下承以池。水皆落池中。山僧卽以之烹茶。入門十數武。有一大石室。如廳事。然後壁設佛龕。龕左有石洞。一深不可測。陰冷之氣。侵入肌骨。雖多秉燭。亦不能入也。石室東西壁。更有五六石洞。皆大如屋宇。或爲僧舍。或爲客舍。或爲庖廚。而客舍之上。又建一小樓。緣梯而升。登樓眺遠。

眼界爲之一空。昔人有云：春夏之交，草木際天，秋冬雪月，千里一色。斯山之勝，概可知矣。山門外左右有小徑，循徑行不遠，又各有石室二間，皆山僧因洞爲之，以備人之游覽者。山僧僅四人，每歲游人以八月間爲最夥。蓋土著於是月多往游也。

### 琵琶亭

琵琶亭在九江城外之江岸。乾隆癸亥，瀋陽唐觀察英重修，增建高樓，題額曰江天遺韻。壁刊南薰殿本白太傅遺像，嘉慶中欽人方體所摹也。登樓四望，前臨大江，後對廬山。左則古木千重，右則人煙萬井。樓下迴廊旋繞，境極幽曠。游人題詠甚多。

### 黃鶴樓

黃鶴樓爲武昌名勝，高幾百尺，俯瞰大江，氣象雄壯。光緒癸未，鄰屋失慎，遂被焚。泊張之洞督鄂，重建改爲西式。左右置礮臺，命名曰警鐘樓，然舊時形勝已蕩焉無存矣。常樓燬時，有姜氏老人年已八十有九，在樓煎茗二十餘年，自第

二層樓躍下。得不死。樓中諸物。概能記憶。宣統庚戌。南洋勸業會開幕。有製舊時黃鶴樓雛形者。得老人指示。閱四月而告成。毫髮無異。

奧略樓

光緒末。武昌軍學兩界以南皮張文襄公之洞久督兩湖。爲之在黃鶴樓故址。建風度樓。供文襄小像其中。及文襄入軍機。致電鄂中。謂此樓形勢。關係全鄂。不當爲一人所私。乃改爲奧略樓。取晉書劉弘傳中恢弘奧略鎮綏南海語意也。

巴塘八景

巴山積雪 巴塘四周高山。勢若仰盂。山奇峭。不毛。終年積雪。映日燦燦。光眩人目。山距巴塘二里。夏時巴塘甚熱。人盡衣葛。而四山之積雪。仍依然也。

煖石回陽 巴塘大營官寨側。有石一方。厚薄均丈餘。立於熟土中。土人呼爲火龍石。謂於乾隆某年自天墜下。而巴塘溫度。於是陡加數倍。且謂巴塘終年無雪。亦此石所致。由巴塘糧臺出示保護。漢人援其說。因以煖石回陽名之。

二水交馳。小巴。巴楚。巴塘之二小河也。小巴發源於大朔山下。巴楚發源於啞吧廟側。一流巴塘之東。一流巴塘之西。而混合於清真寺下。不一里而又各分。東西流入金沙江內。土人異之。因呼爲二水交馳。

溫泉沐浴。距巴塘二里。許有溫泉。夏日可浴。水含硫質。能去疾。光緒某年。巴塘糧員張仲牧捐資建屋。以便人民就浴。並定爲單日浴男。雙日浴女。俾免競爭而識區別。

板橋垂釣。巴塘丁零寺外。卽金沙江正流。藏民以往來不便之故。因建木橋。長八九丈餘。兩面置欄杆。漢族居巴者。因羨河中魚美。每於午後垂釣橋上。遂美其名曰板橋垂釣。

柳林較射。巴塘清真寺下。有柳數百株。藏民於秋收後。往往移居林內。終日較射賭酒以爲樂。數十人支布爲鵠。於五十步外。以木箭射之。連中三次者。羣具酒飲之。

桃園賞花。距巴塘五里許。有桃園一。居金沙江岸。對岸爲龍王廟。漢族居巴



者每於桃花盛時。遨遊其間。水聲潺潺。風聲習習。洵足開拓胸襟而忘戍邊之苦也。

古桑抱石 巴塘大營官寨有古桑一株。大幾盈抱。樹中藏一巨石。土人呼爲桑抱石。其地因以得名。某有詩云。礦植原來性不同。古桑抱石信天工。天涯地角無論匹。要算巴山第一宗。

### 三十六江樓

粵東三水江口。有行臺。舊爲總督閱兵駐節之地。後遷肇慶。其地遂廢。阮元改爲書院。飛閣臨江。規模宏壯。題曰三十六江樓。蓋謂北江所匯者九。浚江始興江。黑江。錦江。翁江。麻江。琶江。濱江。蒼江也。西江所匯者二十七。北盤江。南盤江。龍塘江。思興江。牂牁江。柳江。離江。誓江。潯江。西洋江。洛青江。馱蒙江。黃龍江。橋江。荔江。藤江。秀江。橫槎江。邕江。秋風江。賀江。新江。白馬江。金城江。綠甕江。蕉花江。武陽江也。諸江之水。同流於此。故以爲名。是可與二十四橋同爲詩料也。

查禮檢堂爲粵西太守署園有大榕樹一株其幹旁出者四檢堂謂可架屋其上也乃斲木爲書屋名曰榕巢并以自號焉窗明几淨掩映綠陰中退食後輒梯而上品書畫閱文史頗爲退閑勝地丁艱去接任者來熟視笑曰此中大便甚佳遂穴其板作廁。

### 粵西奇山

粵西山勢突然而起闐然而止如陽朔山水舉國推之阮文達公總制兩廣且有願令陽朔之語以其奇也其山皆石從土出墳然而高變態百端悉肖物形上下數十里無一相同者。

### 雲南響水塘瀑布

滇中廣南府有地名響水塘者其瀑自下而上躍出半空初在三里外卽聞轟雷聲漸近里許則對面語不相聞惟見白雨濺空皆噴而上高十餘丈碎點飛灑濛濛成一片烟霧闊可十畝噴而復落流爲澗驛路在澗石之右少焉循路上則與瀑頂相並蓋其上又有大山大山諸水匯於此跌而下正值大石如

盤陀者。觸而激射。是以濺入空際。非真逆流之瀑也。

名勝聯句

嘉善金眉生安清。嘗過鄂渚。集古詩題曰。大江流日夜。西北有高樓。後至岳州。題曰。對此茫茫百端集。此老惓惓天下憂。至三醉亭。題曰。一月二十九日醉。百年三萬六千場。小孤山在大江中。銳下豐上。如置石盤盞中。碧蘿紅葉。秋景尤麗。金嘗兩過之。書聯曰。有美一人。中夜聞五銖環珮。遺世獨立。下游俯兩點金焦。九江琵琶亭。金有一聯曰。燈影幢幢。悽絕暗風吹雨夜。荻花瑟瑟。魂銷明月繞船時。蘇州新修滄浪亭成。應敏齋廉訪囑金擬一聯曰。小子聽之。濯足濯纓。皆自取。先生醉矣。一邱一壑亦陶然。南昌百花洲。遠景琵琶亭。近景滕王閣。阮文達公元嘗集白詩。王序爲聯云。楓葉荻花秋瑟瑟。閒雲潭影日悠悠。又吳城縣望湖亭。相傳爲吳周瑜練水軍處。粵寇之亂盡圯。彭剛直公玉麟修復之。聯云。戰艦列千軍。想當年小喬夫婿。破浪乘風。多少雄姿英發。今我戈船來寄績。弔古憑欄。幾許事業興亡。祇贏得殘灰劫火。湖天開一碧。看此日大地山河落。

霞孤鶩。無復活潑生機。誰家鐵笛暗飛聲。悲歌擊筑。把那些滄桑感慨。暫付與芳草斜陽。又滕王閣有聯云。奇文共欣賞。我輩復登臨。秦淮風月。千古艷稱同治間。粵寇既平。其兩岸河房。先後興築。繁盛如昔。各處聯語頗有佳者。林氏水閣云。六朝金粉。十里笙歌。裙屐昔年遊。最難忘北海豪情。西園雅集。九曲晴波。三生夢影。樓臺依舊好。且消受東山絲竹。南部煙花。懷素閣水榭云。看一水西流。畫舫清樽。且喜金吾不禁。唱大江東去。銅琶鐵板。須邀玉局同來。夢綠軒水榭云。璧月夜夜。瓊樹朝朝。綠水紅橋。舟似織。詩老鶯鶯。公子燕燕。清歌妙舞。酒如淮。莫愁湖勝棋樓云。湖號莫愁。女號莫愁。天下事愁原不少。王亦有像。侯亦有像。古今人像此無多。黃山奇勝聞天下。慈光寺有歙縣曹文正公振鏞聯云。讀經雲海花飛雨。說法天都石點頭。普賢庵有不署名一聯云。奇妙脫凡蹊。果到峯頭始信。光明凌絕頂。直從天外飛來。杭州西湖冷泉亭有左文襄公宗棠一聯云。在山本清。泉自源頭冷起。人世皆幻。峯從天外飛來。與董思白舊聯。泉自幾時冷起。峯從何處飛來。一問一答。各臻其妙。又孤山以林和靖而傳。咸豐

辛酉。仁和典史上杭林兆霖與其母妻姊女六人同殉粵寇之難。杭人爲營塚於和靖墓側。立祠塚前。祠有薛慰農時雨。明克庵德二聯。頗佳。薛聯云。大節媿閻公。取義成仁。青史從今尊縣尉。忠魂依處士。補梅招鶴。孤山終古屬林家。明聯云。上下五百年。處士忠臣各今古。迴環三十里。于祠鄂廟共湖山。安慶府中江第一亭。負城臨江。爲郡城勝景。太湖李振鈞有聯云。秋色滿東南。笑赤壁以還。與客泛舟無此樂。大江流日夜。問青蓮而後。舉杯邀月更何人。何悔餘題揚州題襟館長聯云。當年多士登龍。追陪雅集。溯漁洋脩禊。賓谷題襟。招來濟濟英髦。翰墨壯江山之色。翳玉鈎芳草。綠蘸歌衫。金帶名葩。香霏硯席。揚華摘藻。至今傳宏獎風流。賢使君提唱騷壇。誰堪梅閣聯吟。燕城續賦。此日有人騎鶴。爛漫閒遊。悵文選樓空。蕃釐觀圯。閱盡茫茫浩劫。園林賸瓦礫之場。祇橋畔吹簫。二分月古。灣頭打槳。十里春深。補柳栽桑。漸次復承平景象。大都會搜尋勝概。我欲雷塘泛酒。蜀井評茶。

